

F 5
3





16.6.79

16 15
C C
35 20

S. July. de prax. et gra et trin.

$$\frac{B.}{\frac{111}{1}}$$

[Faint handwritten notes at the bottom of the page]

$$\begin{array}{r} 100 \\ 100 \\ \hline 200 \end{array}$$

SANCTI
FVLGENTII

EPISCOPI RVSPENSIS

De veritate prædestinationis
& gratiæ

LIBRI III.

CVM ALIIS ALIQVOT

*eiusdem & aliorum opusculis nunc
primum in lucem editi.*



LVTETIAE PARISIORVM,

EX OFFICINA NIVELLIANA.

Sumptibus SEBASTIANI CRAMOISY, via
Iacobæa, sub Ciconiis.

M. DCXII. +.

CVM PRIVILEGIO REGIS.



Coll. Rom. Soc. Jesu B. Cat. Inscr.





Ill^{mo} ac R^{mo} Prasuli

D. IACOBO DAVY

PERRONIO, S. R. E.

*Cardinali, Archiepiscopo Seno-
nensi, summo Francorum
Eleemosynarchæ.*



AVCVLOS Fulgen-
tij libellos, qui in lu-
cem nunc exeunt,
Ill^{me} Cardinalis, ne
nominis tui purpura
ornarem, tibi que
offerrem, muneris exilitas dissuasif-
set, nisi animum ea spe confirmas-
sem, ut quod rei decesse videbatur,
religiosi officij reuerentia excusa-
ri, purgarique posse considerem.
Nam ut sacrorum statû quidam sunt

â ii

ritus & solemnia, quæ ab iis qui diuinam rem faciant mutari aut præteriri sine piaculo non possint: ita me, cum editioni huic patronum designari ac vindicem oporteret, præter fas moremque facturum existimaui, nisi tibi vni potissimum deferrem, quod tibi præ cæteris quasi quodam præcipui titulo debebatur. Cui enim potius Fulgentij, hoc est eius Episcopi qui æui sui Antistitum lingua & ingenium fuit, scripta conueniant, quam tibi, quæ Galliæ vniuersæ inter Episcopos suos, quamuis ingenij & doctrinæ fama præstantes, tanquam Fulgentium alterum hac in primis vtraque laude meritò suspiciunt? Aut cuius auspicio Theologica hæc arma, vetustis hodiernisque hæresibus debellandis idonea, consecrari atque in publicum proferri æquius sit quam tuo, cuius innumeris palmis

victriciſque ſæpe triumphans Ec-
cleſia nobiliſſimum atque opimis
refertum ſpoliis gloriæ tuæ trophæ-
um deſixit? Et tela igitur libens ne-
ceſſe eſt recognoſcas, quibus dimi-
cans tot tibi laureas comparavi: &
patrocinium Fulgentio, tutelam-
que non deneges, quam vides ſa-
pientiæ, virtutibusque tuis tanquam
neceſſarium hæreditatis onus in-
cumbere. Erunt alij fortasſe, qui-
bus reliquas ſuaviſſimi facundiſ-
miſque ſcriptoris delicias nanciſci,
tibiſque exhibere fors melior con-
cedat: tum Epistoſas & Homilias,
que plurimæ fuerunt, tum maximè
dogmatica, quibus aut aduerſus
Pintam & Aſtragilam alioſve diſ-
ſeruit, aut Fauſto, Fabianoque, huic
decem, illi ſeptem libris reſpondit.
quorum pleraque in antiquis Gal-
liæ bibliothecis reperiri poſſe ne diſ-
fidam, facit Theodulſi Aurelianen-

sis , & Hincmari Remensis , aliorumque , à quibus ea citari constat, auctoritas. Mihi interim parte aliqua officij perfunctus videbor, qui quod hactenus consequi licuit obtuli , atque exigui munusculi , sed flagrantissimi certè studij conatu, quò se nostræ erga te observantiæ vota porrigant, testatus sum. Ea enim tua in me ordinemque nostrum sunt merita , vt cùm his quicquid gratiarum est satis esse non possit, si quid grati animi studio à nobis rependitur, id non ad lancem, neque ad dimensum tribui , sed ὅλα quod aiunt, ὅλα καὶ effundi debeat.

Ill^{ma} ac R^{ma} A.T.

Deditissimus

IACOBVS SIRMONDVS
SOC. I E S V.



LECTORI

Delibris S. Fulgentij qui hoc volumine continentur.

I. **L**IBROS de Veritate prædestinationis & gratiæ, qui primum obtinent locum, Fulgentio asserunt non solum eius vitæ auctor, & Isidorus in viris illustribus; verum etiâ Synodi Parisiensis & Aquisgranensis, quarum testimonia inferius producantur. Quamvis autem vulgata Isidori exemplaria huius tituli duos tantum libros præ se ferant, & Synodi tanquam singularem librum commemorent: tres tamen scripsisse libros Fulgentium, & res ipsa nunc ostendit (nisi quod tertius temporum iniuria mutilus est) & fidem cum vitæ auctore faciunt tum Gothescalcus monachus in confessione sua, tum Episcopi Africani in Epistola Synodica: quam horum librorum initio præfiximus, Maioris Carthusiæ codicem secuti, ex cuius membranis descriptum apographum humanissimi, doctissimi quæ Nicolai Fabri, Regis Christianissimi magistri, beneficio nacti sumus.

II. Qui proxime sequitur libellus de Trinitate ad Felicem Notarium, ab Isidoro item inter Fulgentij opera recensetur. Sed parum emendatum, nec satis fortasse aliquot locis integrum, videtur fuisse vetus exemplar Monasterij Trecentis insula

Germanica, quod à D. Nicolao Camuzatio, Tre-
censis Ecclesiæ Canonico, ad se missum idem nobis
clarissimus Faber commodauit. Reliquos omnes
suppeditauit Bibliotheca Vaticana.

III. *In his prima est refutatio Sermonis Fasti-*
diosi Arriani, cum epistola Victoris, qui eum ser-
monem Fulgentio refellendum miserat. Cuius opus-
culi testimonium apud alios etsi nullum nunc occur-
rit, Fulgentij tamen legitimum factum esse nulla
est dubitatio. Duæ porro epistolæ ad Stephaniam,
quarum in hoc libro fit mentio, ex earum sunt nu-
mero, quas à Fulgentio Romanis, præcipuè Se-
natoribus, viduisque ac virginibus, quarum fama
laudabilis habebatur, frequenter scriptas proditum
est vitæ ipsius cap. 26. Fuit enim Stephanía, ut
Ennodius testatur, splendidissimum lumen Eccle-
siæ Catholicæ, soror Fausti Præfecti inter Ro-
manas viduas clarissima.

IV. *Libellum seu epistolam ad Ferrandum Dia-*
conum, de baptismo Aethiopis, à Beda lectâ fuisse
hinc apparet, quòd sermonem B. Augustini ad in-
fantes, quem collectaneis suis in epistolam 1. ad
Corinthios intexuit, non aliunde, quàm ex hoc
opusculo deprompsit. Quod declarant duæ ultimæ
periodi, quæ post finem sermonis à Bedæ notario,
tanquam ex Augustini verbis descriptæ sunt, cum
reuera sint Fulgentij.

V. *De epistola ad Reginum Comitem luculentum*
est Ferrandi Diaconi in Parænetico ad Reginum

eundem testimonium. Scribit enim, cum Reginus Fulgentio per epistolam duo capita proposuisset, egregium Doctorem, cum priorem quæstionē, quæ de carne Christi, utrum corruptibilis an incorruptibilis fuerit, diligenter pertractasset: partem alteram, quæ de officio pietatis cum arte militari iungendis futura erat, morte præreptum intactā reliquisse. Hæc itaque causa est, cur epistolam imperfectam habeamus. Pertinet autem ad reuincendam hæresim Aphthardocitarū, Alexandria per hæc tempora, ut Liberatus Breniarij cap. 19. docet, exortam, quæ Christi carnem suapte natura incorruptibilem, & passionum omnium penitus expertem fuisse contendebat.

VI. Sermonis de Verbis Micheæ Prophetæ, præter codicem Vaticanum, altero etiam exemplari vsumus ex Bibliotheca insignis Ecclesiæ Parisiensis: cuius ope nonnihil interdum adiuti sumus.

VII. Adiecitimus ad extremū, quia vacuum erat spatium, epistolam Ferrandi eiusdem de essentia Trinitatis ac natura Christi, ad Egippium scriptā, illum, opinor, Presbyterum & Abbatem, cuius est inter cætera Thesaurus operum S. Augustini. Tū deinde fragmenta librorum aliquot Fulgentij qui non extant. partim ut hoc quasi gustu eorum desiderium acuatur: partim ut indicio esse possint, si quis fortè in anepigraphos, quod sæpe fit, libros ipsos inciderit. Tu boni omnia, Lector, consule, & Vale.

TESTIMONIA VETERVM
De tribus libris Fulgentij de veritate
prædestinationis & gratiæ.

Auctor vita B. Fulgentij cap. XXIX.

MVLTA iam reuersus de exilio condidit
Mnoma : decem libros Fabiani mentientis
falsa gesta conuincens : De veritate prædestina-
tionis & gratiæ libellos conficiens tres : aliaque
multa digessit. *Ita enim hic locus ex V V. C C. restitui
debet.*

*Isidorus de viris illustribus cap. XIV.
De Fulgentio.*

Extant & duo eius libri de veritate prædesti-
nationis ad Episcopos missi, in quibus demon-
strat quòd gratia Dei in bonis voluntatem hu-
manam præueniat, & quòd Deus quosdam præ-
destinationis suæ munere iustificans præeligit:
quosdam vero in suis reprobis moribus occulto
quodam iudicio derelinquit. *Et hic locus corruptus
videtur. cum libri tres sint, non duo: ijque non ad Episco-
pos missi, sed ad presbyterum & Diaconum.*

*Concilium Parisiense anni DCCCXXIX.
lib. I. cap. XXIII.*

Fulgentius in libro de veritate prædestina-
tionis & gratiæ, *Non ideo, inquit, se solum quilibet
Episcopus vas misericordiæ putet in gloria præparatum,*

quia Pontificali militia fungitur: sed si progrege sibi credito sollicitus semper inuigilet. & c. Lib. II. pag. 119.

*Concilium Aquisgranense anni DCCC. XXXVI.
in Præfatione.*

Vnde etiam Fulgentius in libro de veritate prædestinationis & gratiæ ita scribit. *Quantum persinet, inquit, ad huius temporis vitam, in Ecclesia nemo Pontifice potior, & in seculo Christiano Imperatore nemo celsior inuenitur. lib. II. pag. 119.*

*Capitulorum Caroli & Ludouici Regum
Additione I I. cap. XXI.*

Ad quid etiam constitutus sit Imperator, Fulgentius in libro de veritate prædestinationis & gratiæ scribit. *Clementissimus quoque Imperator non ideo est vas misericordiae præparatum in gloria, quia apicem terreni principatus accepit, sed sin imperiali culmine recta fide viuat. & c. lib. II. pag. 120.*

*Gothescalcus monachus Orbaçensis
in confessione sua.*

Item S. Fulgentius in libro III. de veritate prædestinationis & gratiæ, *Præparauit, inquit, Deus peccatoribus pœnas. illis utique, quos in se prædestinauit ad luenda supplicia. Verba sunt lib. III. pag. 138. sed paulo immutata.*

INDEX LIBRORVM FVL-
gentij & aliorum, qui hoc volumine
continentur.

EPISTOLA Synodica Episcoporum
Africanorum in Sardinia exulū, de gra-
tia Dei & humano arbitrio. pag.1.

B. Fulgentij Episcopi Ruspensis de Veritate præ-
destinationis & gratia Dei libri tres. pag.17.

Eiusdem liber de Trinitate ad Felicem Notarium.
pag.128.

Victoris Epistola ad B. Fulgentium. pag.166.

Sermo Fastidiosi Arriani. pag.171.

B. Fulgentij liber cōtra sermonē Fastidiosi. pag.177.

Ferradi Diaconi Epistola ad B. Fulgentiū. pag.224.

B. Fulgentij Epistola ad Ferrandum de baptismo
Aethiopis moribundi. pag. 229.

Sermo B. Augustini Episcopi ante altare ad infan-
tes de sacramento, præcedenti Epistolæ insertus.
pag. 257.

B. Fulgentij Epistola ad Reginum, de carne Christi
utrum corruptibilis an incorruptibilis fuerit.
pag. 260.

Eiusdem Sermo de eo quod ait Micheas Propheta,
Indicabo tibi ô homo quid sit bonū. pag.270

Ferrandi Diaconi Epistola ad Egippium, de effē-
tia Trinitatis, ac natura Christi. pag.281.

Fragments librorum B. Fulgentij qui non extant.
pag.285.



EPISTOLA SYNODICA
EPISCOPORVM AFRICA-
norum in Sardinia exulum,

De gratia Dei, & humano arbitrio.

In qua librorum meminerunt B. Fulgentij
Episcopi, De veritate prædestina-
tionis & gratiæ.



E I gratia plurimum amplectendis
sanctis fratribus, Ioanni presbytero
& Archimandrite, & Venerio
diacono, & fidelibus viris, quorū
in vestra epistola subscriptio conti-
netur, Datianus, Fortunatus, Boëthius, Victor,
Scholasticus, Orontius, Vindicianus, Victor,
Ianuarius, Victorianus, Photinus, Quod vult-
Deus, famuli Christi, in Domino salutem.

QUANTVM membra Ecclesiastici corporis per
Christi gratiam in vnitatem fidei compages retinet
caritatis: tantum necesse est vt perinuicem solli-
cita sint membra, vt repulso cuiuslibet prauis dog-
matis verbo, non solum seruandæ, verum etiam
reparandæ sanitati iugis atque indefessa tam ser-

monis quam orationis impendatur instantia. Sic enim fit, ut dum sollicitudo fraternæ puritatis inuigilat, ipse Spiritus sanctus, per quem caritas Dei diffusa est in cordibus nostris, diligentibus Dominum, & in Domino proximum, omnia co-operetur in bonum. Quia sicut ipsam dilectionem dono gratiæ spiritualis accipimus, ita dum pro fratribus solliciti sumus, non solum diuinam inesse nobis gratiam demonstramus, verum etiam, quâ-
tò magis à nobis puritas caritatis impenditur, tanto magis gratia nobis diuinæ retributionis augetur. Accepimus itaque vestra caritatis epistolam, quæ nostrum ex parte releuauit, ex parte verò mœstificauit exilium. Gaudemus enim, quia rectam tenetis de gratia Dei sententiam, cuius lumine illuminatur, & iuuamine gubernatur liberum humanæ mentis arbitrium. Sed quadam sumus nebula mœroris affecti, quia significastis quosdam fratres in quæstione de gratia Dei, & humano arbitrio non rectum tenere fidei catholice trami-
tem: sed aduersus Dei gratiam eleuare velle humani arbitrii libertatem. Vbi primum, dilectissimi, debetis agnoscere, immo vos non ambigimus agnouisse, ad hoc diuinitus ista permitti, ut hinc diuinæ gratiæ virtus documento possit indicij manifestioris intelligi. Quando quidem ipsa gratia nullatenus agnoscitur nisi detur: quæ quamdiu nō est in homine, tamdiu necesse est ut ei aut sermone

repugnet, aut opere. Nam sermone repugnat gratia Dei, qui sensum gerit fidei Christiana contrarium: repugnat autem opere, qui in moribus suis Christiana vitæ non tenet institutum. Hoc quippe in homine agit gratia diuinitus data, ut animus dono fidei caritatisque percepto, & sermonem bonum proferat, & studio bonæ operationis insistat. Quod fidelibus diuinitus dari, beatus & ostendit & poposcit Apostolus dicens, Ipse autem Dominus noster Iesus Christus, ^{1. Thess.} & Deus pater noster, qui dilexit nos, & ^{2.} dedit consolationem æternam, & spem bonam in gratia, exhortetur corda vestra, & cōfirmet in omni opere bono & sermone.

A Deo itaque nobis est omnis gratia boni sermonis & operis, à quo nobis etiam ipsius cogitationis bonæ manifestum est sufficientiam tribui: ut discat homo non in se, sed in Domino gloriari. Diuine quippe gratiæ bonam cogitationem hominis beatus assignabat Apostolus, quando dicebat, Fiduciam autem talem habemus per Christum ad Deum, nō quòd sufficientes simus cogitare aliquid à nobis, quasi ex nobis, sed sufficientia nostra ex Deo est. Proinde, & si quidam gratiam necdum habentes, non se intelligunt non habere: illi tamen qui gratiam diuinitus acceperunt, eo magis debent in ipsius gratiæ assertionem firmari, quo eam vident non omnib.

2. Cor. 5

A ij

tribui. *Necesse est autem, ut ab eis, quibus non tribuitur, ignoretur; & ab eis agnoscatur, quibus diuina largitate donatur. Testatur enim Apostolus, dona Spiritus sancti eiusdem Spiritus sancti*

1. Cor. 2. *acceptione cognosci. Ideo ait, Nos autem non spiritum huius mundi accepimus, sed Spiritum qui ex Deo est, ut sciamus quæ à Deo donata sunt nobis. Quæ & loquimur non in doctis humanæ sapientiæ verbis, sed in doctrina Spiritus, spiritualibus spiritalia cōparantes. Animalis autem homo non percipit ea quæ sunt Spiritus Dei. Stultitia est enim illi: & non potest intelligere, quia spiritaliter diiudicantur. Spiritualis autem iudicat omnia, & ipse à nemine iudicatur.*

Per sanctum ergo Spiritum gratiam accipimus. quo accepto, fit in nobis, ut quod accepimus, nouerimus. Proinde scienda est, dilectissimi, & recto tenore veræ fidei profitenda, tam humani arbitrij egena paupertas, quàm diuinæ gratiæ indeficiens largitas. Quid enim habes, ait Apostolus, quod non accepisti? si autem accepisti, quid gloriaris, quasi non acceperis? Ante largitatem quippe gratiæ est in homine quidem liberum arbitrium, sed non bonum, quia non illuminatum. Proinde, nisi gratia detur, bonum ipsum arbitrium non habetur. Sic namque est liberum

1. Cor. 4.

hominis arbitrium absque dono gratiæ , sicut est oculus sine luce. Nam & oculus ad videndum factus est : sed nisi lumen acceperit, non videbit. Illa autem est lux vera , quæ illuminat omnem hominem venientem in hunc mundum : illuminat autem hominem , seipsam dando per gratiam. Sicut ergo corporis oculus semper indiget lumen accipere , ut ipsum possit aspicere : sic & libero arbitrio hominis nulla potest gratiæ suffragari cognitio , nisi detur ipsius gratiæ spiritalis infusio. Proinde ut de iis quæ vestris literis indidistis , quid habeat catholici dogmatis veritas intinemus , singula breviter definire curavimus , sequentes donum eiusdem gratiæ , quod sanctorum Patrum cordibus & linguis ipsa est dignata infundere. Dixistis itaque , quod vobis dicentibus , quod Esau & Iacob necdum natis , Iacob per misericordiam gratuitam eligitur , Esau autem originali peccato detentus iusto iudicio Dei est odio habitus : Illi è contrario dicunt , in Esau figuram esse populi Iudæorum , ex futuris malis operibus condemnandi ; in Iacob verò figuram esse populi gentium , ex futuris operibus bonis salvandi. Hæc duo , quæ singula proponitis , bonum est ut catholica consensione iungatis. Sic enim & ab illis Dei gratia cõpetenter agnoscitur , & à vobis propheticum mysterium non negatur.

In illis namque duobus fratribus dignè accipitur duorum significatio populorum : præsertim cum ipsi Rebecca Dominum consulendi duo prænuncientur populi, ab eius vtero separandi. Veruntamen agnoscenda est in illa discretione & gratuita bonitas, & iusta seueritas. Nam quia omne datum optimum & omne bonum perfectum de sursum est, descendens à patre luminum, & gratia discernuntur, quicumque saluantur: profectò non sunt electa neque dilecta in Iacob humana opera, sed dona diuina. Rursus quia iniquitas nostra iustitiam Dei commendat, proculdubio in Esau humanæ iniquitatis est dānata nequitia. In eo quippe gratuitum in Iacob Dominus ostendit beneficium misericordiæ suæ, in quo eum non pro meritis futura cuiusquam bonæ operationis elegit, cui seipsum, & fidem, & bona opera donaturum esse præsciuit. Inde est quòd semini Abrahamæ, cuius in Iacob figura præcessit, beatus Apostolus dicit,

Ephes. 2 Gratia salui facti estis per fidem. *Ut ostenderet fidem non aliquibus bonis meritis dari, sed ipsius fidei dono omne bonum meritum inchoari, ipsamque donum Dei esse, sequutus adiunxit, & non ex vobis, sed donum Dei est. Ac ne quisquam sibi quorumlibet bonorum operum, audeat meritum vendicare, & pro quibuscunque operibus fidem se æstimet accepisse, subiicit, non ex operibus, ne quis gloriectur. Ut autē*

ostenderet non solum fidem, sed etiam bona opera diuinitus tribui, continuo subdidit, Ipsius enim factura sumus, creati in Christo Iesu, in operibus bonis. quæ non solum à Deo donata, sed ab ipso preparata testatur dicens, quæ præparauit Deus, ut in illis ambulemus. Gratia itaque Iacob saluus factus est per fidem, gratia consequutus est bonorum operum facultatē. Quocirca, quia certum est Esau fuisse vas iræ, Iacob autem vas misericordiæ; certissimè tenendum est, quod & ille ut damnetur iram iustè meruit: non enim iniustus Dominus, qui iram infert: & iste ut saluaretur, gratis donum misericordiæ præuenientis accepit. Iacob itaque iustificatus gratis per gratiam Dei, factus est vas misericordiæ per indebitam gratiam, & per ipsam misericorditer est preparatus ad gloriam: Esau verò per iram iustam iustè est preparatus ad pœnam. Iniquitas autem nostra iustitiam Dei commendat. Deus ergo in Iacob misericordiam gratuita bonitatis, in Esau verò iudicium iustæ seueritatis ostendit. qui sacramento quidem circumcisionis octauo die secundum tenorem diuinæ constitutionis accepto, reatu peccati originalis caruit, sed per nequitiam cordis in hominis terreni vetustate permansit; illius ibi iudicio derelictus, qui gratis saluat, iustèque damnat. In cuius persona significati sunt non illi tantum, qui fidem negant; sed

Et illi, qui usque in finem vite suae intra Ecclesiam positi, in malis operibus perseverant. De Galat. 5 quibus Apostolus ait, Quoniam qui talia agunt, regnum Dei non consequentur. Nam sicut ille circumcissus perijt, quia dilexit tenebras magis quam lucem: sic omnis, qui non deposuit veterem hominem, qui corrumpitur secundum desideria erroris, condemnabitur in iudicio, quia non condignè usus est baptismatis sacramento. Ad eundem quippe veterem hominem pertinent non solum illi, qui ignorant Dominum, sed etiam illi, de quibus dicit Apostolus, confitentur se nosse

- 1. Dominum, factis autem negant. De parvulis verò indubitanter tenenda catholica regula veritatis: Quia parvulus qui baptizatur, gratuita Dei bonitate saluatur: qui verò sine baptismo moritur, propter peccatum originale damnatur. Nec aliquo dicendus est Dei beneficio futura impietati praeceptus, qui absq. iustificationis gratia mortuus, est impiorum consortio deputatus: à qua impietate siue parvulus, siue maioris aetatis, solo quisque remedio eripitur, si Christi sanguine redimatur. De gratia verò non dignè sentit, quisque eam putat omnibus hominibus dari: cum non solum non omnium sit fides, sed adhuc nonnullae gentes inveniuntur, ad quas fidei praedicatio non pervenit. Beatus autem Apostolus dicit, quomodo Rom. 10 inuocabunt, in quem non crediderunt: aut*

quomodo credent ei quem non audiē-
runt? quomodo autem audient sine prædi-
cante? Non itaque gratia omnibus datur, quan-
doquidem ipsius gratiæ participes esse nō possunt,
qui fideles non sunt, nec possunt credere, ad quos
inuenitur ipse fidei auditus minimè peruenisse.
Ipsa vero gratia quibuscumque datur, non aequa-
liter datur, sed secundum mensuram donationis
Christi, & unicuique sicut Dominus diuisit
mensuram fidei: qui non hominum personas acci-
pit, sed omnia operatur vnus atque idem Spiritus,
diuidens propria singulis pro vt vult. Quod au-
tem vos dicitis, sola Dei misericordia saluari ho-
minem, illi autem dicunt, nisi quis propria volun-
tate cucurrerit, & elaborauerit, saluus esse non
poterit: dignè vtrumque tenetur, si rectus ordo ser-
uetur diuinæ misericordiæ & voluntatis humanæ.
Vt illa præueniat, hæc sequatur: sola Dei miserieor-
dia initium salutis conferat; cui deinde voluntas ho-
minis cooperatrix suæ salutis existat. Vt misERICOR-
dia Dei præueniens voluntatis humanæ dirigat cur-
sum; & humana voluntas obediens, eadem misERICOR-
dia subsequente, secundum intentionē currat ad
brauiū. per hoc humana voluntas in eo quod currit
vtiliter & laborat, ex Dei misericordia sibi esse
donū cursus ac laboris agnoscat: nec sit ingrata mi-
sericordiæ, per quā salutis accipit initiū, vt per ipsā
perueniat ad plenum sempiternæ salutis effectum:

quia tunc erit bona, si Dei praeueniatur dono, & tunc permanebit bona, si eius non destituatur auxilio.

Errat autem, quisquis putat sic à Domino tribui, velut si quis accepto idoneo pignore, pecuniam det: cum Dominus utique & pignus Spiritus sancti ipse quibus vult conferat, & pecuniam suam nummularijs expectandā, sicut ipse loquitur

Matt. 25 in Evangelio, servorum suorum curæ officioque distribuatur. Illa vero Apostoli sententia, qua di-

Rom. 9. citur, Ergo cuius vult miseretur; & quem vult obdurat: melius quidem ex persona confirmantis accipitur. Quam si quis non vult ex persona confirmantis accipere, illud sine contentione

Ibid. attendat; quod subsequenter dicit: An non habet potestatem figulus luti, ex eadem massa facere aliud quidem vas in honorem, aliud verò in contumeliam? Et cum in utroque vase faciendo figuli cognoverit potestatem, in vase honoris indebitam gratiam Dei miserantis intelligat, & in vase contumeliae debitum iudicium Dei obdurantis, id est, deserentis agnoscat. Deus autem obdurare dicitur, non quia ad iniquitatem compellit, sed cum ab iniquitate non eripit: quod quia iustus est, iuste facit. Deo ergo miserante, sine suis meritis homo salvatur; obdurante autem, iuste recipit quod meretur. Dominus quippe dono bonitatis salvat: iudicio scueritatis obdurat. Illud etiam quod vos dicitis, Dominus est enim,

qui operatur in vobis & velle & operari pro bona voluntate: Illi autem dicunt, Si volueritis & audieritis me, bona terræ comedetis: si *utrumque*, sicut oportet, animus in fide tranquillus acceperit, nulla de gratia & libero arbitrio quaestio remanebit. Iubet enim Deus homini, *ut velit*; sed Dominus in homine operatur & *velle*: iubet *ut faciat*; sed operatur & *facere*. Ideo *utrumque* beatus iungit Apostolus dicens, Cum timore & tremore salutem vestram Philip. 2 operamini. Dominus est enim, qui operatur in vobis & velle & perficere pro bona voluntate. *Ut ergo cum timore & tremore suā quisquis operetur salutem*, opus est volentis hominis: sed hoc ipsum Dominus operatur in suis. ac per hoc quoniam habet homo liberum arbitrium, audit praecepta, quæ faciat: sed ad implenda praecepta liberum arbitrium idoneum nullatenus efficitur, nisi diuinitus adiuvetur. Ita fit, *ut se operari debere homo cognoscat, dum praeceptum accipit, & Domino sc̄ sciat semper omne bonum debere, quod vult ac facit: quem teste Apostolo cognoscat operari in homine & velle & perficere pro bona voluntate. Qui suis fidelibus hanc dignatus est gratiam promittere per Prophetam dicens.* Spiritum meum dabo in vobis, & faciam Ezec. 36 ut in iustificationibus meis ambuletis, & iudicia mea obseruetis & faciatis. Cum ergo

Dominus in homine operari cœperit velle, tunc homo ad Dominum conuertitur, & eodem in se operante, vnde ipsi placeat, operatur. De Domino enim, dicit Apostolus: Aptet vos in omni bono, vt faciatis voluntatem eius, faciens in vobis, quod placeat coram se. Ad vitam quoque in tantum potest homo manum porrigere, in quantum habuerit Dominum protectionem suam super manum dexteram suam. Nimis autē absurdum, illos putare vasa misericordiæ, qui vel secularem habent, vel Ecclesiasticam dignitatem; vasa verò contumeliæ, clericos & monachos ac laicos æstimare: cum vtique Apostolis vasa misericordiæ illa dicat, quæ præparauit Dominus in gloriam, non præsentem vtique, sed futuram. quibus dicit,

Coloss. 3. Cum Christus apparuerit, vita vestra, tunc & vos apparebitis cū ipso in gloria. Ideo paulo superius eis ait, Quæ sursum sunt sapite, nō quæ super terram. Vasa quippe misericordiæ sunt, quibus dicitur, Venite benediſti patris mei, percipite regnum. Vasa vero contumeliæ sunt, quibus dicitur, Ite malediſti in ignem æternum, qui præparatus est diabolo & angelis eius. Vasa itaq. misericordiæ non Ecclesiastica, vel secularis dignitas, sed in Ecclesia spiritalis caritas facit. Quapropter in quacunq. professione tenuerit homo fidem, quæ per caritatem operatur, erit vas in honorem sanctificatum & vtile

Domino, ad omne opus bonum paratum. Contra prædestinationem vero sanctorum magnæ peruicaciae est aliquem vel parare, vel habere conflictum; cum Apostolica prædicationi nullus audeat refragari, quæ nō solum dicitur de Domino, Quos *Rom. 8.* autē præsciuit & prædestinauit conformes fieri imaginis filij eius: & alio loco, prædestinauit nos in adoptionem filiorū per Iesum Christum in ipsum: Verum etiam ipsum caput nostrum, ipsum primogenitum in multis fratribus, beatus Paulus prædestinatū confidenter prædicat dicens: qui factus est ei ex semine Dauid secundum carnē, qui prædestinatus est filius Dei in virtute, secundum Spiritum sanctificationis. Quisquis ergo prædestinatum Christum & Sanctos eius negat, Apostolicam fidem peruersus oppugnat. Omnes autem prædestinati ipsi sunt, quos vult saluos fieri, & ad agnitionem veritatis venire. Qui propterea omnes dicuntur, quia in utroque sexu, ex omni hominum genere, gradu, ætate & conditione saluantur. Semper quippe voluntas Dei omnipotentis impletur; quia potestas eius nullatenus vincitur. Ipse est enim qui omnia quaecumq. voluit, fecit in cælo & in terra, in mari & in omnibus abyssis, & cuius voluntati nemo resistit. Verum namque est, quod de se testatus est filius, quia in viuificandis nullum initium humanæ voluntatis expectat; sed ipsam voluntatem

*Ephes. 1.**Rom. 1.*

bona faciendo vinificat. Hoc in maioribus. Parvulos autem, in quibus necdum potest bona voluntas fieri, solius gratiæ facit operatione salvare. Liberum verò arbitrium, quod fuit in primo homine sanum ante peccatum, nunc in filiis Dei propria quidem infirmitate concutitur, sed maiore diuini muneris gratia subleuatur. Questionem verò animarum aut tacitam debemus relinquere, aut sine contentione tractare. quia siue ex propagine veniant, siue novæ singulis corporibus fiant, quod sanctarum scripturarum auctoritas non manifestè pronunciat, cum cautela debet inquiri: maximè quod sine fidei detrimento potest a fidelibus ignorari. Illud præcipuè observandum est & tenendum, parvulorum animas nexu peccati originalis obstrictas, omnibusque necessarium esse sancti baptismatis sacramentum, quo dimittitur peccati originalis vinculum, & amissa in primo homine per secundum hominem recipitur adoptio filiorum. Vos itaque, dilectissimi fratres, per gratiam Dei estote stabiles & immobiles: ac tenentes veram fidem, exhibete fratribus aliter sentientibus caritatem. nec de aliquo desperetis: quia qui hodie veritatem in aliquo non agnoscit, potest cras Deo reuelante cognoscere. Deo enim subest, cum volet, posse. Oremus ergo pro eis, ut Dominus operetur in eis. Exhibeamus eis bonam voluntatem, de qua nos possumus ha-

bere mercedem: scientes quoniam in conspectu Dei
 quisquis de numero praedestinationum fuerit, non
 peribit; & in omnibus voluntas omnipotentis
 implebitur, ut per gratiam salui fiant, & agni-
 tionem veritatis, Domino illuminante, percipiant.
 Prae omnibus studium gerite libros sancti Au-
 gustini, quos ad Prosperum & Hilarium scripsit,
 memoratis fratribus legendos ingerere. Quorum
 mentionem beata memoria Hormisda sedis Apo-
 stolicae gloriosus Antistes in epistola, quam con-
 sultanti se sancto fratri, consacerdotique nostro
 Possessori rescripsit, cum magno praconio catho-
 licae laudis inseruit. Cuius haec verba sunt: De
 arbitrio tamen libero & gratia Dei, quid Roma-
 na, hoc est, catholica sequatur & seruet Ecclesia,
 licet in variis libris beati Augustini & maxime
 ad Prosperum & Hilarium abunde possit agnosci,
 tamen & in scrinijs Ecclesiasticis expressa capitu-
 la continentur. Haec itaque, dilectissimi fratres,
 interrogantibus vobis, breuiter communi volui-
 mus respondere rescripto. Ceterum vnus ex nobis,
 in quantum Dominus seruis suis recti gratiam
 dignatur donare sermonis, illis omnibus, quae me-
 moratos fratres aduersus gratiam & praedestina-
 tionem intimaſtis vel sentire, vel dicere, tribus
 libris vestro nomine dedicatis, sufficienti disputa-
 tione respondit. quique aduersus duos libros Fausti
 Galli septem libros edidit: quos cum recensueritis,

agnoscetis protinus , quemadmodum memorati
Fausi commenta Veritati contraria , Catholicæ
 fidei penitus inimica , discussio prodidit , ratio
 manifesta conuicit , auctoritas diuina compressit ,
 & præcedentium patrum consona prorsus atte-
 statio confutauit. Speramus autem in Domino,
 quoniam gratiæ suæ ita subsidium largietur , ut
 & bene sentientibus tribuat augmentum , &
 aliter quàm oportet credentibus donet agnoscen-
 dæ veritatis intuitum. Ipsa enim facit gratiæ
 suæ participes quos prædestinauit ad vitam : ut
 in omnibus bonis suis humanæ arbitrium volun-
 tatis gratiæ Dei subiiciant , & ab ipso sibi co-
 gnoscant descendere omne datum optimum , &
 omne donum perfectum : sciant etiam ab ipso ex-
 pectandum semper auxilium , qui prædestinatis
 suis & gratiam & perseuerantiam donat : ut
 gratiam pro gratia donum vitæ perennis acci-
 piant.

FINIS.

B. FVL



B. FVLGENTII

EPISCOPI RVSPENSIS,

*De veritate prædestinationis &
gratiæ Dei,*

LIBER I.



EO gratias ago, sancti fratres
Ioannes presbyter, & Veneri
diacone, cuius ope tales estis,
vt pro gratia qua saluamur,
magno spiritu ac feruore cer-
tetis. Contristatus autem sum, quòd qui-
dam fratres nostri sub Christiano nomine
nituntur catholicæ fidei repugnare: scilicet
munera gratiæ Dei ad humani virtutem,
vel meritum transferentes arbitrij: tanquã
sine Dei auxilio noster conatus diuino va-
leat obedire præcepto: illudque tantum sit
Dei, vt nobis facienda præcipiat; nec in
nobis operetur ipse, quod præcipit: & si
quid boni Dominus tribuit homini, non

B

videatur donare, sed reddere. Qui vsq. adeo diuinæ bonitatis dona putant ex humanorum actuum qualitate pendere, vt etiam paruulos asserant sic præsciri & prædestinari diuinitus, vt nihil in iis qui eliguntur inueniatur supernæ collationis gratuitum: nec misericordia quenquam gratuita dignatione præueniat, sed supplicij atque præmij retributio in sola cuiusque propriæ voluntatis actione consistat. Illam quoque absurditatem quibusdam irrepsisse multum miror & doleo, qua gratiæ Dei in tantum inimici esse non dubitant, asserentes futurorum operum merito paruulos baptizari: vt è contrario dicant illis quoque paruulis, qui sine baptismo moriuntur, diuina benignitate consuli, vt absque sacræ ablutionis gratia rapiantur ad pœnam. in quibus scilicet Dominum futura eorum mala, si aliquanto diutius hîc viuerent, præscisse contendunt, & bonitate sua præripuisse præsentis vitæ curricula. quasi possit aliquis sine beneficio sanctæ redēptionis aut suppliciis perennibus subtrahi, aut muneribus æternæ vitæ potiri. Dum itaque pertinaciter contradicunt, se ipsos mortifera prauitate confodiunt. Quibus videtur Esaü & Iacob, geminorum scilicet fratrum ex vno

semine concubituque nascentium, ita vel-
le discernere merita, vt afferentes Esaü ex
futurorum operum præcognitione dam-
natum, Iacob quoque non gratuito diui-
næ bonitatis munere, sed futurorum tan-
tùm operum præscientia saluari potuisse
contendant: vt sic agnoscatur Dominus in
vtrouque iustus, nec credatur cui libet eorũ
gratuita quicquam miseratione largitus.
Cùm in hac præcipuè quæstione, quæ de
paruulis vertitur, in qua non actualium
propria cuiusquam malitia peccatorum,
sed ipsius peccatricis reatus originis inti-
matur, omnis qui non vult ab Apostolicæ
fidei veritate desciscere, qui rectitudinem
catholici dogmatis, Deo illuminante, cu-
pit inuiolata credulitate, confessioneque
seruare, omni remoto hæsitacionis ambi-
guo, veraciter credere debeat & fateri,
Dominum viuum, & verum, & bonum, id
est, summam & ineffabilem vnius naturæ
atque essentix Trinitatem, primi hominis
naturam totam bonam atque integram,
sine naturali malo, ac sine vilo vitio con-
didisse; neque carni creasse necessitatem
moriendi, neque animæ maculam cuius-
quam inseruisse peccati: & ideo humanam
naturam ex Deo habere creationis bonum;

ex hominis autem primi voluntaria præuaricatione, peccatum originale in nascentibus trahere, atque ex vnius transgressione iniqua & damnatione iustissima, in cunctos simul & iniquitatis nauum, & mortis manasse supplicium. Homo enim ad imaginē Dei factus reſtitutionem accepit voluntatis & operis. Itaque talis est homo creatus, vt & peccare & non peccare posset propria voluntate: ac propterea in eo dignè punitus est voluntariæ præuaricationis lapsus, quia nulla fuit ad peccandum naturali carnis aut animæ necessitate conſtrictus. Qui licet, sicut Apostolus docet, seductus ipse non fuerit, mulieri tamen, quæ seducta in præuaricationem fuit, praua voluntate cōsentiens, sic improuidus sibi mortiferū vulnus inflixit, vt in illo vno homine, cuius est anima mortua per peccatū, corpusq. mortuum propter peccatū, omnes originaliter peccato subderentur & morti, quotquot essent ex illo primo homine peccatore per concubitum maris & fœminæ nascituri. Postquam autem omnium hominum genitor propria voluntate peccauit, veritatem diuini præcepti, quod audierat, in quacunque die ederitis ex eo, morte moriemini, & iustitiam Dei ylciscentis expertus, vno veti-

1. Tim. 2

Gen. 2.

tæ arboris gustu , quia reliquit iustitiam ,
deuenit in pœnam , & sponte in anima spi-
ritaliter mortuus, supplicium quoque cor-
poralis mortis excepit inuitus. Voluntaria
ergo animæ mors pœnalem corpori pepe-
rit mortem : & hominem primum quia
possedit mors criminis, etiam mors illico
subsequuta est ultionis. Vnde factum est ,
vt eiusvniuersam progeniem non solum in
iis, qui proprio possent arbitrio delinque-
re, sed etiam in paruulis necdum propria
vntibus voluntate, reatus obstringeret ,
& prævalente peccato , pœnalem sibi per
omnes homines mors & transitum vendi-
icaret & regnum. Propter quod & Aposto-
lus dicit, *Per Vnum hominem peccatum intrauit* Rom. 5.
in mundum , & per peccatum mors : & ita per
omnes homines mors pertransiit , in quo omnes
peccauerunt. Item dicit, *Regnauit mors ab Adâ* Ibid.
vsque ad Moysen , etiam in eos qui non pecca-
uerunt in similitudine præuaricationis Adæ. Pec-
cans igitur homo totam in se peccato sub-
didit progeniem, quando delinquendo ve-
ram perdidit libertatem. à quo enim quis
deuictus est , & seruus addictus est: & om-
nis qui facit peccatum , seruus est peccati.
Ab hac seruitute, qua nascens paruulus te-
netur obstrictus , solus mediator Dei &

hominum homo Christus Iesus liber est
 genitus. qui licet verus homo natus fuerit,
 non tamen interueniente concupiscentia
 carnis, nec ex concubitu maris & fœminæ,
 sed de Spiritu sancto natus, ita veram car-
 nem de carne matris accepit, vt Dominus
 verus non culpam humanæ sumeret origi-
 nis, sed naturam; & peccata in corpore suo
 non facienda reciperet, sed delenda porta-
 ret. Apostolicæ namque prædicationis ve-
 raciter auctoritas docet, quia *peccatum non*
 1. Pet. 2. *fecit, nec inuentus est dolus in ore eius. &, pec-*
cata nostra ipse pertulit in corpore suo super lignū,
vt à peccatis separati cum iustitia viuamus.
 Solius eius mater sicut virgo fuit ante con-
 ceptum, sic virgo permansit inuiolata post
 partum: quia nec libidinem sensit, cum
 Dominum conciperet in vtero factum mi-
 rabiliter hominem, nec aliquam corru-
 ptionem, dum in vera nostri generis car-
 ne pareret humani generis redemptorem.
 Dominus namque verus veram ex virgine
 suscipiens carnem, perfectionem ex ea hu-
 mani corporis sumpsit, virginitatis ei gratiā
 non ademit. Neque enim decebat, vt inte-
 gritatem virginitatis creator humanę carni
 Dominus in conditione tribueret, & idem
 carnis humanæ susceptor Dominus, quod

fecerat redempturus, virginitatē carni de qua nascebatur auferret. Ipse est secundus homo de cœlo. qui non ideo de cœlo dicitur, quia inde secū voluit deponere substantiam sui corporis: sed quia nihil in se terrenę cupiditatis forma serui habere potuit, quam in vnitate personæ Dominus creator cœli terræque suscepit. Non ergo cœleste corpus ad terram deposuit, sed ad cœlum Dominus in se naturam veram terreni corporis eleuauit. Hanc terreni corporis veritatem de terreno corpore matris accipiens, in carne sua nostra peccata portauit, cum non haberet vllam vel originis vel operis culpam. Dicit enim Isaïas, quia *peccata nostra ipse portauit.* *Esai. 53.* Vt ergo in hominibus quoque, vbi abundauit peccatum, superabundaret gratia, non solum illud peccatum diluit, quo terrenus homo vniuersitatem suę propaginis inquinauit: sed etiam huius gratia credenti dimittitur, quicquid illi originali peccato additum voluntariis hominum motibus vel operib. inuenitur. Hoc utique docet beatus Apostolus dicens: *Nam iudicium ex vno in condemnationē,* *Rom. 5.* *gratia autem ex multis delictis in iustificationem.* Hęc est gratia Dei, quę nos liberat per Iesum Christum Dominum nostrum, cuius

gratiæ opus liberator ipse nobis insinuans,
Joan. 8. ita loquitur: *Si vos filius liberauerit, Verè liberi*
Luc. 19. *eritis: & alio loco, Venit enim filius hominis*
querere & saluum facere quod perierat. Hæc
 Dei gratia qua saluamur, non alicui præce-
 denti bono merito datur: nec tamen nisi
 præcedenti malo merito denegatur. Pri-
 mus enim homo peccati sui merita trans-
 misit in omnes, quorum caro est de pecca-
 ti lege concepta. Propter hoc in paruulis
 cùm nullum sit ex propria voluntate pec-
 catum, inest tamen filiis iræ carnaliter ge-
 nitis macula parentalis. quæ quidem bene
 dispositum diuinæ creationis non pertu-
 bat ordinem: sed nāuo paternæ transgres-
 sionis infligit tetram nascentibus fœdita-
 tem. Ab illa igitur massa damnata nemo
 futurorum præscientia operum discerni-
 tur: sed miserantis figuli ope atque opere
 segregatur. Propterea vasa misericordiæ,
 quæ de eadem massa gratis in honorem fi-
 unt, à vasis iræ in contumeliam factis gra-
 tuitæ iustificationis munere secernuntur.
 Ad ostendendam autem gratiam, quæ gra-
 tis iustificat peccatores, Apostolica prædi-
 catio non vasa iustitiæ, sed vasa misericor-
 diæ nuncupat, Beato Paulo dicente. *Quòd*
Rom. 9. *si volens Dominus ostendere iram, & notam fa-*

cere potentiam suam, sustinuit in multa patientia vasa iræ aptata in interitum: ut ostenderet diuitias gloriæ suæ in vasis misericordiæ, quæ præparauit in gloriam. Ista misericordia neminem reperit dignum, sed omnes indignos inuenit, & ex ipsis, quos voluerit dignos facit. Hac misericordiæ præuentus Iacob, non secundum meritum præteriti seu futuri cuiusquam humani operis, sed secundum propositum Dei prædestinantis priusquam nasceretur electus est. Dicit enim Apostolus, *Quia dum nondum nati essent, aut aliquid egissent boni aut mali, ut secundum electionem propositum Dei maneret, non ex operibus, sed ex* Ibid.
vocante dictum est Rebeckæ quia maior seruiet minori. Ut ergo minor frater maiori præferretur à Domino, neque præteriti fuit cuiusquam meritum, neque futuri operis: quando quidem ex vno legitimo, iustoque concubitu reatus conceptorum manebat æqualis. Gratia igitur hoc fecit bonitatis diuinæ: quæ nunquam sic data est, ut aliqua in homine bona merita reperiret, sed ut non habentibus ipsa conferret. Si enim cessante gratia per solam operum præscientiam humanorum in paruulis illis vnus eligendi & alterius reprobandi fuisset facta discretio, nunquam dixisset Apostolus,

Quia non ex operibus, sed ex vocante dictum est ei, quia maior seruiet minori. Ex operibus enim sine dubio Apostolus dixisset, si futurorum saltem ibi humanorum operum bona merita cognouisset. Sed quoniam in utroque sola damnationis inesse merita sciuit, electionis causam soli proposito diuinę bonitatis attribuit. Quocirca ex duobus istis fratribus, quos ex vno concubitu Isaac patris nostri vnus in semine conceptus accepit, vnus in lucem partus effudit, sola quem voluit à massa damnationis misericordia diuina discreuit: cui patrocinata est gratuitorum prædestinatio munerum, non futurorum præscientia meritorum. Sic enim secundum electionem propositum mansit, vt ex proposito Dei gratuita foret electio. Voluntas enim causa est electionis, non electio causa est voluntatis. Sic autem fuit in electo gratis misericors Dominus, vt in reiecto non esset iniustus. Vnum enim gratis assumpsit, alterum iuste deseruit. Vniuersę quippe vię Domini misericordia & veritas. Bonitas ergo gratis miserantis Dei, & seueritas iuste iudicantis fecit, vt nec ambo acciperent gratuitum misericordię donum, neque vnum simul sortirentur interitum, cum originaliter

De veritate prædestinationis. 27

causa vna fuisset amborum. Propter hoc etiam per Prophetam, priusquam diceretur, *Iacob dilexi, Esaii autem odio habui*, non operis alicuius præteriti vel futuri, sed solius propheticus sermo præmisit generis mentionem: ita Malachia loquente, *Nonne Malac. x frater erat Iacob Esaii: & Iacob dilexi, Esaii autem odio habui*, dicit Dominus. Cur igitur hîc non aliqua operum diuersitas, sed sola nascentium fraternitas intimatur, cum magis & illius qui dilectus est, bona opera, & illius mala, qui odio habitus est, commemorari debuerint: vt nec in illo, qui dilectus est, personalis acceptio, nec in eo, qui reprobatus est, iniusta condemnatio putaretur? Fraternitas enim nullam in se operû diuersitatem significat, qua vnum ab altero meritorum comparatione discernat. Non ob aliud ergo, absque commemoratione operum ex duobus geminis fratribus vnû se dilexisse, alterum odio habuisse Deus ostendit, nisi vt agnosceremus, per conceptionis, natiuitatisque consortium, quo constabat amborum fraternitas, pari merito vtrumque in illa massa damnationis obstrictum: à qua misericors bonitas sic vnum gratis discerneret, vt alterum ibi nõ iniustè seueritas iusta relinqueret. Iniusta

verò paruuli cuiusquam causa damnationis existeret, si propago mortalis nullam peccati contagionem ex paterna radice sumpfisset. Scriptura verò diuinitus inspirata testatur, quòd à sorde non solum nemo mundus esse possit hominum, si vnus diei sit vita eius super terram: sed ipse quoque generis humani legitimus, nuptialisque conceptus non sit à culpa iniquitatis extraneus. Sanè hîc nullus calumniam veritati putet aliquatenus opponendam. Nos enim sanctorum patrum sequentes, Domino adiuuante, doctrinam, originalis peccati maculam in conceptu esse dicimus paruulorû, non in concubitu legitimo nuptiarû, quarum bonum ab initio generis humani diuinitus nouimus institutum. Propter hoc &

Hebr. 13

Apostolica doctrina honorabile connubiû in omnibus, & thorum immaculatum sine dubitatione commendat. Cùm igitur nuptiæ laudabiliter à Domino sibi tributam possideant in fide & caritate prolem mundam, tamen edunt peccato primi hominis inquinatam. De nuptiis ergo bonis vsque adeo bonum est quòd homo nascitur, vt malum non sit etiam si de adulterio vel de fornicatione nascatur. Deus enim humanæ naturæ foecunditatis donum contulit:

libidinis verò malum non est creatura Dei, sed pœna peccati. Proinde de immunditia nuptiarum mundus homo non nascitur, quia interueniente libidine seminatur. Quam libidinem nuptialis honestas vtique non amat, sed in nuptiis mortalis propagationis necessitas tolerat. Ipsa conceptos polluit, etiam si generantes fideles ad illicitæ commixtionis effectû trahere ac præcipitare non possit. Ob hoc sanctus Dauid, legitimo fidelique connubio natus, non sine graui dolore maculam carnalis generationis ita deplorat, *Ecce enim in iniquitatibus conceptus sum, & in peccatis mater mea in utero me aluit.* Quæ cum ita se habeant, fieri non potest, vt quisquis in iniquitatibus concipitur, sine iniquitatis obligatione nascatur. Ab hac vt absolueretur Iacob, Esau reprobato, nulla fuerunt merita hominis, sed diuinæ gratia bonitatis. Circumcisi sunt quidem ambo in corpore circûcisione visibili, quæ in signaculum iustitiæ fidei priore tēpore patrib. nostris est diuinitus attributa. Circumcisionem verò cordis, quæ est in spiritu, non litera, cuius laus nō ex hominibus, sed ex Deo est, solus Iacob à Deo gratis iustificatus accepit: Esau verò quanquam fuerit & ipse in carne circumciscus, non est

Psal. 50.

tamen diuinæ dilectionis & electionis dono à massa perditionis exceptus. In quo quidem circumcisio carnalis fuit: sed idcirco non profuit, quia eum à prudentia carnis, quæ inimica est Deo, nullatenus circumcisio spiritalis exemit. In Esau igitur ante sæcula odio Dominus habuit mansuram hominis terreni nequitiam, & eum iustè deputauit ad pœnam. In eius verò fratre non aliqua bona opera, quæ essent futura ex homine, præsciuit, vt eum eligeret atque diligeret: sed ei ante sæcula iustificationis gratiam præparauit: per quam illi nō solum bonæ voluntatis initium, sed etiam bonæ operationis largiretur effectum. nec in eo bona merita reperit, sed eum misericordix gratuito beneficio liberauit. Moysi enim dicit, *Miserebor cui miserebor, & misericordiam præstabo, cui miserebor. Igitur non volentis, neque currentis, sed miserentis est Dei.* Gratis igitur gratiam suam tribuit Dominus nato, quia gratis eam præparauerat nascituro. Bonis enim, quicquid boni habent, in voluntate vel opere, Dominus tribuit, qui etiam tributa custodit. Iniquis verò & impiis, nec præparare Dominus potuit aliquando, nec dare mala opera, quibus, damnabiliter seruirent: neque malas

eis voluntates inferuit, quib. iniusta quæq. culpabiliter veliēt: sed præparavit eis ignis æterni pœnam, vt vitricem sentiāt in æterna combustionē iustitiam. Mala ergo voluntas non est ex Deo: & ideo eam iustus iudex in hominib. punit; quia nō in ea creator bonus ordinē suæ creationis agnoscit: & perseverantia iniquitatis, atque contumacia superbæ cervicis, quia non ex largitate Dei habetur, idcirco Domino ultore damnatur. Eis autem, quos Dominus regni sui facit hæredes, gratis bonam voluntatem præparat, gratis donat: quibus etiā perseverantiam subministrat. Gratis quippe præparavit misericorditer tribuenda merita munerum, quibus iustè retribuat munera meritorum. Figuram porrò duorum populorum dubium non est in illis duobus præcessisse germanis; vnus scilicet saluandi, alteriusque damnandi. Neq. tamen isti populo sic salus est pro operibus reddita, sicut est alteri pro operibus condemnatio retributa. Sed vnus, quod non merebatur, accepit gratiæ salutis donū: alter secundum meritum recepit iustæ cōdemnationis interitum. In vno merita sunt damnationis inuenta, alteri verò merita glorificationis gratuita sunt iustificatione

collata. Ille vnde displiceret in se habuit: iste autem, vnde Domino placeret, ab ipso, cui esset placiturus, accepit. In omnibus igitur, qui gehennali traduntur incendio, inuenit iusta seueritas, quod puniat eorū malum, in quibusdam originaliter tractum, in quibusdam etiam vitio propriæ voluntatis adiectum. Exceptis enim paruulis, quibus ad eligendam iustitiam, fugiendumque peccatum, necdum potest esse liberū voluntatis arbitrium, quia in ætate tenera torpet ratio consopita; cæteri, qui ratione uti possunt, adiecto reatu propriæ voluntatis, aut ad fidem non accedunt, aut à fide discedunt. Vt autem fiat quis iustus ex impio, amicus Dei ex inimico, absolutus ex reo, quamcumque agat corporis ætatem, ab ipso natiuitatis exortu vsque ad decrepitam senectutem, nemo iustificatione inuenitur dignus, sed gratuita bonitate iustificatur indignus: nec de potestate tenebrarum eripitur, & in regnum filij dilectionis Dei transfertur, nisi quem Dominus gratuito gloriæ dignatus fuerit munere præuenire, qui gratis saluat, & iustè cōdemnat. Misericors Dominus & iustus voluntatem prauam, quam non misericorditer corrigit, iustè punit, quia prauitatem in
ea

ea inuenit, quam ipse non fecit. Bonam verò voluntatem ipse gratis præparat, gratis donat; ipse adiuvat, ipse consummat. Certissime itaque teneamus, omnes homines per semetipsos non solum perfectionem, sed nec initium iustitiæ posse contingere: sed vniuersos qui fiunt boni, diuina iustificatione præueniri; & vt accepta bona voluntate non decident, opitulatione Dei profectum eis & perseuerantiam tribui. nec aliquibus hominum meritis, præteritis aut futuris, gratiam dari: sed ipsius gratiæ dono atque auxilio vniuersa hominum bona merita & inchoari & perfici. Iniquos verò, qui in sua iniquitate iusto Dei iudicio relinquuntur, etiam si perceptione sacramenti carere dicantur peccati originalis reatu, subsequen- tium tamen, id est, priorum merito peccatorum ad ignis æterni deuolui supplicium. Deus enim misericors & iustus humanæ originis voluntatisque peccata, siue in paruulis, siue in grandibus hominibus, quæ misericorditer non diluit, iustè punit: quia ipse est Dominus bonus & verus, qui hominem fecit, sed peccatum in homine non creauit: quique merita & opera in omnibus hominibus numquam inuenit bona, pro quibus eos

C

saluet; sed ipse in eis & voluntates & opera mutat, quando eos gratuita miseratione iustificat. Qui præscientiæ suæ certa & incommutabili firmitate in vasis misericordiæ non nisi gratiæ suæ præsciuit donum, quod à se nouerat tam in meritis munerū quàm in meritorum muneribus largiendū. Ipse enim & gratuitam voluntati humanæ bonitatem donat, & bonam voluntatem in operibus adiuuat. ipse etiam in vasis iræ illa præsciuit malitiæ humanæ opera, quæ essent in effectu proculdubio sequutura. Secundum rectam itaque fidem, ac perspicuam veritatem, quod attinet ad paruulum, qui sine beneficio secundæ natiuitatis huic vitæ subtrahitur, sicut præscisse fatendum est Dominum paruuli futuram mortem, quæ verè futura erat; sic absurdè dicitur, Dominum præscisse paruuli futura peccata, quæ futura non erant. Neque enim Dominus rerum omnium conditor facienda præscisset, quæ facienda non essent. Scimus namque præscientiam Dei sic esse veram atque incommutabilem, vt quæ futura præscit, verè futura sint, nec aliquid faciendum præsciat, quod non secundum præscientiam eius fiat. Futura verò sola in se creaturæ mutabilitas recipit, quæ in creatoris in-

commutabilitatem nullatenus cadit. Propterea Deo nihil est præteritum vel futurum, cui sic omnia præsentia sunt, quæ facienda præscit, ut postquam facta fuerint, præterita ei esse non possint: quoniam sicut nouit præterita, sic nouit & futura. Quæcunque enim cum tempore mutantur & transseunt, in eius cognitione sine temporis transitu ac mutabilitate consistunt. Rerum autem non earum quæ futuræ non sunt, sed quæ faciendæ sunt, præscientiam Deo inesse, liber Danielis Prophetæ testatur his verbis, *Dominus qui occultorū es cognitor, qui* Dan. 13. *scis omnia, antequam fiant.* Dominus ergo scit in æterna præcognitione quod futurū est, ut fiat in opere. Absurdè itaque dicitur, quòd præscierit paruulum, si viueret, impium futurum; quem profectò non plus quàm vixit, præsciuit esse futurum: quem utique præsciuit ad ætatem, qua impiè viueret, non esse venturum, quia cum in ætate infantili de sæculo veraciter nouerat auferendum. Et in quo nulla peccatrix præcognita est ætas, vnde fieri potuit, ut ætatis, quæ futura non erat, præsciretur iniquitas: cum ætas renati paruuli sine actu omnino peccati esse possit: actus autem humani peccati sine qualibet ætate non

possit? Futuræ enim ætatis nō absurdè præscita dicuntur opera vel bona vel mala. absurdè autem præscientia cuiusquam humani operis in ætate asseritur, in qua futurus homo ipse non esse monstratur. Sicut autem non nisi concipiendorum exordia, ita non nisi victurorum hominum actualia rectè dicimus Dominum præscisse peccata. Illius igitur præscius operum rectè dicitur Deus, quorum in consummatione non negatur subsequutus effectus. Ceterum quisquis dominum præscium putat futurorum operum, quæ tamen futura non fuerant, restat ut præscientiæ Dei, quam utique non negat veracem, aliquam inesse, quod absit, æstimet falsitatem. Falsum est enim futurum esse aliquid, quod præsens non erit. Dei autem scientia nihil in se potest habere falsi, quia falsitas inesse veritati non potest. Præscientia igitur veritatis, quæ in se non recipit falsitatem, sicut faciendū præscit, quod faciendum est, ita non faciendum, quod faciendum non est. Non ergo deus in paruulo peccata vlla præscivit, quæ priusquam moreretur paruulus non admisit. Si enim facienda præscisset, utique fierent. Neque enim futura sciret, quæ non facienda præsciret. Proinde fa-

tendum est, quia sicut paruulus mortuus est, ita eum deus moriturum esse præsciuit, Dei enim præscientia nullatenus fallitur: quia sicut faciendum præsciuit mundum, & sic eum fecit, quemadmodum faciendum esse præsciuit. sicut in ipso quoque mundo singula, quæ facta sunt, vel fiunt, vel facienda sunt, ita semper facienda fuerunt in Dei præscientia, quemadmodum sunt in opere consequuta, vel etiam sequutura. Non ergo Deus præsciuit faciendum à quolibet homine, quod facturus homo non fuit: sicut nec eius præscientiam aliquid latuit eorum, quæ homines vel fecerunt, vel faciunt, vel aliquando facturi sunt. Deus enim verus ea in operibus hominum præscire rectè dicitur, quæ & rebus & personis & temporibus inchoantur. vbi autem vel res, vel persona, vel tempus non ostenditur, nullum utique opus est, quod præscitum diuinitus asferatur. Non autem congruit veritati, vt in præscientia Dei dicatur esse futurum aliquid, quod in tantum nihil esse conuincitur, vt ex futuro præses nullatenus fore vel fuisse monstretur: cùm utiq. ipsum futuri nullatenus possit habere vocabulum, quod præsentis appellatione non sit quandoque

censendum. A paruulo ergo qui nihil fecit, nihil faciendum Dominus esse præsciuit. Cur autem non ab eo abstulerit originale peccatum, nos quidem scire non possumus: hoc tamen eum iuste fecisse, nullatenus dubitare debemus. Licet enim non solum ex nihilo creatis, sed etiam peccati gerentibus maculam, quam mortaliter uiuentibus Dei filiis sicut gratia subinde diluit, ita frequenter infirmitas parit, incomprehensibilis consilij Dei clausa sit altitudo: illud tamen nobis manifestum est, quia in Deo vlla iniquitas non est. De ipso enim
Deut. 32 scriptum est, *Deus fidelis, in quo non est iniquitas, iustus & sanctus Dominus Deus*: Et alio loco, *Iudicia Dei vera, iustificata in semetipsa*. A quorum iudiciorum occultam profunditatem, (quia iudicia Dei abyssus multa) credimus etiam parentum, siue quorumlibet hominum negligentiam pertinere. Sicut etiam pro paruulo, qui ad baptismum peruenit, parentum curam non dubitamus ad diuinæ gratiæ munera referendam. Et si quidem parentes non fuerint pietate ac bona conuersatione præditi, Dominus, qui malis quoque bene utitur uoluntatibus hominum, per malorum parentum sollicitudinem beneficium gratiæ suæ operatur in

paruulo. Si verò parentes boni sint, non solum paruulo bona voluntas parentum proficit, sed ipsis quoque parentibus in se credentibus gratiam bonæ voluntatis ipse largitur, ut pro paruulo piam sollicitudinem gerant, donec ad sanctæ regenerationis remedium vitale perueniat. Quorum tamen nec cursus potest, nec ipsa bonæ voluntatis sollicitudo pia sufficere: nisi eum dignetur Dominus suæ miserationis gratuito munere præuenire. Equidem bona voluntas, quæ à Domino pro paruuli regeneratione parentibus inspiratur, eos instigat ut currant, quatenus paruulus ad ablutionem salutaris aquæ perueniat. Verumtamen illius regenerationis effectus non cuiusquam hominis volentis neque currentis, sed miserationis est Dei, qui & voluntatem parentum excitat, & volentibus adiutorium donat. Qui opportunitatem quoque prædicandi Philippo dedit, quando spadonis animum ad legendum Isaiam misericorditer excitauit. Ipse etiam locum tribuit, qui eos ad stagnum gratuita bonitate perduxit. Ipse in spadone opus gratiæ salutaris perfecit, quo illuminante idem spado Christum esse filium Dei credidit, & ad stagnum veniens sacre tinctionis effectum poposcit: nec baptiza-

tus tantum, sed & Spiritu sancto repletus abcessit. Quis etiam Cornelium centurionem misso Angelo, ut Apostolum Petrum accersiret, admonuit, nisi qui eidem centurioni gratis donum sui timoris, ac bonæ operationis infudit? Ut enim Dominus orationum eius & eleemosynarum memoriam haberet, ipsius Cornelii prius meminuit, non in eius quolibet opere bono, sed in beneplacito suo, ut ei donum sui timoris infunderet, quo ei & eleemosynarum studium, & sanctæ orationis inspiraret affectum. Ipse igitur ei placendi gratiâ contulit, qui in eo, quod coram se placeret, inuenit. Ipse est enim de quo Apostolus di-

Hebr. 13. cit, *Deus autem qui eduxit de mortuis pastorem magnum ovium in sanguine testamenti æterni, Dominum nostrum Iesum Christum, aptet vos in omni bono, ut faciatis voluntatem eius, faciens in vobis, quod placeat coram se.* In tantum autem diuinæ gratiæ fuit, quod Cornelius admonitus est, ut ad se Petrum accersiret, ut etiâ ipsi Petro Spiritus sanctus venientibus ad eum, quos Cornelius miserat, non solum, ut cum eis iret præciperet, quin etiam formidinem totius dubitationis auferens à se illos missos fuisse firmaret. Denique sic eidem *Act. 10.* Petro à Spiritu sancto dictum est; *Ecce viri*

De veritate prædestinationis. 41

tres quærunt te. Surge itaque, descende, & vade cum eis; nihil dubitans: quia ego misi illos. Apo- Act. 16.
stolos quoq. volentes ire in Bithyniam atq. Asiam vetitos à Spiritu sancto legimus. Et postquam Saulum dominus sua voce pro- Act. 9.
stravit, ipse ad eundem baptizandum Ananiam visitavit, & misit. Paulus etiam Corinthiis scribens euidenter affirmat, sollicitudinem sanctam Tito discipulo suo, qua pro illis satageret, diuinitus inspiratam. Sic enim dicit: *Gratias autem Domino, qui dedit 2. Cor. 8.*
eandem sollicitudinem pro vobis in corde Titi. Cum ergo scripturarum attestatione sanctarum manifestum sit, quòd dominus, cuius voluntati nemo resistit, cuius dispositionem nemo mutat, cuius iudicia nemo comprehendit, secundum abundantes diuitias gratiæ suæ, quas habet in bonitate super omnes, quos de massa damnata faciens vasa misericordiæ in honorem, gloriamque discernit, hominibus quoque ratione utentibus congruas ad salutem personas aut procuret aut deneget, in aliis scilicet iustitiam tenens, aliis misericordiam tribuens: cur non etiam in baptizandis infantibus certissime credamus, ac libere proclamemus diligentiam parentum ad gratiam redimentis, negligentiam verò ad iudicantis dei iu-

stitiam pertinere? Non quia ex Domino est boni operis negligentia, à quo nulla unquam potuit esse mali operis causa: sed quia bona voluntas, quæ à Domino tribuitur, quantum in caritate profuit, tanto maiorem pro salute cuiuslibet animæ sollicitudinem gerit. Mala verò voluntas, quæ suo merito gratiam caritatis aut non accipit, aut amittit, torporem negligentiae non deponit, & dum in suis tenebris derelinquitur, magis ac magis cœcatur. Deo igitur in hominibus misericorditer operante, providente etiam adiutoria personarum atque opportunitatum, & ipsa facultas operis tunc invenitur ad baptizandum parvulum, quando in eo Dominus statuit opus sanctæ ablutionis implendum. Deus enim, qui parvulum non volentem, neque currentem, fidei nescium, suæque salutis atque utilitatis ignarum, in quo nulla regenerationis petitio, nulla fidei potest inesse confessio, gratuita sacramenti virtute mundat, ipse pro redemptione parvuli animos parentum siue quorumlibet fidelium voluntates excitat, ut etiam illis cum timore & tremore salutem suam operantibus, proficiat ad bonæ retributionis mercedem, per quorum piâ curam infans perducitur ad salutem. Si e-

nim mercedem suam non perdet, qui calicem aquæ frigide vni ex minimis Christi in nomine discipuli dederit, quo sola caro pascitur, quomodo mercedem non habebit, qui pia sollicitudine currit ac satagit, ut caro infantis, animaque saluetur? Quocirca etiam hæc bona voluntas diuinitus dari credenda est parentibus piis, qua fructum suæ carnis, quem carnaliter editum nouerant, originalis peccati contagione pollutum, non negligent spiritali regeneratione mundandum: neque tantum cupiant habere temporaliter heredem, quantum desiderent & vigilanter satagant Christi secum fieri cohæredem: & quem habent ex femine filium mortaliter transiturum, ex aqua & Spiritu sancto renatum fratrem habeant sub Deo patre perpetuum. Veruntamen hanc laudabilem voluntatem illis proculdubio parentibus Deus tribuit, quibus per Spiritum sanctum gratiam sanctæ caritatis infudit. Ipse quoque ad vitam æternam perueniunt, non quia in corpore mortis huius morituros filios gignunt, sed quia in Dei timore viuentes, cum eis ad secundæ natiuitatis beneficium festinare non negligunt, & donec in eis opere cõpleatur, Christiana dilectione parturiunt, quos humana foccũ-

ditate pepererunt. Quos etiam baptizatos
disfluere per flagitia , facinoraeque non si-
nunt: sed eos secundum Apostoli præce-
ptum in disciplina & correptione Domini
nutrire atque educare contendunt: magis
eos volentes esse placitos Domino , quàm
diuites aut claros esse in sæculo. Vsq̃ue
adeò verò manifestum est gratiam baptis-
mi debere filiis à parentibus celeriter affer-
ri, vt hoc non solum boni fideles solliciti
facere soleant, sed etiam illi, qui ad filiorũ
Dei non pertinent numerum: qui scilicet
cũ fidelium censeantur nomine, negare
conuincuntur operibus fidem, dum ea ge-
runt quæ fidei conuenire non possunt. Nā
vt de aliis taceam, nonne vīdemus mulier-
culas quasdam filios suos nō de connubio,
sed de fornicatione susceptos, sollicitè ad
baptismatis gratiam portare, multum-
que tueri, ne qui de illis carnaliter nati
sunt, spiritali natiuitate priuentur? Ita cum
iis quos inuitæ plerumque concipiunt at-
que pariunt, volentes ad Ecclesiam tre-
mentesque concurrunt; & cū peccatum
fornicationis suæ negligant, ita in iniquita-
tibus suis remanent, vt tamen filios suos
absolui vinculis peccati originalis exoptēt.
Sic dominus bonus parentum bonorum

piam voluntatem non solum paruulis, verum etiam ipsis parentibus facit ad effectum gratiæ proficere: iniquorum verò parentum sollicitudinem facit commodis filiorum, quibus confert gratiam, militare. quia etiam illi, qui in se beneficium baptismatis operibus malis euacuant, quid conferat baptismatis gratia, non ignorant: & cum in carne sua mortiferæ cedant libidini, in fructu tamen carnis suæ magis cedunt agnitæ veritati. Si verò aliqui paruulorum parentes Christiani (quod interim, quia multum à religione abhorret, durum est credere) Christianæ caritatis, & suæ non minus quàm filiorum salutis obliti, curam regenerandorum non habent paruulorum: non nostram, sed Apostoli super hoc scelere sententiam audiant, & vtinam contremiscant, dicentis, *Si quis autem suorum & i. Tim. 5*
maximè domesticorum curam non habet, fidem negauit, & est infideli deterior. Sicut autem nullus habet ex Deo, vt neget fidem: sic etiam negligentiam cuiuslibet operis boni nemo diuinæ imputare permittitur voluntati. Sicut autem ad opus diuinæ gratiæ pertinet, quòd parentes pro regeneratione filiorum piam sollicitudinem gerunt: ita illud quoque diuini iudicij est, quod Deus

malas deserit voluntates, cùm parentes filiorum corporalem ita salutem diligunt, vt animarum in eis negligant sospitatem: curamque gerunt, vt morituri uiuant, nec metuunt si filij eorum cum reatu sempiternæ damnationis intereant: vbi maximam culpam contrahunt, & crudelissimi parricidæ spiritualiter fiunt. Diabolicis enim lucris ipso neglectus sui torpore militant, & placentes hosti nequissimo, regem bonum malis operibus exacerbant. Deum igitur, cuius vniuersæ viæ misericordia & veritas, sicut humiliter laudare debemus, cùm gratiam donat; sic nemo iustè potest accusare, cùm denegat. Ea quippe est bonitas eius atque iustitia, vt gratuita miseratione redimi possit, quemcumque voluerit: voluntati enim eius quis resistit? Iniustè verò damnare quempiam nec velit aliquando, nec possit; quia rectus est Dominus Deus noster, & non est iniquitas in eo, & iniquitas nostra iustitiam Dei commendat, nec est iniquus Dominus, qui infert irâ. Quisquis igitur gratiæ diuinæ mirabilem vult atque incomprehensibilem cõsiderare virtutem, illud potius humili, pióque corde consideret, quomodo plerumque parentes pij, fideles, & impigri, atque solliciti, cum

paruulis suis ad baptismum velociter currant; & inter manus festinantium paruuli sine baptismo moriantur. Consideremus ergo duos paruulos sine baptismo mortuos, vnum quem noxia parentum neglexit incuria, alterum cui parentum quidem pia sollicitudo non defuit, sed mortis velocitate prærepro prodesse nequiuit. qui scilicet inter manus portantium, quibus ad baptismum gestabatur, priusquam perueniret ad futuræ vitæ beneficium, præsentem incurrit occasum, & ante caruit vita, quàm macula; priusque raptus est ad peccatam, quàm perduceretur ad gratiam. Si de his duobus vni dicitur parentum negligentia nocuisse, dicatur cur alteri negatus est salutis effectus, cui nec voluntas potuerit parentum prodesse, nec cursus. An etià huic à Deo dicitur fuisse consultum, vt qui præuidebatur futurus impius, beneficio putetur lamentandæ mortis adiutus? Quis hoc dicat, quisue non videat, quod talis obitus non damnationi morientem paruulum præripuit, sed saluti? cui non est vtique leuigata damnatio, sed redemptio denegata: nec consultum est, vt minus torqueretur: sed raptus est, ne liberaretur. Nonne hic & pia parentum voluntas atq.

curfus ex Domino fuit? fed ideo non profuit, quia vt paruulus baptizaretur, ex Deo non fuit, qui profundo iuftoq. iudicio illis quidem pro filio religiofum infudit affectum, fed paruulo vitale noluit largiri remedium. Nam & ſancto Dauid ipſe donū caritatis infudit, vt Abſalon filio parcendū præciperet, ne in ſua impietate moreretur: ſed ex Deo non fuit, vt Abſalon impius futuræ pœnitentię ſeruaretur. Exhibuit ergo, quod debuit hominis ſancti voluntas pia; ſed operata eſt, quod oportere nouerat diuina iuſtitia. Illud etiam ſi quis pia mente conſideret, nonne ſicut diuinę miſericordiæ ſuauitate mulcetur, ita diuini iudicij profunditate terrebitur? Nonnunquam enim & paruulus fidelibus naſcitur, & illis, ſicut iam diximus, pro redemptione filij pia fide caritateq. ſollicitis antè moritur quàm ſacro baptiſmate diluatur. Alter verò de infidelibus natus, cuius ſalutem parentes non ſaltem tepidè volunt, ſed omnino non volunt, idem tamen paruulus ſupernæ diſpenſationis ordine parentibus aut violentè aufertur, aut furto ſubripitur, & ad ſanctum baptiſma quorumlibet fidelium pia caritate perducitur, & mox vt baptizatus fuerit, de hac vita diſcedit. Si paruulo-
rum

rum istorum originalis attendatur causa, ambo æqualiter sunt iræ filij, quia vno simul originalis peccati nexu tenentur obstricti. Vbi autem duorum prorsus æqualis est causa, non vtique possunt merita pronuciari disparia. Nulla igitur est causæ diuersitas in infantibus, quæ faciat vnum eligi, alterum reprobari. Si vero parentum consideretur voluntas, illi qui Christiani sunt vt eorum filius baptizaretur sollicitè voluerunt, instantissimè curauerunt, quorum tamen filius antequam baptizaretur, morte præuentus æternis est ignibus deputatus: ille verò, qui de infidelibus natus est, contra voluntatem parentum perductus ad gratiam baptismi, factus est hæres Dei, & cohæres Christi. Quid in his præuidit Dominus futurum, vt vni nihil conferre posset caritas parentalis, & alteri multum crudelitas prodesset hostilis? Quis istam profunditatem iudiciorum Dei penetrare valeat? Quis nõ tamen hinc & misericordiam gratuite bonitatis, & iustitiam diuinæ seueritatis agnoscat? Vbi enim duorum paruulorum, nec in actibus aliqua sunt merita, nec in origine dissimilis causa, manifestum quidem nobis est, quòd ambo fuerint originalis peccati vinculis obligati, occultum verò, cur non

ambo fuerint absoluti. Sciamus igitur imperscrutabile nobis esse, cur vno derelicto, alterum Deus ab illa perditionis massa gratis eripiat. Certissime tamē scire debemus, quia miserator & misericors Dominus, patiens & multum misericors, & verax, sic ei quem liberat misericordiam donat, ut apud eum quem damnat, iustitiam & veritatem nulla ratione prætereat. Absolutus igitur accepit gratiam, quam semper laudet: damnatus verò inuenit iustitiam, in qua non habet quod accuset, ut omne os obstruatur, & subditus fiat omnis mūdus Deo, quando vnus in bonis suis præcedentem Dei agnoscit gratiam, alter in damnatione sua non falsam futurorum, quæ non erat facturus, operum præscientiam, sed veram primi parentis inuenit culpam. Diceret aliquis, cur non ambobus largitus est Dominus gratuitam misericordiam, cum vnus ambos reatus obstrinxerit? Cui, salua incomprehensibili altitudine iudiciorum Dei, respondemus, ideo non vtrumque liberatum, vel vtrumque damnatum, quia Dominus, qui malum nec velle potest aliquando, nec facere, ab vno iusta seueritate debitum præcepit exigere, alteri verò gratuita iussit bonitate dimitti. In duobus enim

pariter impiis, quorum vnus absoluitur, alter damnatur, in absoluto cognoscitur gratuita benignitas Dei, quæ potest absque meritis vllis operum, gratis omne relaxare peccatum: in eo verò, qui damnatus est, apparet iustitia Dei, cui nullum potest aliquando placere peccatum. Nec misericors ergo absolutio culpabilis potest esse, nec iniusta punitio. Absoluit reum bonitas, quæ nulla malignitate vincitur: punit reum æquitas, quæ nullis iniquitatibus delectatur. Deus, ergo, cùm saluat homines, gratiam tribuit suis operibus bonis: & cùm punit pro iniquitatibus peccatores, iustitiam retribuit humanis operibus malis: in illis vtique reparans quod facti sunt; sed in istis iudicans, quod fecerint. Omnes enim peccauerunt, & egent gloria Dei. Quia & ij qui non peccauerunt proprietate operum, originale trahunt ex primi hominis transgressionem peccatum. Voluntatis autem diuinæ secretum, quo vnum impium iustificat, alterũq. condemnat, non ideo æstimemus iniustum, quia nobis videmus absconditũ: sed ideo diuinum iustumque nemo esse dubitet, quia hoc hominum quisquam inuestigare non valet. Proinde cordis humilitatem simpliciter exhibentes, miseri-

cordiam & iudicium Domino cum Propheta cantemus: intentionem nostrę scrutationis eatenus temperantes, vt discutere non velimus, quod comprehendere non valemus. Admonet enim nos sancta scriptura dicens, *Altiora te ne quasieris, & fortiora te ne scrutatus fueris: sed quę precepit tibi Dominus, illa cogita semper, & in plurimis operibus eius ne sis curiosus.* Reuera enim frustra labor superflue scrutationis impenditur, vbi nulla inuentionis copia suffragatur: & noxia curiositas in reatum protinus labitur, quando modum suum humana infirmitas non metitur. Quin potius in hoc profundissimo diuinę voluntatis arcano nihil aliud nostrę saluti congruere nouerimus, nisi vt cum Dauid vnusquisque nostrum humiliter dicat: *Mirabilis facta est scientia tua ex me, confortata est, nec potero ad eam.* Cum beato quoque Paulo religiosi clamoris iungamus effectum, qui ait, *O altitudo diuitiarum sapientię & scientię Dei! quàm incomprehensibilia sunt iudicia eius, & inuestigabiles vię eius? Quis enim cognouit sensum Domini, aut quis consiliarius eius fuit?* In quo loco conuenienter beatus Paulus, priusquam incomprehensibilia Dei iudicia diceret, altitudinem sapientię eius, scien-

Ecclesi. 3.

Psal. 138

Rom. II.

tiaque præmisit. Quibus utique verbis omnem querelam, iustoque Dei iudicio aliquatenus obnitentem humanæ vocis temeritatem obstruxit. Certum enim est, ad personam atque officium iudicis pertinere, ut & in cognoscenda causa scientiam non negligat, & in iudicando rectam sapientiæ tramitem non relinquat. ne quando vel aduersus incognitam veritatem conuincatur ignarus temere iudiciû ferre, vel agnitam deprehendatur insipienti peruersitate comprimere. Deus igitur nec inscius est, ut temerè iudicet; nec insipiens, ut aliquê iniuste condemnet. de quo prophetica clamat auctoritas, *Iustus Dominus & iustitias dilexit, æquitatem vidit vultus eius.* Proinde *Psal. 10.* Proinde in omnibus operibus suis æterna laude dignus est Deus, quia cunctis, quos secundum propositum vocat atque iustificat, gratis remittit iniquitatem: in omnibus autem, quos punit, irreprehensibilem retinet æquitatem. Causa verò maiorum atque minorum, qui sine baptismo cursum vitæ præsentis in infidelitate consummant, quantum attinet ad communionem originalis peccati, vna est: & ex hac utriusque ibunt in ignem æternum, qui paratus est diabolo, & angelis eius, quia in eis chirographû,

quo sibi eos deceptoris nequitia subdidit, Saluatoris gratia non deleuit. Sed in eo est maiorum causa deterior, quia rationis utendæ facultate percepta, respuunt aut negligunt regenerationis salutare remedium, sine quo non solum regno potiri nequibunt, quin etiam grauioribus suppliciis subiacebunt. Tales enim contemnentes benignitatem Dei secundum duritiam suam, & impœnitens cor thesaurizant sibi iram in die iræ, & reuelationis iusti iudicij Dei, qui reddet vnicuique secundum opera sua: ut non solum pro originali peccato æternis ignibus ardeant, quibus arsurus sunt sine baptismo morientes etiam paruuli, qui nihil boni aut mali egerunt: sed etiam pro sua voluntate mala tanto deterius torqueantur, quantum amplius propriæ iniquitatis adiiciunt. In illo quippe originali peccato mors æterna utrosque complectitur: his autem pro voluntatum, actuumque malicia, pœna cumulatur. Deterius est enim redemptionis beneficium impia voluntate non querere, quam ad illud impedimento teneræ prorsus ætatis venire non posse: grauiusque premitur, qui oneri ex primis parentibus sumpto super-addit proprium, quam qui solum baiulat alienum. Eos verò,

qui siue originalium, siue etiam propriorum exuuntur oneribus peccatorum, gratia Dei præueniri nullus debet ambigere Christianus. In cuius gratiæ largitate quidam minore rerum consideratione percepta, non leuiter errant, existimantes eam omnibus hominibus æqualiter dari: ita vt etiam eis, qui beneficia ipsius gratiæ tanquam ipsi multum minorant, dum non credunt ipsius gratiæ opus esse in homine, vt gratia suscipiatur ab homine, quæ non ob aliud diuinitus datur, nisi vt bonam voluntatem in homine primitus operetur, tantaque sit in vnoquoque, qui accipit, quantâ Deus gratuita miseratione cordi accipientis infundit. Dignum itaque est, carissimi fratres, vt in singulis quibusque sententiis, in quibus nubilo cuiusquam obscuritatis ambigimus, sanctorum patrum definitionibus hæreamus: quos præueniens misericordia Dei gratis illuminauit, vt crederent, & sequens instruxit spiritualiter, vt docerent. Hi enim Apostolicæ prædicationis tenentes per omnia veritatem, certissimè cognouerunt, cognoscendumque libris & epistolis reliquerunt, gratiam Dei non omnibus hominibus generaliter dari. Gratuitum quippe donum Dei est gratia. Propter quod di-

1. Cor. 7 cit Apostolus, quia *Vnusquisque proprium habet donum à Deo: alius quidem sic, alius verò sic.* Ista gratia, quam Deus vasis misericordiæ gratis donat, ab illuminatione cordis incipit: & hominis voluntatem non bonam inuenit ipsa, sed facit: atque vt eligatur, ipsa prius eligit: neque suscipitur aut diligitur, nisi hoc ipsa in corde hominis operetur. Ergo & susceptio, & desiderium gratiæ opus ipsius est gratiæ. Istam gratiam nullus hominum desiderare vel postulare, sed nec cognoscere poterit, nisi eam prius ab illa accipiat, qui eam nullis præcedentibus operibus aut voluntatibus bonis ad hoc largitur, vt voluntatem in qua semper maneat, ipsa præparet, ipsa donet, ipsa illuminet, ipsa excitet, ipsa conseruet. Vt ergo gratia Dei cognoscatur & diligatur, desideretur, ac postuletur, prius donatur homini non cognoscenti, non diligenti, non desideranti, neque postulanti. Ipsa itaque se facit cognosci, diligi, desiderari, postulari. Cum enim
- Exe. 11 Dominus, sicut per Ezechielem prophetā loquitur, cor lapideum aufert ab hominibus, & dat eis cor carneum, vtique per gratiæ suæ illuminationem mutat hominis voluntatem, hæc est mutatio non humani arbitrij, sed dexteræ excelsi: per quam filij

De veritate predestinationis. 57

hominum graues corde, qui diligunt vanitatem, & quærunt mendacium, ad diligendam & quærendam veritatem non ipsi bonam voluntatem afferunt, sed à Domino donum bonæ voluntatis recipiunt. Scriptum est enim, quia *præparatur voluntas à Domino.* Pro. 8.
A vero enim lumine, quod illuminat omnem hominem venientem in hunc mundum, bona voluntas datur, vt homo in Deum credat, Deumque fideliter diligat, à quo ipsa voluntas iugiter gubernatur & regitur, vt nec fides hominis deficiat, nec caritas refrigescat. Vnde Saluator Petro dicit, *Ego rogaui pro te, ne deficiat fides tua.* Luc. 22. Fides autem ipsa est sanctorum, quæ per caritatē operatur. Sicut ergo bonæ voluntatis initium nemo potest habere, nisi fuerit misericordia Dei præueniente illuminatus, quia *præparatur voluntas à Domino*, & rursum scriptum est, *Deus meus, misericordia eius præueniet me.* Psal. 58. Ita eandem voluntatem bonam nemo vsque in finem poterit obtinere, nisi fuerit iugiter eadem misericordia subsequente seruatus. Dicit enim Deo beatus David, *Misericordia tua subsequetur me omnibus diebus vitæ meæ.* Psal. 122. Misericordia igitur quæ gratis malum hominem præuenit, vt mutet in melius, & ipsa quem bonum facit,

subsequendo regit, ne mutetur in peius. Omne igitur bonum voluntatis & operis tunc inesse potest homini, si præuenientis gratiæ largitate detur, eiusdemque gratiæ subsequenter opitulatione seruetur: quæ malum præuenit, ut bonam Deo largiente voluntatem habere incipiat, quā antè quia per se habere non poterat, non habebat. Subsequitur autem bonum, ut perseueret & proficiat in bona voluntate, quam ex se habere non potuit, sed gratis accepit. Præuenit ergo dirigēdo cor hominis prauum: quia scriptum est, *Dirigit autem corda Domini-
nus*. Subsequitur autem, custodiendo cor rectum: quia similiter scriptum est, *Iustum
psal. 7. adiutorium meum à Domino, qui saluos facit re-
ctos corde*. Gratia igitur in utroque operatur: scilicet & in errante, ut correctus viuat, & in correcto, ne deprauatus abscedat. Non omnibus autem istam gratiam dari, & quibus datur, non omnibus æqualiter dari, quisquis piè quærit, eloquiorum sanctorū attestatione cognoscit. Quid enim prius in homine bonum potest esse, quod ad æternā vitam tendat, quàm bona voluntas? de qua
psal. 8. tamen in Prouerbiis dicitur, *Præparatur vo-
luntas à Domino*. Dominus ergo, qui in nobis bonam voluntatem præparat, ipse nobis

bonę voluntatis initium donat. Deum quoque in nobis operari non solum vt velimus, verum etiam vt quod benè volumus faciamus, Apostolus docet, dicens: *Cum timore & tremore salutem vestram operamini. Deus est enim, qui operatur in vobis & velle & perficere pro bona voluntate.* Huius bonę voluntatis initium in fide consistere, liber Cantici Canticorū ostendit, vbi Christus dicit Ecclesię, *Venies & pertransies ab initio fidei.* Quam tamen fidem non omnibus dari beatus Paulus asserit, dicens, *Non enim omnium est fides: & rursus, Non omnes obediunt* ^{2. Thess.} *Evangelio.* Quibus autem datur, non æqualiter dari, eodem docente cognoscimus, qui ait; *Dico enim per gratiam quę data est mihi, omnibus qui sunt inter vos, non plus sapere quàm oportet sapere, sed sapere ad sobrietatem, & unicuique sicut Deus diuisit mensuram fidei.* Ob hoc ipse Apostolorum chorus, qui non spiritum huius mundi acceperat, sed spiritum qui ex Deo est, vt sciret quę à Deo donata fuerant ei, sciens à Domino collatum sibi initium fidei, ab ipso sibi eandem poscebat augeri. Lucas enim Euangelista commemorat Dominum dixisse discipulos: *O Domine, auge nobis fidem.* Cuius si ex se voluntas hominis habere posset initium, ex se profectò sumpsisset

augmentum. Sed beati Apostoli vnde se sciebant initium fidei accepisse, quod non habebant, inde sibi eiusdem augmentum poscebant: quia gratia, quæ illis initium fidei contulerat, ipsa in eis augendæ desiderium suscitabat. In quo tamen desiderio licet iam fidelis esset voluntas, nullatenus tamen sibi sufficeret, nisi ille qui initium fidei non poscentibus dederat, augmentum quoque poscentibus benigna miseratione conferret. Vt ergo Apostoli crederent, voluntas non defuit, sed in eis ipsam voluntatem Dominus præparauit. Nam vt homo non credat, ex se habet infidelitatem: vt autem in Deum credat, à Deo accipit fidem. & vt in eo fides augmēto subsequente perficiatur, non hoc virtus humanæ voluntatis, sed diuina gratia facit: quia Deus sicut voluntatem ad credendum per gratiam præparat, sic ipsam voluntatem gratia operante consummat: & sicut fidem non habentibus ipse donat, sic in illis etiam, qui habent, ipse multiplicat. Propter quod in epistola quæ

Heb. 11. ad Hebræos est scripta, sic dicitur; *Deponentes igitur omne pondus, & circumstans nos peccatū per patientiam curramus propositum nobis certamen, aspicientes in auctorem fidei & consummatorem Iesum.* Proinde si ex se homo fidem

habet, non est auctor fidei Iesus: & si virib. sui homo fidem perficit, non est consummator fidei Iesus. Apostolica auctoritas auctore cōsummatoreq. fidei nostræ Dominū Iesū confitetur. Certū est igitur fidē in nobis nec esse posse, nec crescere, nisi ille nobis eam tribuat, tributam augeat, auctam perficiat, quem auctorem, consummatoremque fidei Apostolica profitetur auctoritas. Propter quod Apostolus Paulus in epistola, quam ad Ephesios scripsit, sicut à Deo dari gratiam prædicat, ita testatur non omnibus æqualiter dari, sed prout ille misericorditer donat, qui non pro meritis retribuere, sed gratis tribuere consuevit. *Di-* Ephē. 4.

cit enim: Vnicuique nostrum data est gratia secundum mensuram donationis Christi. His atque huiusmodi testimoniis ostenditur nec omnibus dari gratiam, nec quibus datur, æqualiter dari, sed secundum mensuram donationis Christi. Hinc est, quod eandem beatus Apostolus concludens epistolam, pacē, caritatem, atque fidem diuinitus optat tribui, *dicens: Pax fratribus & caritas cum fide à Deo patre & Domino Iesu Christo.* Ephē. 6. Vt ergo in Deum credere vellemus, ille nobis bonā voluntatem contulit: vt in eū crederemus, ipse fidem nobis donauit: vt illum etiam diligeremus, idem nostris cordibus per spiri-

tum sanctum gratiam suæ caritatis infudit. Non utique, quia volumus, gratiam accepimus, sed nec dum volentibus nobis gratia data est. Quam ipsam gratis habere potuimus, ut gratiam acciperemus: sed infidelibus nobis est donata fides ex gratia. Quod vas electionis manifesto testatur elo-

Eph. 2. quio, dicens, *Gratia salui facti estis per fidem, & hoc non ex vobis, sed Dei donum est.* Sola igitur gratia in nobis bonam voluntatem facit, sola fidem ipsi voluntati tribuit. Sed cum bona voluntas habuerit fidem, sine qua bona esse non potest, quia sine fide impossibile est placere deo, incipit operari bonum, si tamē operati gratia nunquā desit auxiliū. Ideo enim in nobis gratia Dei bonā efficit volūtātē, ut habeat quā in nobis adiuuet, nō solū volentē, sed etiā operantem. & ideo voluntati nostræ donum credulitatis infundit, ut eidem voluntati credenti, operantique non desit. Ut ergo habeat fidem, non ex se, sed ex Dei gratia sibi inesse nouerit ipsam fidei largitatem. Parum est autem nobis fidem scire vnicuique diuinitus dari, nisi certissimē nouerimus tantam vnicuique tribui, quantam Deus donare dignatur, non quantam humana voluntas meretur. Quæ priusquam accipiat fidem

punitionem per se ipsam potest mereri, nō fidem. Omne enim, quod non est ex fide, peccatum est, & sine fide impossibile est placere Deo. Qui autem Deo non placet, sine dubio displicet: & qui Deo displicet, non eum mitigat, sed potius exacerbat. Nullum igitur accipiendæ fidei meritum potest habere voluntas, quæ non habet fidem: quia fidem non habere, hoc est displicere Deo. Infidelitatis autem malum non iustificationis, sed damnationis est meritum. Gratuita est igitur diuisio fidei, quæ non secundum infidelium, quæ nulla est, fidem, sed secundum iustificantis Dei voluntariam vnicuique tribuitur largitatem. Hoc utique doctor gentium docens, admonet nos, non plus sapere quàm oportet sapere, sed sapere ad sobrietatem, & vnicuique sicut Deus diuisit mensuram fidei. Beatus quoque Petrus multiformem gratiam Dei esse testatur. Propter quod vnumquemque fidelium pro qualitate acceptæ gratiæ præcipit operari, dicens: *Hospitales estote inter vos, sine murmuratione, unusquisque qualem accepit gratiam, inter vos eam administrantes, ut boni dispensatores multiformis gratiæ Dei.* Beatus etiam Paulus dicit, *Multi vnum corpus sumus in Christo, sin-*

Rom. 12

1. Pet. 4

Rom. 12

guli autem alter alterius membra: habentes autem donationes secundum gratiam, quæ data est nobis differentes. Porro ne quis differentiam donationum quibuscumque humanis operibus, aut meritis niteretur adscribere, ostendit idem Apostolus voluntariam gratiæ spiritualis tribui largitatem, quæ nullum inuenit meritum, cui conferat donum, sed ipsa donat bonorum exordia meritorum. Ait ergo: *Diuisiones gratiarum sunt, idem autem Spiritus: & diuisiones ministracionum sunt, idem autem Dominus: & diuisiones operationum sunt, idem autem Deus, qui operatur omnia in omnibus.* Et post enumerationem charismatum dicit, *Hæc autem omnia operatur vnus atque idem Spiritus, diuidens singulis, prout vult:* Proinde nosse debet vnusquisque Christianus; neque in viribus naturæ, neque in legalibus præceptis, sed in illuminatione cordis & voluntario diuinæ bonitatis munere constare gratiæ salutaris exordium, qua fit, vt quod diuinitus præcipitur, non solum à nobis agnosci, sed etiam diligì possit ac fieri. Neque enim ipsa natura humana per semetipsam potest aliquando bonam resumere voluntatem, qua placeat Deo, ex quo eam in primo homine perdidit, cum diabolo deprauata, quam rectam diuinitus acceperat,

1. Cor. 12

acceperat, voluntate consensit. Quam tunc sic perdidit, ut eam nullus hominum deinceps ex se habere possit, nisi eam ab illo gratis acceperit, à quo eam primus homo, cum conderetur, accepit. quam si primus non perderet, omnis homo deinceps eam naturaliter possideret. Præcepta quoque legis sonare possunt extrinsecus auribus carnis: intrinsecus autem nullus ea cordis auditu aliquatenus salubriter percipit, nisi donum gratiæ spiritualis intus acceperit. Auget enim littera prohibendo peccatum, si desit audienti gratiæ spiritualis auxilium: & agnita lege homo prævaricator efficitur, nisi ad implendam legem voluntas à Domino præparetur. Lex enim iram operatur, & ubi non est lex, nec prævaricatio: & conclusit scriptura omnia sub peccato, ut iustificatio ex fide Iesu Christi daretur credentibus. Lex itaque sine gratia ostendere potest ægritudinem, non sanare: vulnera monstrat, medicamina non ministrat. ut autem legis impleatur præceptum, gratia ministrat auxilium. Ac sic lex reuelat culpam, gratia confert indulgentiam. Legis est igitur, quod peccata cognoscimus: gratiæ, quod vitamus. Dicit enim Apostolus, *Peccatum non cognoui nisi per le-* *Rom. 7.*

gem. Nam concupiscentiam nesciebam, nisi lex diceret, non concupisces. De gratia quoque ait, Quis me liberabit de corpore mortis huius? Gratia Dei per Iesum Christum Dominum nostrum. Naturæ itaque deprauatæ vitium est, ut homo peccet: legis officium, ut homini peccatum, quod ignorat, demonstret: gratiæ autem donum est, ut hominis vitium sanet, quod sibi culpa intulit, & legis agnitio cumulauit. Operatur ergo gratia & illuminationem in hominibus & salutē: ut mandatā legis, quæ donec homo implere non poterat, non tantum inutiliter, sed etiam damnabiliter audiebat, adiutorio gratiæ præuentus, non solum sancta & iusta & bona esse nouerit, verum etiam caritatem accipiat, qua possit & diligere, & implere quod discit. Non ergo putemus gratiam Dei omnibus hominibus dari. Nō enim omnium est fides: & quidam caritatem Dei non recipiunt ut salui fiant. In quibus tamen ut non credant, neque diligant Dominum, humanæ voluntatis est vitium. quæ quandiu gratia diuini muneris non mutatur, aut præcepta non intelligit, aut intellecta contemnit, id est, aut nesciens peccat, aut peccatum suum vitio præuaricationis accumulatur. De iis igitur,

quos ignorantia circumuallat obscuritas, dicitur, *Non sciuerunt, neque intellexerunt; in* ^{Psal. 81.} *tenebris ambulant.* Hi, sicut Apostolus dicit, *ambulant in vanitate sensus sui: tenebris obscuratum habentes intellectum, alienati à vita Dei per ignorantiam, quæ est in illis, propter cecitatem cordis ipsorum.* De scientibus verò dicit, *quia cum cognouissent Deum, non sicut Deum* ^{Rom. 1.} *glorificauerunt, aut gratias egerunt; sed euannuerunt in cogitationibus suis.* Et de contemptore seruo dicitur: *Verbis non emendabitur seruus* ^{Prov. 19} *durus: sed etsi intellexerit, non obediet.* Quid est autem, verbis non emendabitur, nisi solo mandato legis, si gratia desit, non conuertetur? Deus enim conuertens viuificat nos, ut plebs eius lætetur in eo. Ipse nobis ostendit misericordiam suam, & salutare suum ipse dat nobis. Ut ergo non credat in Deum homo, ex seipso habet infidelitatis vitium: ut autem credat & diligat eum, diuinæ largitatis est donum. Si enim quærat, quales homines inuenit gratia: tales utique quales designat Apostolus, id est, ^{Tit. 3.} *insipientes & incredulos, errantes, seruiētes desiderijs & voluptatibus variis, in malitia & inuidia agentes, odibiles, odientes inuicem.* Ex quibus vitiis omnibus non possibilitate naturæ & agnitione legis, sed

benignitate Saluatoris nostri Dei nos prædicat esse saluatos. Cuius ope fit, vt abnegantes impietatem & sæcularia desideria, sobriè, & iustè, & piè viuamus in hoc sæculo. Hoc igitur agit gratia Dei per Dominum nostrum Iesum Christum, vt ex insipientibus sapientes faciat, infidelibus fidem tribuat, errantes ad vitam non solum vocet, sed etiam à prauis desideriis reuocet: prauis desideriis expulsis desiderium regni cœlestis inspiret: ablata voluptatum carnalium cupiditate, donum spiritualis delectationis ac voluntatis infundat: extirpet inserta bonitate maliciam: benignitatis dono pellat inuidiam: odibilibus quoque & odientibus inuicem donum sanctæ dilectionis attribuat. Vt ergo ex malis boni simus, & vt igne sanctæ caritatis flagremus, gratiæ spiritualis opere in nobis inchoatur, eiusque in nobis operatione perficitur. Fructus enim Spiritus est caritas, gaudium, pax, longanimitas, bonitas, benignitas & cætera, quæ Apostolica doctrina commendat. Hoc in nobis Spiritu operante salubriter facienda cognoscimus, quia ipse in nobis operatur, vt cognita faciamus. Non enim Spiritum huius mundi accepimus, sed Spiritum, qui ex Deo est, vt sciamus,

Galat. 5.

quæ à deo donata sunt nobis. Eodem quoque spiritu agimur, vt bene agentes filij Dei simus. Quotquot enim Spiritu Dei aguntur, hi filij sunt dei. Cœlestibus igitur obediētes eloquiis, firmissimè teneamus, omnium nobis bonorum initium diuina largitate conferri. Nos autem vt contineamus, ne mala faciamus, & vt bonum incipiamus velle vel facere, nec initium à nobis habere possumus, nec profectum. Quēadmodum enim de continentia scriptum est, *quia nemo potest esse continens, nisi Deus det.* & Apostolus eam inter fructus Spiritus enumerat. Sic caritas, quæ non agit perperam, quod ad continentiam pertinet, & quæ per bona opera cooperit multitudinē peccatorum, per quam in nobis Deus cooperatur, non solū vt declinemus à malo, sed etiam vt faciamus bonum: qua diligamus non solū proximos, sed etiam inimicos nostros, & bene faciamus eis, qui oderunt nos, & oremus pro persequentibus, & calūniantibus nobis. Hæc ergo caritas non ex nostra voluntate aut esse incipit, aut crescit in nobis: sed gratia Dei faciente diffunditur in cordibus nostris per Spiritum sanctum, qui datus est nobis. Quisquis igitur in nomine gratiæ non vult

Sap. 8.

Gal. 5.

- falli vel fallere, audiat Apostolum, tumo-
ris humani superbiam, quæ sibi nititur assi-
gnare bonæ voluntatis initium, sollicitè
I. Cor. 4 comprimèntem. qui ait. *Quis enim te dis-*
cernit? Quid autem habes, quod non accepisti? Si
autem accepisti, quid gloriaris, quasi non accepe-
ris? Iacobi quoque sententiam sincera cor-
dis humilitate sectetur, qua nos ab errore
reuocat, & in viam veritatis inducit, dicēs.
Iac. 1. *Nolite errare fratres mei: Omne datum optimū,*
& omne donum perfectum, desursum est descen-
dens à patre luminum. Ipse quoque noster
• Conditor ac Redemptor, cū turbis in pa-
rabolis loqueretur, vt ostenderet intelli-
gentioris agnitionis facultatem illis tātū
inesse, quibus eam ipse largiri voluerit,
quia ipse est, qui docet hominem scientiā,
dicentibus sibi discipulis, Quare in parabo-
lis loqueris eis? manifesta responsione do-
num gratiæ cœlestis aperuit, dicens, *Quia*
Luc. 8. *vobis datum est, nosse mysterium regni Dei, cæ-*
teris autem in parabolis. Ipsius quoque ad
patrem directā confessio euidenter osten-
dit omnem sapientiam humanæ mentis
ad intelligentiam diuinæ prædicationis
inualidam, nisi Deus qui docet exteriùs
per hominem loquentem per seipsum
interiùs docens, illuminet atque adiu-

uet audientem. Ait enim, *Confiteor tibi pater, Domine cœli & terræ, qui abscondisti hæc à sapientibus & prudentibus, & reuelasti ea paru-^{Matt. 11}lis. Quo modo gratia omnibus asseritur data, quæ à sapientibus & prudentibus, teste ipso donante, monstratur abscondita? Nam & in subsequentibus verbis, agnitionem Dei non in humana potestate, sed in diuina ostendit reuelatione consistere, cùm ait: *Nemo nouit filium nisi pater, neque patrem quis^{Ibid.} nouit nisi filius, & cui voluerit filius reuelare. Quis hîc non videat hominem ab homine inutiliter sermonem doctrinæ cœlestis audire; nisi ei magister Deus reuelando misericorditer loquatur in corde? Hæc autem reuelatio specialis est filiorum Dei, qua nō solum cognitionis donum, sed etiam diuinæ dilectionis accipiunt. Non enim talis est ista reuelatio, siue cognitio, qualis illorum, de quibus dicit Apostolus, quia ^{Rom. 1.} *quod notum est Dei manifestum est in illis.* Deus enim illis manifestauit; scilicet vt sint inexcusabiles; quia cùm cognouissent Deum, non sicut Deum glorificauerunt, aut gratias egerunt. Illa itaque manifestatio, qua cognouerunt Deum, qui cognitum non dilexerunt, gratiam non habuit, qua Deus sic cognoscitur, vt ametur. Quia ergo gratiam**

non acceperunt, propterea cognoscentes Deum, gratias non egerunt: & quia vasa iræ fuerunt aptata in interitum, hoc in eis operata est illa manifestatio, qua Deum cognouerunt, vt cognoscendo superbi rent, non vt se humiliando diligerent. Tali ergo cognitione ablata excusatio est, non collata saluatio. In hac autem reuelatione, quam gratia Dei in vasis misericordiæ operatur, simul homini diuinitus agnitio Dei, dilectioque confertur. Illi enim qui non sunt electi, inexcusabiles sūt, electi autem inaccusabiles fiunt. Dixit enim Apostolus, *Quis accusabit electos Dei? Deus qui iustificat. quis est qui condemnet? Christus Iesus, qui mortuus est, immo qui & resurrexit, qui est ad dexteram Dei, qui etiam interpellat pro nobis.* In vasis ergo misericordiæ reatus naturalis humili, quam gratia spiritalis donat, fide & caritate soluitur; in vasis autem iræ superba cognitione nutritur. Per illam cognitionem cecū cor à semetipso inflatur ad mortem: per hanc autem diuinitus illuminatur & humiliatur ad vitā. Illa cognitione cor obscuratur insipiens, dum quod Dei est, homo sibi superbus assignat: hac autem accipit lumen, vt hoc ipsum, quod Deum cognoscit ac diligit non ex possibilitate naturæ, neque ex

Rom. 8.

auditu legis, neque ex sua voluntate, sed x
Dei dono sibi inesse non ambigat, semper-
que humilis esse meminerit, ne superbus
amittat, quod indignus accepit. Cognitio
ergo illa peccato adiicit præuaricationis
reatum, ista remouet à peccatore suppli-
cium. Illa iuste damnat, ista gratis iustificat.
Illic scientia inflans nutrit, augetque pec-
catum: hinc caritas ædificans cooperit mul-
titudinem peccatorum.

B. FVLGENTII
EPISCOPI RVSPENSIS,

De veritate prædestinationis & gratia.

LIB. II.



VPERIORE libro, adiuuante gratia
Dei, quæ sola potest & humano
cordi donum sanctæ cognitio-
nis infundere, & ori rectam
loquendi tribuere facultatem, quia in
manu Dei sunt & nos & sermones no-
stri, primitus de Iacob & Esaii satis superq.
ostendimus, Apostolicæ documento sen-
tentia, nullis præcedentium aut subsequen-

tium exigentibus operum meritis, sanctū Iacob, priusquam nasceretur, electum, sed sola diuini propositi benignitate discretū. Quod euidenter beatus Paulus illo cognoscitur asseruisse sermone, quo ait: *Dum enim nondum nati fuissent, aut aliquod egissent bonum aut malum, ut secundum electionem propositum Dei maneret.* Quod Apostolus ideo dixit, ut non secundum hominis, sed secundum electionem vocantis propositum mansisse monstraret: neque ex nascituri quolibet merito, sed ex voluntate Dei cognosceretur electio. Reuera enim vocatio Dei ex hominis merito, & non ex gratia Dei fuisset electio, si aliquid bonæ vel malæ actionis inueniretur in paruulis. Sed quia nulla fuerunt in nondum nascentibus ex vno concubitu conceptis operum merita propriorum, quæ diuersitate sui vnum facerent eligi, alterum reprobari: quia si essent non utique secundum Dei electionem, sed secundum humana opera propositum Dei maneret. quia ergo nulla fuit in illis fratribus diuersitas proprii operis boni vel mali, quæ vni electionis cōferret meritum, alteri damnationis inferret suppliciū: propterea secundum electionem fuit propositum Dei, quia non ex merito eligendi vo-

Rom. 9.

luntas eligentis mansit, sed ex eligētis proposito, gratuita fuit electi discretio. Propter quod Apostolus sequutus adiunxit: *Nō ex operibus, sed ex vocante dictum est ei, quia maior seruiet minori.* Hac igitur in quantum Dominus donauit, geminorum fratrum quæstione tractata, generalem de paruulis sine baptismo morientibus inquisitionē operis series subrogauit. Qua diligentius discussa, & quantum arbitror, euidentius absoluta. Ipsi demum gratiæ, qua gratis præueniuntur quicumque saluantur, tractatus est à nobis sollicita inquisitione susceptus: quo patuit gratiam non omnibus hominibus vniuersaliter dari, & quibus datur non æqualiter dari. Illius est enim, vel quibus eam, vel quantam dare, qui non eam humanis voluntatibus aut operibus debitam retribuit, sed gratuitam illuminandis cordibus misericors ac benignus infundit. Et ideo cui voluerit, & quantam voluerit, profectò largitur, quia neque vllō bonæ voluntatis exortu, neque effectu cuiusquam boni operis priusquam gratiam tribuat inuitatur. Verumtamen quia plerosque nouimus in quæstione gratiæ Dei & humani arbitrij non tenere discretionem: sed ita vnum asserere, vt alterum nitantur

auferre, cùm gratia pietatis neutrum negari sinat, sed ordinem custodiri in vtriusque confessione præcipiat: nos gratiæ diuinæ fulti præsidio, quo humanum & illuminatur & gubernatur arbitrium, in hoc secundo libello curauimus & gratiam Dei & arbitrium hominis sic asserere, vt neutrum tollamus, dum vtrumque defendimus: sed ostendamus, quid horum sit, quod altero egeat, & quid se alteri gratuito munere bonitatis impendat: quid sit quod medelâ semper expectet; & vnde beneficium medicinæ indefinenter exuberet. Dicit enim creator, saluatorque mortalium non esse necessarium sanis medicum, sed malè habentibus, neque se venisse, vt vocaret iustos, sed peccatores ad pœnitentiam. Hinc itaque cognoscitur, quid idem medicus in infirmis inueniat, & quid ipse sanandis impendat. Inuenit liberum hominis arbitriũ, in ea duntaxat ætate, quæ vsui iam potest seruire rationis, aut suæ infirmitatis nesciũ, aut morbo noxiæ cogitationis inflatum: dum scilicet aut quid faciendum sit, nescit, aut quod faciendum scierit, suis se viribus implere confidit. Ac sic, aut homo nescius morbum amplectitur, aut plus ægrotat, dum non à medico poscit, sed ipse nititur

Matt. 9.

adhibere remedium. Vnde consequens est, vt lethali morbo vel ignorantia, vel superbiam prægrauatus, nec medicum requirat, nec in se effectum veræ sanitatis inueniat. Neque tamen libera voluntas ideo non est in homine, priusquam sanetur opere diuinæ conuersionis, quia morbo magis vult obtemperare quàm medico: cùm eo ipso quòd obtemperat homo, vel non obtemperat, liberum sibi inesse arbitrium euidenter ostendat. Est ergo non solum in hominibus iustis, verùm etiam in impijs liberum arbitrium. sed in istis bonitate dei redemptoris erigitur atque dirigitur: in illis autem dei vlciscentis æquitate describitur, & punitur. Ac sic in his non solum cognoscendo, sed etiam diligendo inhæret veritati: In illis verò aut ignorat mandatũ, & in peccato suo non est ei peccati cognitio: aut ad hoc potest peccatum absque adiutorio gratiæ Dei cognoscere, vt dum se præsumit per semetipsum diuinæ voluntatis implere posse mandata, non obtemperet humiliter voluntati dei, sed bonum malè faciens suo potius famuletur errori: dum scilicet ignorans Dei iustitiam, & suam volens constituere, iustitiæ dei non est subiectum, quando finis legis non nisi Christus

fit ad iustitiam omni credenti. Medicus itaque noster peritus & bonus gratis ad vitam reducturus mortuos, ac sanitati redditurus ægrotos, ipse languentium salus & resurrectio mortuorum, in eo viuificandis ac sanandis hominibus insuperabili bonitate consuluit, in quo medicinam se nobis idem medicus fecit. Sed ut ordinē suę curationis sapientia Dei sapienter expleret, prius præceptum dedit per legem iustitiæ, quo suam infirmitatem ægrotus agnosceret, daturus effectum per gratiam, quo infirmus suæ infirmitatis salubriter conscius, non iam confidens in virtute sua tumesceret, sed ipsum fontem vitæ salutisque cognoscens, ab ipso sibi sanitatis beneficium postularet: nec suâ iactans superbo corde iustitiam, sic se putaret alienum à morbo, tanquam non egeret curationis auxilio: vnde illa vox Pharisei

Luce. 18. est: *Deus, gratias tibi ago, quia non sum sicut ceteri homines, raptores, iniusti, adulteri, sicut & publicanus iste. Sed vulnera sua contriti cordis humilitate respiciens, veraciter exclamaret,*

Psal. 40. *Ego dixi, Domine miserere mei: sana animam meam, quia peccaui tibi. Nec tamen medicus ille cælestis nostram infirmitatem sanaret cognitione dilectioneue mandati, nisi homini liberum dedisset arbitrium*

Sed multiplicata est infirmitas sola cognitione mandati, vt per gratiam inciperet sanitas fidei ac dilectionis constitui. Cognitione itaque mandati ad bene operandum hominis liberum arbitrium conuenitur: nõ quia voluntate tantum vel virtute sua potest homo implere quod ei lex iubet: sed vt per mandati notitiam infirmitatis suæ sibi conscius fiat, & adiutorium gratiæ medicinalis exposcat. Qua percepta, potest & diligere quod iubetur, & facere, & agnoscere vel quid possit, vel quid non possit, & vt possit exposcere, & sibi suæ infirmitatis imputare miseriam, & sanitatis assignare beneficiis medicinalibus gratiam. Hæc omnia quæ superius posuimus, dignum est vt cælestibus eloquiis asseramus. Per Isaiam sic loquitur Deus, *Si volueritis & audieritis me, ^{Esai. i.} bona terræ comedetis: si autem nolueritis, nec obaudieritis me, gladius deuorabit vos.* His verbis, quibus dicitur, si volueritis, & si nolueritis, procul dubio libertas humani declaratur arbitrij. Velle enim & nolle, volutatis esse nullus ignorat. Quod ergo per prophetam dicitur, si volueritis & audieritis me, nostra conuenitur voluntas, qua debemus & semper bonum velle, ac bonis operib. indefinenter ac libenter insistere. Cum

philip. 2. verò Apostolus dicit: quia *Deus est qui operatur in nobis & velle & perficere pro bona voluntate*, ostendit utique ipsam hominis voluntatem, & ad benè volendum non nisi diuino munere dirigi, & ad benè operandum diuinitus adiuuari. Dum ergo præcipitur nobis ut velimus, ostenditur quid habere debeamus. Sed quia id ex nobis habere non possumus, admonemur ut à quo nobis datur præceptum, ab ipso petamus auxilium: Quod tamen non possumus poscere, nisi Deus in nobis operetur & velle. Voluntas enim quæ in nobis dono dei miserantis efficitur, ipsa in nobis, ut benè operari valeat, adiuuatur. Quæ de malis, in quibus ante iustificationem iacet, & in eis cum delectatione deficit, non sua virtute, sed dei præuenientis operatione consurgit: & postquam surrexerit, ut non cadat, sola sibi non potest sufficere: sed sicut ad surgendum beneficio misericordiæ præuenientis erigitur, sic ad perseverandum misericordiæ subsequētis iuuamine custoditur. Beatus itaque Dauid, & humani arbitrij voluntatem & virtutem diuinæ gratiæ recognoscens, conuenit quidem nos, ut faciamus bonum, sed quod à nobis imperat fieri, unde nobis poscit, unde nos habere posse non

ambigit. Humanum igitur arbitrium ad
 conuersionem prouocans, salubri prædica-
 tione terret, dicens: *Nisi conuertamini, gladiū* Psal. 7.
suū vibrauit, arcum suū tetendit, & parauit
illum. Sed vt ostenderet, quod operari præ-
 cipimur, conuersionem quam nobis præ-
 dicat, dono supernæ operationis assignat
 dicens, *Deus tu conuertens viuificabis nos,* & Psal. 84.
plebs tua letabitur in te. Vt etiam suæ animæ
 vnusquisque misereatur, & Deo placeat,
 humanum diuino sermone sic admonetur
 arbitrium: *Miserere animæ tuæ, placens Deo.* Eccl. 30.
 Quia verò nemo potest animæ suæ misereri,
 nisi qui Dei misericordia præuentus acce-
 perit vt misericors sit, ipse misericordiæ lar-
 gitor edocens dicit: *Miserebor cui misereor,* Rom. 9.
& misericordiam præstabo cuius miserebor. Ideo
 & beatus Dauid dicit, *Deus meus, misericordia* Psal. 58.
eius præueniet me. Et quia Deo nemo potest
 placere, nisi in eo Deus operetur quod
 placeat coram se, in epistola quæ ad He-
 bræos est scripta, manifestè positum est. Ibi
 quippe dicitur, *Deus autem pacis, qui eduxit* Hebr. 13
de mortuis pastorem magnum ouium in sanguine
testamenti æterni, Dominum nostrum Iesum
Christum, aptet vos in omni bono, vt faciatis
voluntatem eius, faciens in vobis quod placeat
coram se. Deo igitur non placemus, nisi ve-

limus, sed ab ipso nobis tribuitur, vt velimus, à quo nisi voluntas hominis mutetur, vt bona sit, aut semper appetit malum, aut nunquam bene appetit bonum. Ac sic dum in rebus bonis rectum ordinem non tenet, Deo vero & bono nullatenus placet. Deo ergo non placemus, nisi in voluntate bona: sed vt id faciamus, ipse facit in nobis, quod placeat coram se. Daudid enim dicit,

Psal. 39. Vt faciam voluntatem tuam, Deus meus, volui.

Sed ad ipsam voluntatem faciendam gratiæ spiritualis poscit auxilium, qua doceatur vt sciat, & dirigatur vt faciat. Vnde & in alio

Pf. 142. loco sic orat, Doce me, vt faciam voluntatem tuam, quia tu es Deus meus: statimque subiecit, Spiritus tuus bonus deducet me in viam rectam.

Item Isaias præcipit dicens, *Derelinquat impius viam suam, & vir iniquus cogitationes suas, & conuertatur ad Dominum.*

Ephes. 4 Paulus quoque Apostolus hortatur, vt renouemur spiritu mentis nostræ, & induamus nouum hominem, qui secundum Deum creatus est in iustitia & sanctitate veritatis. Verumtamen ne conuersio vel renouatio nostra humano assignetur arbitrio, vtramque nobis à Domino sanctus Hieremias

Thren. 3 deposcit his verbis: *Conuerte nos ad te, & conuertemur. renoua dies nostros, sicut antea.*

Rurfus Psalmista dicit, *Aperi os tuum, & ad-* Psal. 80
implebo illud. Vbi intelligimus os cordis si-
 gnificari, non corporis. de quo ore alio lo-
 co dicit, *In conuertendo Dominus captiuitatem* Psal. 125
Sion, facti sumus sicut consolati. Tum reple-
tum est gaudio os nostrum. Et tamen ne quis
 sibi oris apertionem superbus assignet,
 ostendit liber Actuum Apostolorum, ad Act. 16.
 recipiendū Christianæ prædicationis ver-
 bum os humani cordis largitate diuinī mu-
 nefis aperiri. Ibi enim scriptum est de qua-
 dam muliere nomine Lydia purpuraria:
 cuius Dominus aperuit cor, intendere iis,
 quæ dicebantur à Paulo. Iterum scriptum
 est quia *sapientia aperuit os mutum, & linguas* Sap. 10.
infantium fecit disertas. Aperuit enim os mu-
 tum, vt increduli crederent; disertasque
 fecit infantium linguas, vt quod credide-
 rant, prædicarent. Vnde non immeritò
 credulitatem, locutionemque suam sancti
 Spiritus dono Paulus adscribit, dicens,
Habentes autem eundem Spiritum fidei, sicut 2. Cor. 4.
scriptum est, Credidi, propter quod locutus sum,
& nos credimus, propter quod & loquimur.
 Voluntariè homo credit, & voluntariè lo-
 quitur: sed hoc ex se voluntas hominis ha-
 bere non potest, nisi Deus det; quia vt
 fidelis credat, sapientia os mutum aperit:

& ut credens loquatur, linguas infantium disertas facit. Præcepta igitur, quibus per Prophetas atque Apostolos admonemur, quid debeamus appetere, quid vitare, conueniunt nostrum arbitrium, ut dominicis iussis voluntariè seruiamus. Sed cum ipsi Prophetæ & Apostoli, qui Spiritu sancto repleti sanctè vixerunt, sanctaque docuerunt, numquam destiterint à postulatione diuini iuuaminis, quippe ad implenda, quæ Deus iubebat, ab ipso auxilium requirebant, procul dubio sicut non negabant inesse homini liberum voluntatis arbitrium, sic illud sine iuuamine gratiæ Dei, ad ea, quæ sancta sunt, non solum agenda, sed etiam cogitanda insufficiens atque inualidum testabantur. Vnde sanctus Apostolus ostendens in homine liberum voluntatis arbitrium, Philipenses ad ea, quæ sancta & iusta sunt, cogitanda atque agenda præceptis salutaribus hortatur dicens: *Quæcumque sunt vera, quæcumque pudica, quæcumque sancta, quæcumque iusta, quæcumque bonæ famæ, si qua virtus, si qua laus, hæc cogitare quæ didicistis, & accepistis, & audistis, & vidistis in me. Hæc agite, & Deus pacis erit vobiscum. Nonne & ut cogitent, & ut agant quæ sancta sunt, præcepit, & tamen tam cogitandi*

Philip. 4

quàm agendi facultas vnde nobis donetur, euidenter ostendit? De cogitatione quidē dicit, *Non quod sufficientes simus cogitare ali-* 2. Cor. 3
quid à nobis quasi ex nobis. Quid est, quod dicit, ex nobis, nisi ex libero voluntatis arbitrio? Vnde ergo est, si ex nobis non est? *Sed sufficientia*, inquit, *nostra ex Deo est.* Ad agendum quoque Spiritu Dei nos agi, sic prædicat: *Quotquot enim Spiritu Dei agun-* Rom. 8.
tur, hi filij sunt Dei. Hęc igitur inter literam iubentem & spiritum viuificantem, id est inter legem, gratiamque distantia est, quia lex conuenit, gratia conuertit hominis voluntatem, vt bonum velimus. Illa clamat, hæc donat: illic voluntati hominis inquit iustitia diuina terrorem; hîc infundit misericordia caritatem. Per illam accipit voluntas Spiritum seruitutis in timore; per istam accipit Spiritum adoptionis filiorum, in quo clamamus, Abba pater. Hęc ergo in nobis libera voluntas eam in se habet naturaliter qualitatem, vt appetere sponte possit bona vel mala: sed bona proficiendo appetit, mala verò deficiendo. Vt autē deficiat, potest ipsa sola sibi sufficere; vt proficiat verò, indiget semper diuinæ miserationis auxilio. Nisi enim gratia præueniente leuetur, nullatenus surgit; quia

Dominus erigit elisos. Nisi ea deducente iuuetur, nullatenus currit, quia de Deo

psal. 22 scriptum est, *Deduxit me super semitas iustitiæ propter nomen suum.* Et ipsi dicitur, *Domine de-*

psal. 5 *duc me in iustitiâ tuâ propter inimicos meos.* Nisi gratia custodiēte perducatur, nullaten. peruenit. Dicit enim sanctus Dauid, *Emitte lu-*

psal. 42 *cem tuam, & Veritatem tuam, ipsa me deduxerūt, & perduxerunt in montem sanctum tuum, & in tabernacula tua.* Neque spretis malis voluntas humana vel eligere bona, quæ ducunt ad vitam, vel diligere poterit, nisi gratiam discretionis à Deo & caritatis acceperit. Spiritualibus enim donis discretionem beatus

1. Cor. 12 Paulus inseruit dicens; *Alij quidem datur per spiritum sermo sapientiæ, alij autem sermo scientiæ secundum eundem spiritum: alteri fides in eodem spiritu, alij gratia sanitatum in vno spiritu, alij operatio virtutum, alij prophetatio, alij discretio spirituum.* Quorum autem discretio spirituum spiritali largitate donatur, nisi bonorum ac malorum? ut scilicet illuminati atque adiuti gratia Spiritus sancti, nouerimus atque possimus & dona sancti Spiritus cum timore & tremore seruare, & suggestiones diabolicæ malignitatis salubri discretionem repellere. Quod nos beatus Ioannes Apostolus obseruare præcipit di-

De veritate predestinationis. 87

cens, *Carissimi nolite omni spiritui credere, sed* ^{1. Io. 4}
probate spiritus si ex Deo sunt. Ut autem
sciamus quæ nobis à Deo donantur, non
in nobis operatur spiritus mundi, sed Dei,
idest, non spiritus, quem homo habet, ut
nasceretur in mundo, sed quem accepit, ut
renascatur Deo. Quod Apostolus euidē-
ter edocet, dicens, Nos autem non spiritum ^{1. Cor. 2}
mundi accepimus, sed spiritum, qui ex Deo est, ut
sciamus quæ à Deo donata sunt nobis. Neque so-
lùm ut sciamus, sed etiam ut intelligamus,
diuini muneris Apostolus esse testatur, sic
Timotheo scribens, Intellige quæ dico. Quo ^{2. Tim. 2}
sermone humanum utique ad intelligen-
dum conuenit arbitrium. Quod nisi homo
haberet, intelligere quæ dicuntur, nullate-
nus posset. Sed ut ostenderet vnde intelle-
ctus humano detur arbitrio, cùm dixisset,
intellige quæ dico, subsequenter adiecit:
Dabit enim tibi Dominus in omnibus intellectum.
Dauid quoque sanctissimus ut mandata Dei
discat, à Deo sibi postulat intellectum di-
cens; Manus tuæ fecerunt me & plasmauerunt ^{psal. 118}
me: da mihi intellectum, ut discam mandata tua.
Prouerbia quoque testantur, quia Domi- ^{Prou. 2.}
nus dat sapientiam, & à facie eius scientia &
intellectus procedit. Et Apostolus Iacobus
præcipit, ut si quis indiget sapientia, postulet à ^{1. Ioa. 2}

Deo, quidat omnibus affluenter; & non impro-
perat. Vt autem ipsam quoque voluntatem
postulandi diuinitus ostēderet dari, adiecit,

Rom. 10 *Postulet autem in fide, nihil hæsitants.* Sine fide
autem Deum inuocari non posse, Paulus
ostendens ait, *Quomodo ergo inuocabunt in
quem non crediderunt?* Quia igitur nullus in-
uocat priusquam credat, nec aliquis in Deū
credit, nisi fidem acceperit; certum est, quo-
niam ille nos excitat, vt sapientiam postu-
lemus, qui nos illuminat vt credamus. Ho-
mo igitur bonum vult voluntate, bonum
facit voluntate, sed sine dono atque adiu-
torio Dei, numquam potest bonum velle
vel facere. Equidem conuenitur vt sciat,
admonetur vt faciat, quia liberum habet
semper arbitrium voluntatis. Sed neque
scientiam sanctam potest habere, nisi dono
gratiæ desuper accepit à patre luminum, à
quo est omne datum optimū & omne do-
num perfectum: et si sciens aut non faciat
quod faciendum esse iam nouit, aut dum
ea sibi nititur assignare quæ facit, proprij tu-
moris pondere prægrauatur. Ideo verò sã-
ctam scientiam superius dixi, quia est scien-
tia non sancta, illa scilicet, quæ inflat homi-
nem, quæ ædificantem non habet caritatē.
Illa scientia quidam cognoscentes Deum,

non sicut Deum glorificauerunt aut gratias egerunt. Hac scientia si quis se putat scire aliquid, nondum cognouit quemadmodū oporteat eum scire. Igitur ad benè viuendū numquam sufficit cuiquam scientia præcepti, nisi dilectio fuerit custos mandati, & vt diligit non nisi sua volūtate diligit. Et ideo Dei & proximi dilectio vnicuique nostrum ita legali sermone mandatur: *Diliges Domi-* Mat. 22
num Deum tuum ex toto corde tuo, & ex tota ani-
ma tua, & ex tota mente tua; & proximum tuum
sicut teipsum. In quibus duobus præceptis Saluator noster totā legem dicit, Prophetasque pendere. Vt autem diligamus Deū ex toto corde nostro, ipsam dilectionem habemus ex Deo. Caritas enim Dei diffusa est in cordibus nostris per Spiritum sanctū, qui datus est nobis. Et vt diligamus inuicē, Deus nobis tribuit caritatē. Ait enim beatus Ioannes, *Carissimi diligamus inuicem, quo-* 1. Io. 4.
niam caritas ex Deo est. & omnis qui diligit fra-
tre, ex Deo natus est, & nouit Deum: qui an-
tem non diligit, ignorat Deum, quia Deus caritas
est. Quoniam igitur Deum caritatem esse diuinis claret eloquiis, profectō manifestū est, quòd nemo Deum habere possit, si se homini Deus ipse non dederit. In eo ergo liberum arbitrium nostrum ad diligendū

Deum & proximum idoneum efficitur, in quo ei caritas diuinitus datur. Sine caritate enim, nec Deus diligere potest, nec proximus. Ut autem Deus diligere possit, ipse se tribuit: quia Deus caritas est, & Deum non nisi caritate diligimus. Nisi ergo Deum accipiamus, Deum diligere non valemus. Posita sunt quoque ante hominem ignis & aqua, vita & mors, ut quod vult, manum suam libero porrigat voluntatis arbitrio. Si enim desit voluntas libera, manus quoquam non porrigitur: sed eandem manum ad vitam nunquam porrigit homo, nisi eam Deus gratuita bonitate tenuerit. Propter quod dicitur &

Psal. 72. à Propheta, *tenuisti manum dexteræ meæ, & in voluntate tua deduxisti me.* Alio quoque loco ipsam manum dexteræ nostræ diuina dicit protectione saluari. Ait enim. *Dominus custodit te, Dominus protectio tua.* Ipse denuo orat, ut opera manuum nostrarum concessa super nos illuminatione Dominus dirigat. Ideo ait, *Sit splendor Domini Dei nostri super*

Psal. 89. *nos, & opera manuum nostrarum dirige super nos.* His atque huiusmodi testimoniis, quibus tam nouum quam vetus refertum est testamentum, tale esse hominis demonstratur arbitrium, ut siue ad inchoanda quæ bona sunt nihil possit, nisi ipsum gratia

diuina præuenerit; siue ad perficienda nullatenus sibi sufficere valeat, nisi gratia, qua præuenitur, eadem iugiter adiuuetur. Nec tamen, quia indiget iuuamine, ideo dicendum est non esse; nec quia est, ideo credi debet ad initium vel profectum boni sibi posse sufficere. Proinde si ad eloquia diuina humilis ac mitis accesserit animus, quod tunc potest, si ei humilitatis & mansuetudinis donum diuinitus conferatur, ablato velamine, quo intelligentior atque excelsior intellectus obtegatur, cordi contrito & humiliato sapientia conceditur. Scriptum est enim, quia *Dominus dat sapientiam, & à facie eius scientia & intellectus procedit.* Prou. 2. Quoniam igitur non est aliquod præceptum, quod non ideo Deus dederit homini, ut proficit voluntariè atque humiliter operanti: voluntas autem bona non nisi fide inchoatur, & caritate perficitur: fides verò & caritas diuinæ sunt munera voluntatis, quæ nisi voluntariè homo sibi donata susciperet, nec inessent homini, nec prodesse: ad hoc enim Deus voluntatē hominis præparat, ut sit, cui donū fidei & caritatis infundat. propterea fatendum est verū esse, quod sanctis docemur eloquiis, sola Dei misericordia saluari hominē, quia

- Psal. 30.* scriptum est , *Salua me in tua misericordia* , & hominem ratione vtentem tunc ad salutē perpetuam peruenire, si sua cucurrerit atq. laborauerit voluntate. Non enim frustra
- 1. Cor. 9.* dicit Apostolus , *Sic currite vt comprehendatis:*
- 1. Cor. 3.* & , *Vnusquisque propriam mercedem accipiet secundum suum laborem :* & , *Labora vt bonus miles*
- 1. Co. 15.* *Christi Iesu:* Et alio loco, *Itaque fratres, stabiles estote & immobiles , abundantesque in opere Domini, semper scientes quod labor vester nō est inanis in Domino.* Ad quem tamen laborem in Sapientiæ libro sibi poscit quidam auxiliū,
- sap. 9.* dicens ex totis præcordiis suis, *Deus parentū nostrorum, & Domine misericordiæ tuæ , qui fecisti omnia verbo tuo, & sapientia tua constitui hominem, vt dominetur creatura , quæ a te facta est, & disponat orbem terræ in equitate & iustitia & directione animi iudicium iudicet: da mihi sedium tuarum assistricem sapientiam.* Et paulo post, *Mitte illam de cœlis sanctis tuis , & de sede magnitudinis tuæ , vt mecum sit, & mecum laboret, vt sciam quid acceptum sit coram te.* Scit enim illa omnia & intelligit , & deducet me in operibus meis sobriè , & custodiet me in sua potentia , & erunt accepta opera mea. Veruntamen ne quisquam huic operi saltem orandi affectum quo sibi sapientiam posceret, non diuinitus arbitraretur infusum, paulo supe-

fiùs ait, se scisse quoniam aliter non potest
esse continens, nisi Deus det: & hoc ipsum ^{Sap. 8.}
tamen sapientiam esse dicit scire cuius hoc
donum esset. Vnde igitur est instructus vt
sciret, inde est excitatus vt oraret. Nec ite-
rum nisi voluntariè sciuit, nec nisi volun-
tariè orauit; quia & ad sciendum & ad de-
precandum Christi gratia ignarum & tor-
pidum hominis præueniens instruxit arbi-
trium. Misericordiæ igitur diuinæ est, vt
hominis liberum illuminetur arbitrium;
quo fit vt homo & ea, quæ placita sunt
Deo, cognoscat; & adiuuanti gratia offi-
cium sui laboris voluntaria deuotione sub-
iungat. Ad illuminandum hominis arbi-
trium dicitur, *Deus meus, misericordia eius* ^{psal. 58}
præueniet me. Ad adiuuandum refertur,
Misericordia tua subsequetur me omnibus diebus ^{psal. 22.}
vite meæ. Non autem præueniendo illumi-
naretur, si non esset: nec subsequendo ad-
iuuaret, si illuminatum ad aliquid sibi bonæ
cogitationis aut operis esse posset idoneū.
Hanc impossibilitatem sermo diuinus ostē-
dit, vbi ait; *Quis hominum poterit scire consi-* ^{Sap. 9.}
lium Dei? aut quis poterit cogitare quid velit
Dominus? Cogitationes enim mortalium timidae,
& incertæ providentiæ nostræ. Timidæ enim
sunt cogitationes mortalium, non lauda-

bili timore, sed vituperabili, non bono, sed malo. A quo nos timore liberauit ille, qui per mortem destruxit eum, qui mortis habebat imperium, id est, diabolus, vt liberaret eos, qui timore mortis per totam vitam obnoxij erant seruituti. Hanc seruitutem, de qua nos eripuit, atque libertatem, quam nobis gratis contulit redemptor noster, euidenter ostendit, dicens, *Si manseritis in verbo meo, Verè discipuli mei eritis; & cognoscetis veritatem, & Veritas liberabit vos.*

Ioan. 8. Respondentibusque Iudæis, quòd semen Abrahæ essent, nec cuiquam vnquam seruissent, responsione sua simul & seruitutis eorum mortiferam conditionem, & libertatis, quam ipse suis fuerat collaturus, ostendit protinus veritatem, dicens: *Amen, amen dico vobis, qui facit peccatum, seruus est peccati. Seruus non manet in domo in aeternum: filius autem manet in aeternum. Si ergo filius vos liberauerit, Verè liberi eritis.* Cogitationes ergo mortalium timidæ illæ vtique designantur, per quas peccato seruiunt, qui per totam vitam obnoxij sunt seruituti. De qua seruitute nos Dei gratia liberatos Paulus edocet dicens, *Cùm enim serui essetis peccati, liberifuiistis iustitiæ. Quem ergo fructum habuistis tunc, in quibus nunc erubescitis? Nam finis illorū*

ibid.

Rom. 6.

mors est. Nunc vero liberati à peccato, serui autē Deo facti, habetis fructum vestrum in sanctificationem, finem verò vitam æternam. Ecce quid nobis gratia Dei contulit; timidos liberauit, de quibus scriptura dicit, *Cogitationes mortalium timida*: illi procul dubio timori *sap. 9.* subiectæ, cui subditos quosdam sermo diuinus sic arguit, dicens, *Illic timuerunt timore, vbi non erat timor*. Hic est timor, quem *Psal. 13.* sæculi cupiditas ad reatum iniicit, ad suppliciū nutrit. Iste timor illos captiuos possidet, quorum cogitationes rebus implicitas incertis atque instabilibus tenet. Propter quod & ille, qui dixit, *Cogitationes mortalium timida*, statim subiecit, *Et incertæ prouidentia* *sap. 9.* *nostræ*. Incerta est enim prouidentia, quæ incertis rebus impenditur, & incertæ res, quarum certa possessio non tenetur. Quotidie possumus inuiti amittere, quod in æternum non possumus possidere. Tunc ergo sunt incertæ prouidentia mortalium, quando earum rerum amore animus tenetur innexus, quarum aut possessio possessori inuito potest adimi, aut possessioni nolens possessor auferri. Vnde autem incertæ prouidentia insint homini, subsequenter ostensum est, dicente scriptura, *Corpus enim quod corrumpitur aggrauat animam, & deprimat ser-* *Ibid.*

rena inhabitatio sensum multa cogitantem, & difficile æstimamus quæ in terra sunt, & quæ in prospectu sunt inuenimus cum labore. Postquam ergo nostræ mortalitatis scriptura nobis demonstraui ærumnam, subsequenter nobis diuinæ gratiam bonitatis insinuat, ut agnoscamus ynde nobis & scientiæ donum, & correptionis atque sanitatis beneficium conferatur. Sequitur autem ille, qui ea, quæ in terra sunt, difficile æstimari, & quæ in prospectu sunt, cum labore asserit inueniri, & dicit Deo, *Quæ autem in cælo sunt, quis inuestigabit? Sensum enim tuum quis sciet, nisi tu dederis sapientiam, & miseris spiritum tuum de altissimis? Et sic correctæ sunt semitæ eorum, qui in terris sunt, & quæ tibi placent, didicerunt homines, & per sapientiam sanati sunt. Quid est, didicerunt, & sanati sunt? Quid per sanctum Spiritum & per sapientiam Dei, quæ utique Christus est, hominibus dicit esse collatum, nisi quia tunc salubriter discimus quid facere debeamus, quando nos misericordia præueniens illuminat, & sanamur, ut quod illa præueniente discimus, eadem subsequente faciamus? Præuenit enim nos dum propitius fit Dominus omnibus iniquitatibus nostris: subsequitur nos, dum sanat omnes languores nostros*
Præuenit

Sap. 9.

Præuenit misericordia liberum hominis arbitrium, dum in nondum benevolente sola operatur exordium bonæ voluntatis; subsequitur, dum benè volenti subministrat auxilium, vt benè operando perueniat ad bonæ voluntatis effectum. Misericordia igitur præueniens cooperaturâ sibi hominis voluntatem sola præparat: subsequens autem cooperantem sibi voluntatē iuuat. Itaque præueniens in tenebris hominem constitutum gratis educit ad lucem, non solùm admonendo extrinsecùs, sed & intrinsecùs illuminationis gratiam largiendo. Dominus enim illuminat cæcos, faciens scilicet ex infideli fidelem, ex superbo humilem, ex aspero mitem, ex fornicatore castum, ex maleuolo benignû, ex truculento placidum, ex amatore mundi amatorem Dei & proximi, ex raptore rerum alienarum suarum postmodò largitorem. Sic misericordia Dei præueniente, & in corde hominis mirabiliter operante, qui diuitiis temporalibus carnaliter superbus extollebatur, humilis in timore Dei, pauper spiritu libenter efficitur: & qui asper erat, & inobediens diuinis antea sermonibus repugnauit, ad audiendum verbum mitis & quietus accedit: & qui du-

dum iniustitiæ crudelitatem indigesta crapulatus peruersitate ructauit, esuriens & sitiens satietatem iustitiæ concupiscit. Ita fit, vt pro peccatis etiam lugeat, in quibus antea mortifera delectatione gaudebat: operibus deinde misericordiæ indefinenter insistens, ipse quoque consequatur misericordiam, per quam perueniat ad coronam: fide quoque per caritatem, quæ sancta sunt laudabiliter operante, ad videndum Deum munditiam acquirat cordis, qui cogitationibus pridē sordebat obscenis. Hæc est mutatio dexteræ Excelsi, per quam humanum illuminatur arbitrium: hæc magna opera Domini exquisita in omnes voluntates eius. Sic in nobis Deus præparat adinventiones suas; quia ipse in nobis præparat, quod in nobis inueniat, dum arcum potentium infirmum facit, & infirmos præcingit virtute: idest, dum in hominibus, quos gratis saluat, præsumptionem humanæ virtutis infirmat, vt se infirmos agnoscant, & adiutorium diuinæ virtutis accipiant. Ista Deus in nobis misericorditer facit, dum pro malis bona retribuit, dum misericordia præueniente malis bona donat, vt ea in nobis misericordia subsequente custodiat. Cum enim iustificatis ac benè

volentibus præbet auxilium, suis utique donis subministrat augmentum: & ita confirmat quod operatus est in nobis, dum bonam, quam ipse tribuit, voluntatem torpere ac deficere non permittit in nobis. Proinde secundum Apostoli præceptum cum timore & tremore nostram salutem operamur, scientes quia Deus est, qui operatur in nobis & velle, & perficere pro bona voluntate. Neque sic putemus abutendum beneficiis gratiæ, ut absque bonis operibus torpeamus. Ab eis enim gratia profectò discedit, quorū caritas refrigescit. Audiamus itaque Apostolum gratiæ participem, gratiæ nobis opera demonstrātem. Ait quodam loco, *Quid ergo dicemus? permanebimus in peccato, ut gratia abundet?* Statimque respondet, *Absit. qui enim mortui sumus peccato, quomodo adhuc vivemus in illo?* Hoc igitur in nobis operatur gratia, ut peccato mortui, iustitiæ vivamus. Ideo rursus idem Apostolus ait, ut æstimemus nos mortuos quidem esse peccato, viuentes autem Deo in Christo Iesu Domino nostro. Gratia itaque diuina in humano arbitrio & mortem salubriter operatur & vitam: mortem scilicet criminum, vitamque virtutum. Ideo Deus dicit, *Ego occidam, & vivere faciam.* Dint. 32

Sicut ergo cū viueremus peccato, prauā voluntatem nostram praua opera sequebantur: ita nunc accepto beneficio gratiæ, & per hoc mutata in melius voluntate, non viuamus peccato, sed Deo. Ad hoc enim nobis cū mortis præiudicio frigidi essemus, datus est vitalis feruor sancti Spiritus, quem gratis accepimus, vt per gratiam Dei, & bonum velle, & bonum facere valeamus. Ideo nos Apostolus esse præcipit Spiritu feruentes, Domino seruientes. Non ergo nobis est à sancto labore cessandum, quibus diuinæ gratiæ non solum merces promittitur, sed & auxilium suffragatur. Et quia vnusquisque propriam mercedem accipiet secundum suum laborem, dignum est, vt benè facientes non deficiamus tam ab opere quàm ab oratione. Nec aliquid horum quæ benè facimus, aut voluntatis, aut possibilitatis nostræ viribus assignemus; ne inter eos merito superbiæ deputemur, qui ignorantes Dei iustitiam, & suam volentes constituere, iustitiæ Dei non sunt subiecti. quod profectò sapientia carnis est, quæ inimica est Deo, legi autem Dei non subiicitur: nec enim potest. Subsequatur igitur humilis voluntas hominis præcedentem, & comitetur subsequentem

miserecordiam redemptoris : quæ dum nos præcedit , ea quæ retro sunt obliuiscimur ; dum subsequitur , in ea , quæ ante sunt , extendimur . Ac sic ipsa gratia nos & anteriorum appetitum tribuens dirigit , & posteriorum recordationem subtrahens , ab arrepto cursu retardare non sinit . Facit præcedens vt sequamur ad brauium supernæ vocationis Dei : facit subsequens vt gloriamur in tribulationibus , scientes quod tribulatio patientiam operatur , patientia autem probationem , probatio verò spem , spes autem non confundit , quia caritas Dei diffusa est in cordibus nostris per Spiritum sanctum qui datus est nobis . Ipsa facit vt nec cupiditatibus capiamur illecti , nec aduersitatibus succumbamus inuiti . Ita misericordiæ subsequentiis opere in quantum mundo mortui efficimur , in tantum Spiritu mentis nostræ magis , magisque renouamur . Cœlestibus itaque mandatis obediens , quantum adiuuatur homo diuinitus , voluntariis nisibus elaboret . Quod verò in labore non deficit , quod rectis gressibus currit ; quod benè certat , quod fidem seruat , non suæ virtuti deputet , sed dono gratiæ in se ac secum operantis assiget . labori sancto studium bonæ volun.

- tatis impendat. quæ voluntas tunc bona est, si studium suum diuinæ largitatis munus esse non ambigat. Apostolus quippe Ti-
2. Ti. 1. motheum ad virtutem huius laboris hortatur, dicens. *Labora ut bonus miles Christi Iesu.* Se quoque amplius cæteris omnibus laborasse testatur dicens: *Abundantiùs illis omnibus laboravi.* Sed ut ostenderet se & fidei donum, & laborandi virtutem diuinæ gratiæ munere ac iuuamine consequutum, item dicit, *Qui priùs fui blasphemus ac persecutor & contumeliosus, sed misericordiam consequutus sum.* Opus autem eiusdem misericordiæ sic ostendit, dicens, *Consilium autem do, tanquam misericordiam consequutus à Domino, ut fidelis essem.* Ideo cùm dixisset, dignum se non esse vocari Apostolum, quia
1. Co. 7. persecutus esset Ecclesiam Dei, opus in se præuenientis ostendens, ait, *Gratia autem Dei sum, id quod sum.* Et ut ostenderet laborandi quidem donum gratiæ sibi largitate collatum, sequitur & dicit, *Et gratia eius in me vacua non fuit.* Quid est vacua, nisi otiosa? Ideo adiungit, *Sed abundantius illis omnibus laboravi. Non autem ego, sed gratia Dei mecum.* Ut esset igitur Paulus ex infideli fidelis, sola gratia operata est, quæ auersum conuertit, & infideli fidem, cùm infideli-
1. Co. 15.

tatis suæ merito fidem accipere non mereretur, attribuit. Atque ita voluntariè quidem Paulus credidit, voluntariè abundantius illis omnibus laboravit, sed & credere & laborare non posset, nisi desuper donum gratiæ in se ac secum operantis acciperet. Vt ergo gratia Paulum nolentem, incredulumque præuenit, vt bonā voluntatem haberet; ita coöperante ipso Paulo bonā contulit, collatamque à se iuuit per omnia voluntatē. Labor ergo Pauli propterea fructuosus fuit, quia laborem suum non suis viribus, sed gratiæ Dei, cuius confortabatur iuuamine, tribuebat; sciens quia laboris illius nec conatū haberet, nec consequeretur effectum, si defuisset & misericordia præuenientis, ac subsequēntis auxilium. Laboranti ergo voluntas non deerat, quam gratia non cessabat adiuuare, quæ dederat: & vt Paulus non deficeret in labore, virtutem volenti gratia subrogabat. Talis itaq. voluntas dignè merebatur & per se & pro suo labore mercedē, quia & in se & in suo labore non virtutē suam, sed diuinę cognoscebat gratiæ largitatē. Ideo deniq. omnia, quæ in bono poterat cogitare vel facere; quòd scilicet temperatè vtebatur prosperis, quòd etiam fortiter reluctabatur ad-

uerſis, non ſibi, ſed Deo, à quo confortabatur, humiliter atque veraciter assignabat. Dicit enim quodam loco, Scio & humiliari, Phil. 4. ſcio & abundare. Vbiq; & in omnibus inſtitutus ſum, & eſurire, & ſatiari, & abundare & penuriam pati. Omnia poſſum in eo, qui me confortat. Omnia ergo Paulus libero arbitrio poterat, ſed in eo, qui eum ex alto virtute induerat. De hoc dicit in quodā loco; In quo Colof. 1. laboro certando ſecundum operationem eius, quam operatur in me in virtute. Beatus itaque Paulus nec ſe miſericordia præuentum tacuit, vt fidelis eſſet: neque ſuo merito in ſe Chriſti gratiam habuit operantem, vt non ipſe à ſancto labore ceſſaret, Hoc enim gratia in eo operabatur, vt neque deſiciendo fieret torpidus, nec ſuperbiendo ipſi gratiæ eſſet ingratus. Proinde ſicut in pſalmo ſalubriter Pſal. 2. admonemur, ſeruiamus Domino in timore, & exulemus ei cum tremore, ſcientes quia Deus eſt, qui operatur in nobis & velle & perficere pro bona voluntate. Maximum eſt quippe diuinæ gratiæ adiutorium atque beneficium, vt illuminata mens hominis ſemper cogitet & præuentam ſe gratuita gratia, & indefinenter adiuuandam virtute diuina. Atque ita fiet, vt Deo largitori bonorum omnium atque cuſtodi ſcip-

sum homo competenter humilians & gratias incessanter agat, & orare non desinat. Gratias agat, quia præuentus est, vt conuerteretur auersus, vt illuminaretur cæcus, vt acciperet fidem incredulus. Oret autem, vt sanetur languidus, & adiutorio gratiæ confortetur infirmus. Ex tota igitur voluntate petat, vt accipiat; quærat vt inueniat; pulset vt aperiatur ei. Quod nullatenus faciet, si voluntatem accipiendi & inueniendi & intrandi non habet. Nec tamen in eo quod petens accipit, quærens inuenit, pulsans ingreditur, suis viribus assignet petendi, quærendi, & pulsandi officium, quia licet homo voluntariè petat, pulset, & quærat, nunquã petens accipere, quærens inuenire, pulsans intrare poterit, nisi sanctam prius voluntatem acceperit. Nam quidam, sicut sanctus *Iaco. 4.* Iacobus dicit, petunt & non accipiunt, eo quod malè petant, vt in cõcupiscentiis suis insumant. Et de quibusdam quærentibus se dicit Sapientia, *Quærent me, & non inuenient.* Ideo igitur neque illi petentes accipiunt, neque isti quærentes inueniunt, quia voluntatem terrenis deditã delectationibus gerunt, nec est in illis sapiëntia desursum descendens, sed terrena, animalis, diabolica. Vt autem bonum illud summum atque in-

commutabile homo petat & quærat, præparatur à Domino voluntas ac datur, quia initium petendi, quærendi, pulsandi non excorde hominis sed à Deo cõfurgit. Scri-

Prov. 4. ptum est enim. *Omni custodia serua cor tuum, ex hoc enim exitus vitæ.* Seruamus autem cor nostrum, si nos ille seruauerit, cui dicitur.

Psal. 13. *Cõserua me Domine, quoniam in te speraui.* Hinc est, quòd ipse vnigenitus Deus carnis humilitate suscepta compatiens infirmitati-

Ion. 17. bus nostris, patrem pro nobis orare dignatus est, dicens, *Pater serua eos in nomine tuo,*

Ibidem. *quos dedisti mihi: & iterum, Non rogo, vt tollas eos de mundo, sed vt serues eos ex malo.* Nunquã igitur homo congrua custodia seruat cor suum, nisi fuerit Deo custodiente seruaturũ.

Nisi enim Dominus custodierit ciuitatem, in vanum vigilant qui custodiunt eam. Pro-

pter hoc Apostolus Paulus diuinam pacem cordibus nostris optat adesse dicens, *Pax*

Philip. 4. *Domini, quæ exuperat omnem sensum, custodiat corda vestra, & intelligentias vestras in Christo Iesu Domino nostro.* Et cùm nobis Deus per

Hie. 17. Hieremiam dicat, *Custodite animas vestras: hoc se beatus Dauid adimplere non posse cognoscens, diuinam poscit animæ suæ custodiam, dicens, Custodi animam meam &*

Psal. 27. *libera me.* Qui rursus ait. *Tu Domine seruabis*

nos, & custodies nos à generatione ista in aeternū.
Et vnicuique fidelium diuinam optans impendi custodiam, dicit, *Dominus custodit te Ps. 120.*
ab omni malo, custodiat animam tuam Dominus.
Et vt iugiter gratiæ diuinæ necessariam nobis sciremus esse custodiam, sequitur & dicit, *Dominus custodiat introitum tuum & exitum tuum, ex hoc nunc & vsque in seculum.* Ad hanc indefinenter nos custodientem Dei gratiā refertur, quod in eodem Psalmo dicitur, *Ecce non dormitabit, neque dormiet, qui custodit Israel.* Sicut igitur omnia bona, inter quæ etiam voluntatem habemus, non nisi Deo largiente accipimus: sic omnia, quæ accipimus, non nisi Deo custodiente seruamus. Quæcumque sint enim bonæ vitæ munera in homine, tunc ab illo custodiuntur si bona in eo perseueret voluntas. Sed voluntas ipsa, cuius bonitate cætera bona benè habentur, riteque seruantur, tunc in homine bona, iustaque perseuerat, si eam custodiēs gratia diuina non deferat. Sicut enim nihil potest in se, habere bonæ cogitationis, nisi subueniēte gratia fiat bona: sic ad custodiēda, quæ accipit, nullatenus potest sua virtute sufficere, nisi ille, qui eam gratis bonam facit, gratiæ suæ opitulatione seruauerit. Ille verò certus est bonæ voluntatis profe-

Etus, si ea, quæ accipit à Deo, ita vigilanter, sollicitéque custodiat, vt custodiæ diuinæ adiutorium frequentia orationis & studio bonæ operationis exposcat. Ita fiet vt dum oranti auxilium tribuitur, laborans retributione boni operis non priuetur. Veruntamen & orandi & operandi quod bonum est, illis Deus tribuet perseuerantiam, quos prædestinavit ad vitam. Omne quippe datum optimum, & omne donum perfectum desursum est, descendēs à patre luminū: qui operum suorum æternam habens præsciētiā, non solum quæ daret, sed etiam quæ tribueret incommutabili dispositionis suæ consilio præparauit. Ideo non aliter implet disposita quam disposuit implenda. quia sicut dispositionis diuinæ ordinatio semper habuit, sic ordo rerum in diuinis operibus currit: in quibus sunt vniuersæ viæ eius, misericordia & veritas, quarum vna malis bona tribuit, altera bonis malisque digna retribuit: vna iustè coronat, iustéque condēnat, altera gratuita bonitate iustificat: quia quisquis gratia præueniente accipit iustitiā, non, nisi eadem subsequente peruenit ad coronam. Ista si fratres nostri secundum doctrinam suam, Deo adiuuante, percipiāt, nunquam conabuntur disputationibus suis

fic humani arbitrij virtutem infirmam defendere, vt gratiæ Dei conuincantur aduersantia sapere; cùm potius omnes, qui vitæ desiderant fieri æternæ participes, oporteat sanctorum Patrum diuinitus inspiratis informari & adhærere sententiis. qui gratiæ diuinæ sic illuminati sunt dono, vt indubitanter assererent in hominis voluntate nihil bonæ cogitationis oboriri, nisi quod beneficio gratiæ præuenientis infunditur, nihil in melius augeri, nisi quod subsequētis iuuamine roboratur, nihil benè consummari, nisi quod eadem operante atque opitulante perficitur. Hęc itaque catholicorum Patrum Apostolicis institutionibus tradita permanet in Ecclesiis sine aliqua dubitatione doctrina, quam Græci, Latinique pontifices, sancti Spiritus infusione firmati, vno atque indiffonabili semper tenuere consensu. In qua beatus Augustinus indutus virtute ex alto, abundantius illis omnibus laborauit: non autem ipse, sed gratia Dei cū illo. Ipsius enim ministerio Dominus vberiore huius rei fidelibus suis instructionē præbuit. Quippe adhuc ipso in corpore constituto Pelagiana hæresis aduersus gratiam Dei mortiferis ausibus rebellauit. Nec defuit in vita benignitas miserantis Dei, quæ

militem suum spiritalis gratiæ armis tanto fortiùs præcingeret, quãto acriùs aduersus eandẽ vasa iræ diabolus instigaret. Proinde memoratus Dei pontifex turrim fortitudinis ipsam gratiam tenens, & exinde cuncta hostilium machinamenta telorum cœlestis iuuaminis virtute confringens, non solum ipse de hoste victoriam referẽs triũphauit: quin etiam posteris certandi & vincendi ordinem, si quando victa prauitas recidiuo ausu infandum caput erigere nitetur, ostendit. Sensum quippe Christi habẽs, tam gratiæ Dei quàm humani arbiirij & officia discreuit & merita, semper diuinis humana subiiciens, & veraciter docens, diuinitus homini & gratuito iustificationis donum, & bonæ voluntatis exordium, & plenum tribui glorificationis effectum. Hunc legat omnis, qui salutem æternam adipisci desiderat, humiliter orans misericordiæ dominum, vt eundem spiritum intelligentiæ legens accipiat, quem ille accepit, vt scriberet: & eandem illuminationis gratiam adipiscatur, vt discat, quam ille adeptus est, vt doceret. Miramur autem non absque magna tristitia istos fratres nostros, qui gratiã Dei, quantum intelligi datur, ignorantes euacuare contendunt, hanc sibi similitudi-

nem ineptam reperisse, qua dicunt ita esse gratiæ Dei donum, tanquam si quis det mutuas pecunias, accepto ideo pignore, quod nisi custodierit, debitum accipere non possit. Sed hanc similitudinē quisquis ad Deū refert, proculdubio aut fallere conatur, aut fallitur. Deus enim noster, parabola proposita, simile dixit esse regnum cœlorū homini patri familias, qui proficiscens famulis suis pecunias congrua multiplicandas negotiatione commisit. Vbi tamen sic se ostendit dedisse pecunias, vt nullum se pignus diceret accepisse. Quinimo beatus Paulus in se loquentem gerens, à quo nobis sciebat pecuniam datam, ab ipso pignoris quoque gratiam testatur indultam. Ait enim: *Qui sumus in hoc tabernaculo ingemiscimus* 2. Cor. 4
granati, eo quod nolumus expoliari, sed superuēstiri, vt absorbeat quod mortale est à vita. Qui autem efficit nos in hoc ipsum Deus, qui dedit nobis pignus Spiritus. Ephesius quoque scribens, idem pignus his verbis insinuat: *Signati estis Spiritu promissionis sancto,* Ephes. 1.
qui est pignus hereditatis nostræ. Vt ergo in custodienda, multiplicandaque Domini nostri pecunia non essemus pigri, sed prouidi, spiritali sumus pignore præmuniti. Hoc pignus sine dubio seruus ille non ha-

buit, qui acceptam Domini pecuniam multiplicare neglexit. Deus ergo gratuito munere cui voluerit pecuniam suam, pignusque largitur. Ceterum nos nec ei aliquid dedimus, pro quo pignus acciperemus.

Quis enim prior dedit illi, & retribuetur ei? neque pignus illi pro pecunia dedimus. Sed & pignus & pecuniam ipso nobis tribuente habemus. quo pignore nos custodiante, non perdimus quod habemus: à quo etiam iugiter adiuuamur ut pecunias quas accepimus commoda negotiatione multiplicare possimus. Illum verò beati A-

Rom. 9. postoli locum, ubi de Deo dicit, *Ergo cuius vult miseretur, & quem vult indurat*, melius accipimus, si hoc nō ad interrogationis sensum, sed ad conclusionem sententiæ referamus. Agebat enim beatus Paulus Apostolus de gratuita misericordia, qua Deus, quos vult sine meritis saluat, & de iusto iudicio, quo cæteros irreprehensibili æquitate condemnat. Vbi primū de paruulis loquens Esaü & Iacob, ipse sibi proposuit quæstionem ex quibus sine aliquo propriorum duntaxat operum merito, quia dum nondum nati fuissent nihil egerant boni vel mali, cum ambos reatus originalis peccati teneret obstrictos, vni per indebitam mise-

misericordiam gratis est impensa dilectio, alteri per debitum iudicium iuste retributa damnatio. In hac igitur quæstione ipse sibi quod aduersitas inferre posset obiiiciens. *Quid ergo, inquit, dicemus? Nunquid iniquitas apud Deum? Statimq. respōdet, absit. Respōsionemq. suam legalis testimonij probatione confirmās ait, Moysi enim dicit, miserebor, cui misereor, & misericordiā præstabo, cuius miserebor.* Ad explicandam quoque promissionis suæ sententiam, sic conclusit: *Igitur non volentis neque currentis, sed miserentis est Dei.* Soluta verò quam de paruulis proposuerat quæstione, hominū quoq. iam ratione vtētium voluntates sola Dei miseratione conuerti, subiuncto Pharaonis ostēdit exēplo. Ait namque. *Dicit enim scriptura Pharaoni, Quia in hoc ipsum excitauit te, vt ostendam in te virtutem meam, & annuncietur nomen meum in vniuersa terra.* Geminamque sententiam, quam de paruulorum atque maiorum gratuita saluatione protulerat, vna conclusione firmavit, dicens, *Ergo cuius vult misereatur, & quem vult obdurat.* Vt autem hoc diceret, legalibus se fultum non nesciebat eloquiis, quibus Deum, & Moysi dixisse, *Miserebor, cui misereor, & de Pharaone dixisse, quod eius cor obduraturus esset, nouerat contra-*

neri. Denique vt agnoscat hęc sententia non ex obiectione proposita, sed ad conclusionem superioris propositionis illata, post eandem conclusionem ipse sibi beatus Apostolus hunc sermonem contradicentis obiecit, *Dicis itaque mihi: quid adhuc queritur? Voluntati eius quis resistit?* Solent enim homines in tenebris proprię cęcitatis extantes, cū audiunt gratia Dei pręueniri atque immutari hominum voluntates, videntque se pro tenebroso cordis peruersitate culpari, excusationi suę de iusta Dei voluntate iniustum captare suffragium, vt exinde maius recipiant punitionis augmentum. Accusant enim Deum, à quo gratiam non accipiunt: & seipsos excusant, qui Deū iustum vitio suę iniquitatis offendunt. Ipsi suis manibus inferunt plagas, ac medico nō dubitant irrogare calumniam, tanquā causa occisionis proprię non in illo sit, qui seipsū interficit, sed in eo, qui minus ei salubri curatione subuenerit. Medicina quippe non mortis, sed curationis est causa: cui vtrique non rectē mors adscribitur, si pessimo vulneri, quod sibi homo intulit, minimē prębeatur. Iustitię quippe est, si vulneratus ille relinquatur, vt mortem, quam sibi spontaneis operibus adsciuit, inueniat: miseri-

cordiæ autem, si ab eo medicus mortis perniciem beneficio gratuitæ orationis excludat. Tanto ergo iniquius medici benignitas infamatur, quanto minus spontanea perniciēs hominis seipsum vulnerantis attenditur: quam si in se querulus peccator intuens disceret, non diuinam voluntatem ad excusationem suæ iniquitatis opponeret, sed humiliter misericordiā postularet. Apostolus ait, *O homo tu quis es, qui respondeas Deo?* Vbi non sicut aliqui putāt, beatus Paulus in responsione deficit: sed cordis obdurati superbiam vtili satis increpatione cōpescuit. Dicens enim, *ô homo tu quis es?* admonuit, vt seipsum peccator superbus attendens, nec aliquid in suis operibus, quod Deo placeret, inueniens, à quo sibi videbat benè viuēdi manare præceptum, ab ipso in humilitate contriti cordis exoraret auxilium: sciretque sibi tantummodo succensendum, quicquid cogitatione vel operatione peccaret: voluntatemq. ac facultatem in fide, & caritate, iustè sanctèque viuendi, numquam homini nasci ex homine, sed diuinitus tribui gratuita largitate. Quæ voluntates hominum malas præueniendo mutat in bonas, vt impiis & iniquis peccata dimittat: easdemque bonas voluntates ad-

iuuando subsequitur, vt iustitiæ coronam
benè viuentibus reddat, quam non in hoc
sæculo, sed in futuro fidelibus suis largi-
turus est Dominus, dum vasis misericor-
diæ gratiam largietur, & vasa contumeliæ
æterno semper arsura deputabit incendio.
In quibus vasis misericordiæ atque contu-
meliæ, multum sensus istorum fratrum à
veritate discordat, quibus videtur ipsos
esse vasa misericordiæ, qui Ecclesiasticæ
siue sæcularis militiæ habent in hoc sæculo
dignitatem; clericos verò & monachos,
vel quoslibet laicos vasa esse contumeliæ.
Minus enim attendunt Dei bonitatem,
quæ vasa misericordiæ, quæ præparauit in
gloriam, à vasis iræ atque contumeliæ gra-
tuita dilectione discernit, in illuminatione
cordis, hoc est in fide, spe, & caritate con-
sistere: in quibus qui perseuerauerit vsq. in
finē, hic saluus erit. Ob hoc beatus Paulus
non cuiquam sæculari, siue Ecclesiastica
prædito dignitate, sed omni operanti bo-
num, gloriam & honorē, & pacem testatur
donari posse: & de vasis quæ in domo ma-
gna sunt loquens, non ait quia potior
quemquam dignitas vas honoris efficiet,
sed honorem verum mundatis asserit lar-
giendum. Sic enim dicit: *In magna autem*

domo non solum sunt vasa aurea, & argentea, sed & lignea & fictilia: & quedam quidem sunt in honore, quedam vero in contumelia. Si quis autem emundauerit se ab istis, erit vas in honorem sanctificatum, & vtile Domino ad omne opus bonum paratum. Beatus quoque Petrus ostendit per misericordiam Dei secundum quam vasa misericordie appellantur, quicumque saluantur, non dignitatem temporis in hac vita, sed donum regenerationis in fide, spe, & caritate conferri. Ait enim: *Benedictus Deus, & pater Domini nostri Iesu Christi, qui per magnam misericordiam regenerauit nos in spem viuam, per resurrectionem Iesu Christi à mortuis in hereditatem incorruptibilem, & incontaminatam, & immarcescibilem, conseruatam in cœlis, in vobis qui in virtute Dei custodimini per fidem in salutem paratam reuelari in tempore nouissimo, in quo exultabitis, modicum nunc, si fieri potest per tristitiam in variis tentationibus, ut probatio vestre fidei multo pretiosior sit auro, quod per ignem probatur, & inueniatur in laudem & gloriam & honorem, in reuelatione Domini nostri Iesu Christi: quem cum non videritis, diligitis, in quem nunc quoque non videntes creditis, credentes autem exultatis letitia inenarrabili & honorificata, recipientes finem fidei vestre salutem animarum. Videtis pastorem sanctum ouibus, quas ab*

I. Pet. I.

ipso principe dominoque pastorum alenda accepit, salubria spiritalis doctrinæ parabula providentem. Nempe ostendit, quia Deus hîc per magnam misericordiam suam in suis fidelibus operetur, scilicet regenerationē, non in spem sæcularis aut Ecclesiasticæ cuiuspiam transitoria dignitatis: sed in spem vitæ æternæ: nec in hæreditatem Imperialis, Pontificalisue militiæ, sed in hæreditatem incorruptibilem & incontaminatā & immarcessibilem: neque affectandam in terris, sed cōservatā in cœlis: nec in eos, qui sæcularis aut Ecclesiasticæ dignitatis adipiscuntur temporaliter culmen, sed in eos, qui in virtute Dei custodiuntur per fidem in salutem, non vti que iam perfectè concessam in hoc sæculo, sed paratam revelari in tempore nouissimo, *In quo, inquit, exultabitis: statimq. vitæ præsentis insinuans qualitatem, intulit: Modicum nunc, si fieri potest, per tristitiam in variis tentationibus.* Cuius verò utilitatis causa hæc fidelibus accidant, subsequenter insinuans, *Vt probatio, inquit, vestræ fidei multo pretiosior sit auro, quod per ignem probatur, & inueniatur in laudem & gloriam, & honorem.* Quando verò sit huius honoris & gloriæ speranda collatio, mox aperit, *in revelatione, inquit, Iesu Christi.* Quod

etiam vas electionis insinuans dicit, *Mortui enim estis, & vita vestra abscondita est cum Christo in Deo: Cum enim Christus apparuerit vita vestra, tunc & vos apparebitis cum ipso in gloria.* Quantum ergo pertinet ad huius temporis vitam, constat quia in Ecclesia nemo Pontifice potior, & in sæculo nemo Christiano Imperatore celsior inuenitur. Sed non ideo quilibet Episcopus vas misericordiæ putetur in gloriam præparatum, quia Pontificali militia fungitur: sed si pro grege sibi credito sollicitus semper inuigilet, prædicet verbum, instet opportunè, importunè, arguat, obsecret, increpet, in omni patientia & doctrina, nec sibi dominatum superbus vsurpare contendat; sed Apostolicis informatus eloquiis exemplū se cunctis exhibeat: nec si vilius altitudinis collatum sibi gaudeat temporale fastigium, sed si humili corde fidelibus præbeat bonæ conuersationis exemplum. Clemētissimus quoque Imperator non ideo est vas misericordiæ præparatum in gloriam, quia apicem terreni principatus accepit: sed si in imperiali culmine recta fide viuat, & vera cordis humilitate præditus, culmen regie dignitatis sanctæ religioni subiiciat: si magis in timore seruiat Deo, quàm in tumore

*Synod.
Parif.
an. 829.
Lib. I.
cap. 23.*

*Addit.
II. Ca-
pitul.
cap. 21.*

dominari populo delectetur: si in eo lenitas iracundiam mitiget, ornet benignitas potestatem: si se magis diligendum quàm metuendū cunctis exhibeat: si subiectis salubriter consulat: si iustitiam sic teneat, vt misericordiam non relinquat: si præ omnibus se sanctæ matris Ecclesiæ Catholicæ meminerit filium, vt eius paci atque tranquillitati per vniuersum mundum prodesse faciat suum principatum. Magis enim Christianū regitur ac propagatur imperium, dum Ecclesiastico statui per vniuersam terram cōsultitur, quàm cū in parte quacumque terrarum pro temporali securitate pugnatur. Nō ergo per quālibet sæculi aut Ecclesiæ dignitatem, sed per fidem, quæ per dilectionē operatur, vnusquisque vas in honorem dono Dei miserantis efficitur. Non enim saluator noster beatos voluit nuncupari habentes sæcularem aut Ecclesiasticam dignitatem, sed pauperes spiritu, mites, lugentes, esurientes, sitientesque iustitiam, misericordes, mundos corde, pacificos, & qui persecutionem propter iustitiam patiuntur. Nec Abraham patrem nostrum temporales honores vel diuitiæ ad Dei amicitiam perduxerunt: sed quia credidit Deo, reputatum est illi ad iustitiā, & amicus Dei

appellatus est. Nec pauperem Lazarum, ærumna paupertatis & famis afflictum, ab æterna requie inopia atque ignobilitas temporalis exclusit: sed virtutem, quam diuinitus Abraham diues accepit, ut in diuitiis pauper spiritu sanctè viueret; eandem accepit Lazarus, ut afferens fructum cum tolerantia translatus ab Angelis in sinum Abraham perueniret. Hoc autem ideo factum est, quia secundum sæculum alia copia Abraham diuitis, alia Lazari pauperis videbatur inopia: cæterum secundum Deum, & paupertatem sanctam cum Lazaro communem Abraham diues habuit, & diuitias sanctus cum Abraham Lazarus pauper indiuisa cõmunionem possedit. Deus enim pauperes elegit in hoc mundo, diuites in fide, & hæredes regni, quod promisit diligentibus se. Ipsa fide diuites fiunt omnes, qui scientes quia præterit figura huius mundi, mortui peccato, viuentes autem Deo, non in dignitate tēporali, sed in cruce Domini nostri Iesu Christi cum Apostolo gloriantur. Sæcularem quippe, siue Ecclesiasticam dignitatem, possunt & vasa misericordiæ, & vasa contumeliæ temporaliter adipisci, quia ista bonis sunt malisque communia: in cruce autem Domini Iesu Christi vera-

citer gloriari, proprium est vasorum misericordiae, quae praeparauit Deus in gloriam, quae & vocauit non solum ex Iudaeis, sed etiam ex Gentibus. Ista vasa veraciter Christi esse beatus Paulus intimat, dicens: *Qui autem sunt Christi, carnem suam crucifixerunt cum vitiis & concupiscentiis.* Quisquis hoc diuina illuminatus miseratione considerat, nullatenus audebit quoslibet laicos, quantacumque saeculari praeditos dignitate, mundi contemptoribus clericis ac monachis sanctè viuentibus praepone: ut illos vasa contumeliae appellet, à quibus diuinæ gratiae dono mundum ipsum contemptum videt atque calcatum; & illos pro temporali potestate putet esse vasa misericordiae, quos manifestum est in culmine saeculi constitutos, id est mundi huius religiosos principes, mundi contemptoribus. non solum Episcopis, sed etiam monachis, Christianae religionis obtentu, seipsos veraciter atque laudabiliter subdidisse. Ergo ne quisquā Christianus potest ita vas misericordiae dicere imperatorem Constantinum, ut vasa contumeliae Antonium appellet, & Paulum? Nonne si ipse beatæ memoriae Augustus Constantinus humanis rebus hactenus interesset, tam noxiam sui nominis laudem inter maximas contume-

lias deputaret? Aut beatum imperatorem Theodosium sic potest quisquam vas misericordiæ dicere præparatum in gloriam, vt Ioannem Thebæum monachum à vasis misericordiæ segreget, & vas in contumeliam factum peruersus affirmet: cum ipse gloriosissimus Imperator, cui Deus fidei merito, quam ipse donauerat, etiam indomitas subdidit gentes, tantam dicatur memorato viro Dei honorificentiā detulisse, vt nullatenus illarum præsumeret subire conflictus, priusquam fuisset Prophetica illius responsione firmatus? Ergo ne tantum virum religiosissimus Imperator vas contumeliæ fuisse credebat, in quo sic Deum humiliterque consuleret, & per quem sibi Deum vera respondentem ipso rerum effectū testante protinus agnouisset? Quis vero neget beatos Episcopos Innocentiū Romanum, Athanasium Alexandrinum, Eustachium Antiochenum, Gregorium Nazianzenum, Basilium Cæsariensem, Ambrosium Mediolanensem, Hilarium Pictauiensem, Constantinopolitanum Ioānem, Aurelium Carthaginensem, Augustinum Hipponensem, ceterosque pontifices, qui Ecclesias Dei vigilantissimè gubernantes, aut nascentibus, aut iam natis hæreticis ha-

bitante in se sancto Spiritu restiterunt, nec veteres lupos Ecclesiastico gregi permit- tentes irrepere, nec novos perniciosè intra ouile dominicum latitare; quis inquam istos neget vasa misericordiæ, quæ Deus præparauit in gloriam? Sed quis vsque adeo diuinæ fidei & caritatis inimicus, vt Paulū, Antonium, Ioannem, Hilarionem, Macariū, aliósq. similis vitæ ac sanctitatis monachos, in quibus & rectæ fidei veritas, & sanctæ conuersationis refulsit integritas, vasa contumeliæ non metuat appellare? Absit ab omnibus Christianis, vt talia de bonis seruis Dei credant. Quotquot spiritu Dei aguntur, hæc indignè non solum de monachis, qui se ipsos castrauerunt propter regnum cælorum, sed & de laicis coniugatis rectè credentibus, rectèque viuentibus suspicantur. Diuersus est quidem seminis fructus, quod hominis filio seminate, terra bona fecundo sinu suscipit nutriendum: nec tamen centenus solus, sed & sexagenus, & tricenus, vt in horreum congregetur, Deo nunc interiùs incrementum largiente nutritur. Dicit enim

Esaï. 56.

Deus per Prophetam, daturum se spadonibus, id est, virginibus, in ciuitate sua, & in muro suo honorem & locum meliorem

quàm filiis & filiabus. Sed & ipse in suo Apostolo loquens, honorem congruum continentix viduali & coniugali pudicitix, bonitatis suæ largitate concessit, dicente Paulo, *Viduas honora, quæ verè viduæ sunt.* ^{1.Tim.3} Et rursus, *Honorabile connubium in omnibus,* ^{Hebr.13} & *thorus immaculatus.* Itane Apostolus, qui in magna domo alia dicit esse vasa in honorem, alia in contumeliam, honorari viduas, coniugatosque præciperet, si eos inter vasa contumeliæ deputeret? Vasa quidem esse in honorem omnes, qui spre-
tis facultatibus in fide & caritate deseruiunt, nullus audet negare fidelium. Sed quis vasa contumeliæ dicere audebit illos, quibus ad dexteram constitutis ob hoc dicturus est Dominus, quia eum in suis minimis esurientem sitientemque pauerunt, vestierunt nudum, susceperunt hospitio peregrinum, visitauerunt infirmum, & in carcere constitutum? Quis istos omnes audeat dicere vasa facta in contumeliam, quos ipse figulus ituros in vitam testatur æternam? An fortè isti monachos & laicos deuotè Domino in suis gradibus ac professionibus seruientes, in hoc tantum sæculo vasa esse contumeliæ dicunt, quia eos affici contumeliis, tribulationibusque perspi-

ciunt ? Sed talia sentientes illa statim sequetur absurditas , ut ipsos primitus beatos Apostolos , gregis scilicet dominici gloriosissimos arietes, vigilantissimosq. pastores , vasa contumeliæ appellare cogantur.

Quos enim certius in Christi domo fratres isti vasa contumeliæ secundum suam sententiam nuncupabunt, nisi quos pro nomine Christi scriptura testante contumelias cognouerit pertulisse? Audiant igitur beatum Paulum Thessalonicensibus hæc lo-

1. Thess.

2.

quentem, *Nam ipsi scitis, fratres, introitum nostrum ad vos, quia non inanis fuit, sed antè passi & cōtumeliis affecti, sicut scitis, in Philippis, fiduciam habuimus in Deo nostro loqui ad vos Euan-*

1. Cor.

12.

gelium Dei, in multa sollicitudine. Corinthijs quoque scribens, ait, Libenter gloriabor in infirmitatibus meis, ut inhabitet in me virtus Christi. Propter quod placeo mihi in infirmitatibus, in contumeliis, in necessitatibus, in persecutionibus, in angustiis pro Christo. Et ut contumelias in hoc sæculo perpeti omnib. sanctis nouerint esse commune, audiant quid etiam de cæteris Apostolis liber ipse testatur, quem de actibus eorum Lucas Euangelista cōscripsit. Ibi quippe memoratur, quod Iudæi Apostolos in custodiam publicam missos, & Angelo ianuas carceris aperiente dimissos,

rursus adducentes cæde macerauerunt, cæ-
sisque denunciauerunt, ne loquerentur in
nomine Iesu, & dimiserunt eos. Vbi san-
ctus Lucas cum gaudio eos contumeliam
passos, his verbis insinuat, *Illi quidem gauden-
tes ibant à conspectu concilij, quoniam digni habiti* Act. 5.
sunt pro nomine Christi contumeliam pati. Sed
forsitan dicent ideo beatos Apostolos va-
sa contumeliæ non fuisse, quia illæ contu-
meliæ, quas pro Christi nomine pertule-
runt, semina fuerunt futuri honoris gloriæ,
quia per illas cõtumelias nec veritate fidei,
nec sanctæ conuersationis virtute priuati
sunt. Agnoscant ergo illos esse vasa contu-
meliæ, non qui in sæculo contumelias per-
ferunt, sed qui intra Ecclesiam corporali-
ter positi, quam magnam domum appellat
Apostolus, aut rectæ fidei contrariæ perti-
naciter vsque in finem sentiunt, aut sanctæ
conuersationis abiiciunt instituta: simulq.
cognoscant secundum beati Pauli senten-
tiam, quia si quis se mundauerit ab istis, in
quocunque gradu, in quocunque honore,
in quacunque fuerit professione positus,
erit vas in honore sãctificatum, & vtile Do-
mino ad omne opus bonum paratum, rece-
pturus futuræ retributionis beatitudinem
sempiternam ab illo iudice, qui in hoc sæ-

culo, quibus vult, gratuitam iustificationē donat, & iustificatis per fidem adiutorium gratiæ subministrat, quos in beatitudinem regni cœlestis donata glorificatione Angelicæ æqualitatis inducat.

B. FVLGENTII

EPISCOPI RVSPENSIS,

De Veritate prædestinationis & gratiæ

LIB. III.



AM nunc de illis, quos Deus prædestinavit in adoptionem filiorum, ordo suscepti operis cogit disputari: quos secundum veræ fidei regulam sanctarum scripturarum auctoritate firmatam, non solum ad præmiū glorificationis, sed etiam ad gratiam iustificationis, nec solum ad æternam beatitudinem, quæ non mutatur, verum etiam ad fidem, quæ per caritatem operatur; neque ad æterna tantum præmia, sed etiam ad bona merita gratuita bonitate Dei ante mundi constitutionē in Christo prædestinatos, & huius prædestinationis

destinationis beneficio secundum propositum vocatos & iustificatos, nullus debet ambigere Christianus. Quisquis enim veritatem prædestinationis diuinæ negare contendit, mutabilem Deum sine dubio prædicat, cui temporalium actuum humanorum temporalem cognitionem peruersus assignat. Nam si Deus incommutabilis est, quod dubitandum non est, omnia futura ex æternitate incommutabiliter nouit, & omnia opera sua incommutabili ordinatione disposuit. Nec potuit esse dispositionis eius aliquando mutatio, vbi dispositorum sine initio manet æterna cognitio. Proinde apud Deum sicut nunquam defuit futurarum præscientia rerum, sic nunquā defuit sempiterna & incommutabilis operum vel donorum prædestinatio futurorū. Apud ipsum quippe, in quo æterna incommutabilitas & incommutabilis æternitas manet, sicut inchoandarum rerum scientia nunquam potuit inchoari, sic mutabilium operum nunquam potuit æterna dispositio commutari. Deus itaque sicut nunquam futurarum rerū fuit inscius, ita nec misericordiæ aut iudicij sui fuit ignarus: sed sicut semper omnia futura & bona & mala præsciuit, sic omnia opera gratiæ

I

atque iustitiæ suæ incommutabili prædestinatione disposuit. Magna quippe altitudo sapientiæ & scientiæ Dei. Quibus diuitiis plenus, omnia futura & scienter cognouit, & sapienter præordinauit. Cui utique non inconuenienter dicitur : *Ecce tu Domine cognouisti omnia nouissima & antiqua.* Et quem veraciter futura opera sua iam fecisse beatus prædicat Isaïas dicens, *Qui fecit quæ futura sunt.* Futura quippe opera sua eo iam fecit, quo incommutabiliter facienda disposuit. Vnde rectè quicquid facturus est, iam ab ipso factum dicitur, in cuius operibus faciendis æterna dispositio & incommutabilis inuenitur. Virtus enim & sapientia Dei ex æternitate incommutabiliter omnia futura nouit, irreprehensibiliter vniuersa opera sua futura disposuit. Sic omnia quæ disposuit, irreprehensibiliter fecit. Non mutat Deus prædestinata, quia sapientia eius non fallitur, aut reprehenditur in dispositione: & perficit Deus prædestinata, quia virtus eius non impeditur aut superatur in opere. Hinc est, quòd Deus noster, cuius vniuersæ viæ misericordia & veritas, & cui veraciter misericordiam & iudicium cantat Ecclesia, quia nō solum omnia opera sua, quæ utique bona sunt exquisita in

omnes voluntates eius, sed etiam quædam hominum & angelorum opera mala quavis in tempore facienda, ipse tamen incommutabilis & æternus incommutabili atque perenni cognitione præsciuit, non solum ea disposuit, quæ ipse gratis quibus vellet donaret ut bonus; verum etiam illa, quæ & bonis & malis redditurus esset ut iustus. Prædestinavit ergo gratis iustificandos impios, & glorificandos iustos, quos præveniret & subsequeretur misericordia eius. Hi sunt secundum propositum vocati, hi sunt, quos Deus præsciuit & prædestinavit conformes fieri imaginis filij eius. Fieri autem à quo, nisi ab illo, qui eos Abraham promisit? cui Abraham confortatus fide gloriam dedit, plenissimè sciens quia quæcumque promisit, potens est & facere? Ipse itaque quos prædestinavit, fecit & facit conformes imaginis filij sui, qui est fidelis in omnibus verbis suis, & sanctus in omnibus operibus suis. De his Apostolus dicit, *Quos prædestinavit, hos & vocavit: & quos Rom. 8. vocavit, hos & iustificavit: quos autem iustificavit, illos & glorificavit.* Omnes isti prædestinati sic vocantur ut iustificentur, sic iustificentur, ut glorificentur. Ac per hoc

I ij

prædestinauit quos voluit, & ad opera bona, & ad præmia sempiterna: prædestinauit ad vitam bonam, prædestinauit ad vitam æternam: prædestinauit ad fidem, prædestinauit ad speciem; prædestinauit ad optandos in sæculo, prædestinauit glorificandos in regno: prædestinauit per gratiam faciendos primogeniti fratres, prædestinauit per gratiam perficiendos eiusdem vnigeniti cohæredes. Hæc omnia sicut in se continet, prædestinationis æternitas, sic implet prædestinantis Dei misericordia, & iusta maiestas. Neque enim ignarus futurorum vnquam esse potuit filiorum, qui vnico filio, quem sibi coæternum ac sine initio genuit, prædestinationis fratres præparauit. Nobis gratis gratiam præparans, gratis gratiam donans, quos iustificaret eligens in ipso ante mundi constitutionem, non ex humanis meritis, sed ex gratuito suæ proposito voluntatis: voluntatem suam bonam faciens causam iustificationis nostræ, non iustitiam nostram inueniens *Ephes. I.* causam voluntatis suæ. Testatur enim Apostolus, quia Dominus elegit nos in Christo ante mundi constitutionem,

Et ut ostenderet nos non ex operibus meruisse eligi, sed electionis dono bona merita percepisse, continuo subiunxit, dicens, *Ut essemus sancti & immaculati in conspectu eius.* Hæc electio fuit in æterna Dei præparatione, quæ per eius gratiam perficeretur in tempore. Hæc electionis æterna præparatio, ipsa est diuina prædestinatio: in qua dignè totum gratuito beneficio diuinæ bonitatis adscribitur, quia sola ibi erga nos miserantis Dei caritas inuenitur. Ideo subsequutus Apostolus, hoc nobis euidenter inculcans, ait, *Qui in caritate prædestinauit nos in adoptionem filiorum per Iesum Christum in ipsum.* Et ut totum ex solo proposito bonæ voluntatis Dei descendere doceret, adiecit: *Secundum propositum voluntatis suæ.* Et ut hoc propositum bonæ voluntatis Dei gratuitum esse monstraret, sequutus adiecit; *In laudem gloriæ gratiæ suæ, in qua gratificauit nos in dilecto filio suo.* Prædestinatio utique filiorum Dei ad hoc utiliter non solum cognoscitur, verum etiam prædicatur; ut in omnibus bonis humanæ voluntatis & operis, dum diuina prædestinatio in æterna gratiæ præparatione cognoscitur, eius-

dem prædestinationis effectus in ipsa gratiæ donatione nihilominus agnoscat: ac per hoc in ista filiorum Dei adoptione, quam Deus & prædestinando præparauit ex æternitate, & vocando, ac iustificando largitur in tempore, gratia Dei glorificetur, & ipsa laudetur. Elegit enim nos Deus in Christo ante mundi constitutionem, ut essemus sancti & immaculati in conspectu eius. Non ergo quos eligeret, aut sanctos, aut immaculatos inuenit, aut inueniendos esse præsciuit: sed ut sanctos & immaculatos faceret, ante mundi constitutionem elegit. Non ergo nos ideo elegit, quia sancti & immaculati futuri eramus, sed ut sancti & immaculati essemus. Et ideo nos in caritate prædestinauit, quia, ut nos prædestinaret, gratuita nobis effectum caritatis impendit. Prædestinauit autem nos in adoptionem filiorum per Iesum Christum in ipsum, non secundum meritum, aut voluntatis, aut operationis nostræ, sed secundum propositum voluntatis suæ. Et quoniam gratis à Deo hanc adoptionem filiorum accepimus, à quo gratis electi sumus, ut sancti & immaculati essemus, ideo in his omnib.

laudem gloriæ gratiæ Dei beatus Paulus insinuat: vt omnis, qui eiusdem gratiæ illuminatur munere, & verum gratiæ donum ex æternitate prædestinationis intelligat, & æternam Dei prædestinationem ex dono gratiæ spiritualis agnoscat. Cuius prædestinationis ita manet æterna firmitas & firma æternitas, non solum in dispositione operum, verum etiam in numero personarum: vt nec de illius numeri plenitudine quispiam salutis æternæ gratiam perdat; nec extra illius numeri quantitatem ad donum salutis æternæ perueniat. Deo enim, qui scit omnia, antequam fiant, sic non est incertus prædestinatorum numerus, sicut dispositorum operum dubius, apud eum non inuenitur effectus. Apud se habet certissimum numerum prædestinatorum ille, qui eos in adoptionem filiorum per Christum prædestinauit, quia in mensura & numero & pondere cuncta disposuit. Ipsos enim promisit Abraham dicens; *Respice in caelum, & numera stellas, si potes dinumerare eas, & dixit, Sic erit semen tuum.* &, *Credidit Abraham Deo, & reputatum est ei ad iustitiam.* De his dicitur Danieli Prophetæ, *Et in tempore illo saluus erit populus tuus omnis, qui in-*

Genes. 29

Dan. 12.

uenietur scriptus in libro. Ipsiſ utique ſaluator
 Luc. 10. noſter ait, *Gaudete quia nomina veſtra ſcripta
 ſunt in cœlis.* De hiſ in libro ſancti Danieliſ
 Dan. 12. dicitur, *Qui ad iuſtitiam erudiunt multos, ſul-
 gebunt quaſi ſtelle in perpetuas æternitates.* Iſti
 ſpiritualiter intelliguntur in Pſalmo, vbi di-
 Pf. 146. citur de Deo: *Qui numerat multitudinem ſtel-
 larum, & omnibus eiſ nomina vocat.* Proinde
 qui numerat multitudinem ſtellarum, non
 poteſt ſuorum ignorare numerum filiorũ.
 Illi ergo numero nec aliquiſ additur, nec
 aliquiſ demitur; quia ſecundum propoſitũ
 voluntatiſ ſuę Deus ſanctos ſuos prædeſti-
 Pf. 113. nauit, de quo ſcriptum eſt, *Quia omnia quæ-
 cunque voluit, fecit.* Ita nemo poteſt eiſ mu-
 tare prædeſtinationem, ſicut nulluſ poteſt
 eiſ vincere voluntatem. Quod ſi nume-
 ruſ ille certuſ non eſt apud Deum, aut di-
 uina ſcientia fallitur, aut voluntas diuina
 mutatur, aut diuina virtuſ aduerſitate qua-
 libet ſuperatur. Quod ſi aliquid horum
 ſoli poſſunt impij dicere, aut fortè nec im-
 piuſ aliquiſ audet horum dicere aliquid,
 nemo diuinam prædeſtinationem neget
 quandoquidem illiuſ Dei prædeſtinatio
 vera proruſ aſſeritur, cuiuſ ſcientia irre-
 prehenſibilis, & voluntas incommutabi-

lis, & virtus insuperabilis inuenitur. Ad hanc prædestinationem pertinet & gratuita iustificatio redemptoris, & iusta reductio iudicis. Ad hanc prædestinationem pertinet misericordia, quam Paulus consequutus est vt fidelis esset, & corona iustitiæ, quam reddet ei Dominus in illa die iustus iudex. Non solum autem Paulo, sed & omnibus, qui diligunt aduentum eius. Omnes enim, quos Deus prædestinavit in adoptionem, gratis hîc iustificantur ex impiis : quia Christus pro impiis mortuus est : & omnes peccauerunt, & egent gloria Dei, iustificati per gratiam ipsius. Quibus sicut per misericordiam præparauit gratuitum iustificationis donum, ita per iustitiam præparauit æternæ iustificationis præmium. Opus itaque gratiæ in omnibus prædestinatis gratuita misericordia inchoatur, & iusta retributione perficitur. Prædestinauit ergo Deus sanctos suos, & ad gratiam vitæ bonæ, & ad gratiam vitæ æternæ. Præparatam gratiam donat Deus, vt homines iustificentur, & benè viuant, & vitam æternam pro rectè factis accipiant. Ideo autem & ipsa vita æterna gratia Dei ab Apostolo dicitur, quia gratis homini-

138 *B. Fulg. De ver. & præd. Lib. III.*
bus vita bona datur. Præparavit autem
Deus etiam malis ignem æternum : illis
utique , quos iustè præparavit ad luenda
supplicia , nec tamen prædestinavit ad
facienda peccata. Prædestinavit enim
Deus quod diuina equitas redderet , non
quod ***.

Cætera desunt.



B. FVLGENTII

EPISCOPI RVSPENSIS,

De Trinitate, ad Felicem Notarium,

LIBER VNVS.



QVONIAM me, fili carissime Felix, fidei calore succensus sæpius percunctaris, quo modo de sancta Trinitate, quæ Deus est, credere debeas, vel qualiter possis fidem catholicam, atque orthodoxam contra hæreticorum errores, præsertim quorû societate frueris, Domino auxiliante defendere, ac per hoc eorû insidias euitare: necessarium tibi que commodum duxi tuis petitionibus respondere. Sed vtinam tam congruè ac conuenienter, quàm mihi est velle. Ipsa scilicet incommutabilis Trinitas, in cuius manu sunt & nos & sermones nostri, ad annunciandum se & sermonem rectum & fidem sinceram tribuat, quatenus sancto desiderio tuo stu-

dio discendi flagranti ad plenum satisfacere
 valeam. Illam itaque fidem crede sinceris-
 simæ menti tuæ nos velle notescere, per
 quam iustificati sūt Patriarchæ, Prophætæ,
 Apostoli, Martyres coronati: quam hæte-
 nus per totum orbem sancta tenet Ecclesia,
 cuius splendor credentium mentes illu-
 strans æternæ vitæ facit esse participes. Quæ
 vsque nunc per successionum seriem in ca-
 thedra Petri Apostoli Romę vel Antiochię,
 in cathedra Marci Euangelistæ in Alexan-
 dria, in cathedra Ioānis Euangelistæ Ephē-
 si, in cathedra Iacobi Hierosolymæ, ab
 Episcopis ipsarum vrbium prædicatur. Co-
 ge ergo Arrianos, Donatistas, Nestorianos,
 Eutychianos, Manichæos, & reliquas here-
 seôn pestes hisce communicare Ecclesiis,
 quibus Apostoli præfederunt: non consen-
 tunt, quia per prauitatem fidei ab Ecclesiæ
 vnitatē diuisi in parte esse voluerunt. Vnde
 & Ioannes Apostolus ait: *Ex nobis exierunt,*
 1. Ioan. 2. *sed non erant ex nobis. Quod si fuissent ex nobis,*
permanisissent vtiq; nobiscum. Ex nobis vtiq;
 exierunt, quia se ab Ecclesiæ vnitatē corde
 insanissimo separauerunt. Non erant ex
 nobis, scilicet prædestinatis, & ad æternam
 videlicet vitam electis. Non erant quippe
 Ioan. 15. ex his de quibus Dominus dicit. *Ego elegi*

vos, & posui vos ut eatis, & fructum plurimum
 afferatis, & fructus vester maneat. Sed nec in
 Abrahamæ semine benedicuntur, secundum quod
 Dominus ad Abraham ait: *In semine tuo bene-* Gen. 28
dicerentur omnes gentes. & Apostolus subnectens
 adiungit: *Nō in seminibus, quasi in multis: sed in* Gal. 3.
semine tuo, quod est Christus. Cum omnes ge-
 tes in Christo & per Christum in unitatem
 fidei benedici mereantur; hæretici non sūt
 benedicti, quia non habent unitatem fidei,
 sed erroris pastu saginati, per superbiam fa-
 cti sunt non filii Dei, sed filii diaboli. Vnde
 & obscuratos habentes cordis oculos, ne-
 queunt cernere totum mundum sanguine
 Christi redemptum, & in fidei unitate con-
 cordem, secundum quod de primitiua Ec- Act. 4.
 clesia designatur: *Erat illis, inquit, cor vnum*
& anima vna in Deum. Sic totus mundus re-
 demptus, sic totus mundus in cunctis gen-
 tibus nuncupatur redemptus. *Et timebunt* Psal. 101
gentes, inquit, nomē tuum Domine, & omnes re-
ges terræ gloriam tuam. Et iterum: *Omnes gen-* Psal. 85.
tes quasunque fecisti, venient & adorabunt corā
te Domine. & rursum. *Commemorabuntur, in-* Psal. 21.
quit, & conuertentur ad Dominum vniuersi fi-
nes terræ: & adorabunt in conspectu eius vni-
uersæ patriæ gentium. Quoniam Domini est re-
gnum, & ipse dominabitur gentium. Quid infe-

lices dicāt, qui præcisi ab Ecclesia Dei, corde impœniteni ipsi Ecclesiæ contradicunt; & dum eandem, quæ tunica Domini est inconsutilis, scindere nituntur, ipsi facilius scissi sunt? Hi percunctentur singillatim. Ille dicit sanguine Christi se esse redemptū. Ergo solum pro Arrianis, aut tantum pro Donatistis effusus est sanguis Christi? Absit. Non sic dicit Veritas. Non sic dicit Deus ad

- Gen. 29.* Abraham : *In semine*, inquit, *two benedicentur omnes gentes.* Non vna gens, sed omnis. Nō illa & illa, sed cunctæ. Sed neque in diuersas fides, sed in vna: dicente Apostolo, *Vna fides.* In vna scilicet fide saluantur credentes : per vnitatem fidei Ecclesia catholica habet cor & animam vnam in Deum. Hæc fides recta, quæ facit diuersa corda credentium vnū esse, Pauli Apostoli ore laudatur. *Gratias*, inquit, *ago Deo, quia fides vestra adnunciatur in vniuerso mundo.* Fides vna, quæ in totum mundum adnunciatur, ipsa laudanda ac prædicanda est. Accipe fidem, in qua iam olim renatus es credens in nomine Patris, & Filij, & Spiritus sancti. Pater filius non est, filius pater non est, Spiritus sanctus nec pater nec filius. Et cū tres sint, quod est, rogo, nomen vnū patris & filii & Spiritus sancti, in quo nos oporteat bapti-

zari, nisi illud scilicet nomen Deitatis, quod triplicari non potest? Quamuis enim dicamus patrem Deum, filium Deum, Spiritum sanctum Deum, tamen non dicimus tres Deos, quia scriptum est: *Audi Israel, Dominus Deus tuus unus est.* Vnus est igitur Deus Deut. 6; in natura, non in persona: quia alia est persona patris, alia filij, alia Spiritus sancti. Pater à nullo est genitus, filius à patre est genitus, Spiritus sanctus à patre filioque procedens est. Pater non sibi est, sed filio: filius non sibi est, sed patri: spiritus alicuius est adspirantis: ergo ad patrem filiumque refertur. Ista itaque relativa nomina Trinitatem faciunt. Essentialia verò nullomodo triplicatur. Deus Pater, Deus Filius, Deus Spiritus sanctus. Bonus Pater, bonus Filius, bonus Spiritus sanctus. Pius pater, pius filius, pius Spiritus sanctus. Iustus pater, iustus filius, iustus & Spiritus sanctus. Omnipotens pater, omnipotens filius, omnipotens & Spiritus sanctus. Et tamen non dicimus nec tres Deos, nec tres bonos, nec tres pios, nec tres iustos, nec tres omnipotentes: sed unum Deum, bonum, pium, iustum, omnipotentem, Patrem & Filium & Spiritum sanctum. Vbi est una natura, essentia, vel substantia. Quodlibet enim

de his nominibus in illa sancta summaque Trinitate dixeris, vnum idemque significat. Non est diuersa Patris & Filij & Spiritus sancti essentia. Quòd si esset, nec veraciter filius à patre gigneretur, nec Spiritus sanctus à patre filioque procederet. Sed quia verus est filius, id est de essentia patris genitus, verus est & Spiritus sanctus, à patre filioque procedens. Quòd si filius aut Spiritus sanctus alterius generis sunt quàm pater; nec filius veraciter patris est, quem extraneum facit differens essentia. Similiter nec Spiritus sanctus à patre, filioque procederet, quod dementis est dicere: quia sancta scriptura & filium à patre genitum, & Spiritum sanctum à patre procedentem, fidei manifestat narratione. Ergo sunt tria quædam coæterna, consubstantialia, coessentialia. Sed cùm quæreretur à patribus & diceretur, Quid tria? nec essentias, nec substantias, nec naturas dicere ausi sunt: ne aliqua fortè diuersitas crederetur essentiarum, aut naturarum, aut substantiarum: sed dixerunt tres personas, vnā essentiā: vti vna essentia declararet Deum vnum; tres autem personæ sanctam Trinitatem ostenderent. Nec hoc dicimus, quòd tantummodo Deus Trinitas sit, & non vna quæque

quæque persona. Nam & Pater solus Deus est, & Filius solus Deus est, & Spiritus sanctus solus Deus est. Solus dico, quia pater non est filius, & filius non est pater, & spiritus sanctus non est pater aut filius. Ceterum Trinitas, inseparabilis, incommutabilis, infinita, non recipit tres Deos, sicut non recipit tres essentias, aut substantias, aut naturas. & idcirco nullatenus dicendus est filius in id quod æqualis est patri, aut creatus ex aliquo, aut de nihilo substitutus: quia quod est pater, hoc genuit, Deus Deum, lux lucem, incommutabilis incommutabilem, infinitus infinitum, æternus coæternum. Similiter & de spiritu sancto credimus; quia hoc est quod ille à quo procedit. Videamus igitur deinceps, utrum hæc quæ diximus sanctarum scripturarum testimonijs adprobemus. Primum etiam quærendum est si Deus Trinitas sit. *Faciamus*, inquit, *hominem ad imaginem & similitudinem nostram*. Et rursum, *Venite, descendamus*, inquit, *& confundamus ibi linguas eorū*. *Nostram* verò, &, *descendamus*, pluralitatem personarum, non Deorum insinuat. Similiterque Abrahamæ visio trium virorum, & unius Domini deprecatio, &, *pluit Dominus* à Domino super Sodomam & Gomorram sul-

Gen. 1.

Gen. 11.

Gen. 19.

phur & ignem à Domino. Et, *Dixit Dominus Domino meo, sede à dextris meis: Et, Verbo Domini cœli firmati sunt, & spiritus oris eius omnis Virtus eorum.* Quid aliud hæc quàm Trinitatem ostendunt? Apertiusque sanè Dominus in Euangelio, *Ite, baptizate omnes gentes in nomine Patris & Filij & Spiritus sancti.* Et rursum, *Facta est vox de cœlo dicens, Hic est filius meus dilectus: ipsum audite.* Idemque ait, *Vidi spiritum Dei descendentem, & manentem sicut columbam in ipso.* En habes in breui alium esse patrem, alium filium, alium spiritum sanctum: alium & alium in persona; non aliud & aliud in natura. & idcirco, *Ego, inquit, & pater vnum sumus.* Vñ, ad naturam referre nos docet: *Sumus,* ad personas. Similiter & illud: *Tres sunt, inquit, qui testimonium dicunt in cœlo, Pater, Verbum, & Spiritus, & hi tres vnum sunt.* Audiat Sabellius *sumus*: audiat *tres*, & credat esse tres personas, & non sacrilego corde blasphemet, dicendo ipsum sibi esse patrē, ipsum sibi filium, ipsum sibi spiritum sanctum: tanquam modo quodam seipsum gignat, aut modo quodam à seipso ipse procedat: cū hoc etiam in naturis creatis minimè inuenire possit, vt aliquid seipsum gignere valeat. Audiat scilicet & Arrius

Vnum, & non differentis filium dicat esse naturæ: cum natura diuersa vnum dici nequeat. Filius itaque clamat, *Ego & pater* Ioan. 10
Vnum sumus, & *Qui me videt, videt & patrem*. Ioan. 14
Et Apostolus de eo, *Qui cum in forma Dei*, Philip. 2
inquit, *esset, non rapinam arbitratus est esse se æqualem Deo*. & *Propterea*, inquit in Euan- Ioan. 5.
gelio, *quærebant Iudæi Iesum interficere: quia non solum soluebat sabbatum; sed & patrem suum dicebat Deum, æqualem se faciens Deo*. Et Arrius blasphemio spiritu contradicit: Non sunt vnum, non sunt æquales, quia ipse filius de se dicit, *Pater maior me est*, & missum Ioan. 14
se se sæpenumero à patre testatur. O infelix error, pestiferaque doctrina, ignorans dispensationem hominis ob salutem generis humani temporaliter factam! Rogo, secundum quid maior est pater filio? secundum substantiam, an secundum potentiâ; an secundum bonitatem, an secundum incorporalitatem, an secundum æternitatem? Si innascibilis Dei patris vnigenitus Deus imago est; perfectæ atque absolutæ in eo substantiæ veritas inest; per quam efficitur esse eum imaginem veritatis. Potens est pater: sed si infirmus est filius, imago iam non est potentis. Bonus est pater: sed si in diuersi generis diuinitate filius est, boni

imaginem mali natura non reddet. Incorporeus pater est : sed si filius secundum spiritum circumscriptus est corpore, iam incorporei non est forma corporeus. Aeternus est pater : sed si filius non est coeternus, temporaliter patri nomen paternitatis accessit : & iam non omnia per Verbum facta sunt, quia reperitur tempus ante Verbum anterius, quando pater fuerit sine filio. Sed imaginem Dei patris Verbum, & omnia per ipsum facta scriptura euidenter declarat. An fortè ad hoc impiæ professionis suæ sensum propagat, vt spiritum sanctum bonum quidem, sed filium meliorem, & patrem optimum esse credat; aut spiritum sanctum potentem, sed filium potentiorum, & patrem potentissimum sensu sacrilego adstruat; aut sanctum spiritum iustum, sed filium iustiorum, & patrē iustissimum blasphemando edoceat? Ergo non tenetur sub vnius Dei professione: sed Ethnicorum more plurimorum Deorum cultui mancipatur: dum Deum patrem maiorem, filiūque minorem, & spiritum sanctum plusquam minorem, præsumptione temeraria suspicatur. Deum maiorem, & Deum minorem habeat error eorum, qui Israël esse nolunt, nec obturatis auribus

audiunt: *Audi Israël Dominus Deus tuus Deus unus est: & illud, Dominum Deum tuum adorabis, & illi soli seruias.* Sed ne fortè cæcato corde filium, aut spiritum sanctum Deum esse non credant, & more Iudæorum blasphemantium Deum esse abnegent, sacrarum litterarum testimoniis conuincantur. Quorum patres, inquit Apostolus, & ex quibus Christus secundum carnem, qui est benedictus Deus in secula. Et rursum Ioānes Apostolus: *Ut simus, inquit, in vero filio eius Iesu Christo. Ipse est verus Deus, & vita æterna.* Et de Spiritu sancto Ioannes Euangelista: *Spiritus, inquit, Deus est.* Et Apostolus dum Spiritum sanctum inhabitatorem Ecclesiæ diceret: *Nescitis, inquit, quia membra vestra templum est Spiritus sancti? Glorificate & portate Dominum in corpore vestro.* Et in actibus Apostolorum. *Anania, inquit Petrus, cur tentauit cor tuum Satanas mentiri te Spiritui sancto?* Et paulo post subiungit; *Non es hominibus mentitus, sed Deo.* En habet filium Deum, Spiritum sanctum Deum. De patre quòd Deus sit, non opus est adprobare, quem ille sine ambiguitate Deum credit. De filio autem, vel de Spiritu sancto omnis pene hoc sancta scriptura resonat: sed pro breuitate sermonis pauca inde decerpimus. Mi-

norem autem, aut missum filium secundū id credimus, quod & Apostolus ait, *Misit*

Galat. 4 *Deus filium suum factum ex muliere, factum sub lege.* Factum autem ex muliere, idest de virgine Maria natum: quia ille qui erat natus ex patre sine initio, de matre nascendo accepit certum temporis initium. Qui etiā

Philip. 2 *cū in forma Dei esset, inquit Apostolus, non rapinam arbitratus est esse equalis Deo, sed semetipsum exinaniuit formam serui accipiens, in similitudine hominum factus, & habitu inuentus ut homo, humiliavit se vsq ad mortem; mortē autē crucis.* Qui cū in forma Dei, ait, esset, idest cū substantia Deus esset, nō rapuit Deitatem, quam naturaliter habebat cū patre: sed semetipsum exinaniuit, id est, nō in id quod Deus est, & æqualis patri, generi humano apparuit: sed homine adsūpto, nō Deo cōsumpto, in vnitate personæ, & in hoc mundo apparuit, & passiones sustinuit, & affectiones humanas quas decuit & voluit sine vitio transcurrit. Secundum hanc formam humanam non est æqualis patri, dicente

Joan. 14 ipso, *Pater maior me est.* Secundum illam verò qua æqualis est patri, ait: *Ego & pater*

Joan. 10 *vnus sumus.* Secundum formam humanā, venit in mundum peccatores saluos facere: secundum diuinam, in mundo erat, & mū-

duſ per ipſum factus eſt. Et idcirco duas ſubſtantias, ſiue naturas, ſiue formas (quodlibet de his dixeris, idem eſt,) credere nos oportet in vno filio Dei; vnam profeſſò. Dei, alterã hominis: vt credatur Deus verus, & homo verus vnus filius Dei: ne ſicut Neſtorius, hominem ex virgine Maria natum quartam. perſonam introducentes, à Trinitate excidamus: neque vt Eutyches, hominem verum non credentes, filiũ Dei ſine hominis adſumptione, ideſt vnus ſubſtantię eſſe credamus: aut certè ex duabus ſubſtantiis vnam fieri potuiſſe ſubſtantiam arbitremur. Quia filius Dei, vt diximus, in vnitatem perſonę ſuę totum hominem adſumpſit, ideſt animam rationalem, & carnẽ: ſecundum quod dictum eſt per Prophetã, *Ecce virgo in vtero accipiet, & pariet filium, & Eſai. 7. vocabitis nomen eius Emmanuel,* quod eſt interpretatum, nobiſcum Deus. Homo igitur & Deus eſt, qui de Maria natus eſt: homo & Deus eſt, qui creuit ætate: homo & Deus eſt, qui cruci adfixus eſt, qui etiam reſurrexit, cæloſque aſcendit, ſedetque ad dexteram patris. Et quamuis propter vnitatem perſonę, Deus homo ſit, & homo Deus ſit: tamen ſecundum hominem Deus dicitur crucifixus, Deus dicitur paſſus, Deus

dicatur mortuus. Nam secundum id quod Deus est, impassibilis, immortalisque ritè creditur. Ergo manet in Christo vtraque natura veritatem seruans: ita vt nec humana in diuinam translata desinat esse homo, nec diuina in humanam transferatur, & desinat esse Deus. Sic igitur vt vna genita, creata altera: vna intemporalis, altera temporis: vna sine initio, altera cum initio. Et quamuis illa genita & intemporalis ad patrem & Spiritum sanctum pertineat: temporalis tamē & creata nullomodo: quia reuera quicquid naturæ est patri, gignendo dedit filio: quicquid naturæ ex tempore aut extrinsecus accessit filio, non redundat ad Patrem, neque ad Spiritum sanctum. Et cū sit vna substantia tota Trinitas, non ad totam Trinitatem homo Christus pertinet, nisi tantum ad filium. Nec enim fas est credere, patrem aut spiritum sanctum hominem adsumpsisse, aut secundum hominem passos fuisse. Spiritus autem sanctus, quanquam minor nusquam in scripturis reperiatur, tamen missus euidentissimè reperitur scriptus. Pro qua re sibimet heretici collum ligant, & coarctato ac potius suffocato intelligentiæ suæ spiritu, creatorem suum sanctum spiritum non agnoscūt, dum eum

creaturam esse definiunt. Si creatura esset, creator utique esse non posset; quia creatura creaturam non format de nihilo. Et *Genes. 1.* cum in Genesi hominem Deus ad imaginem suam dicat esse formatum, & Iob sese à sancto spiritu narret esse plasmatum. *Spiritus*, inquit, *diuinus qui finxit me*: *Iob. 33.* liquidè claret cooperatorem esse patri ac filio spiritum sanctum, & in hominis formatione, & in Angelorum similiter substitutione, secundum illud Psalmographi, *Verbo Domini cœli firmati sunt: & spiritu oris eius omnis virtus eorum. Psal. 32.* Si Deus est, si creator est, si baptismum consecrat, quare missus dicitur? Missus quippe in eo, quòd super Christum in columbæ specie venerit in flumine: quòd supra Apostolos venerit in igne. Ipsa quippe apparitio missio est. Nā ubi mittitur, qui ubique est? *Spiritus*, inquit, *Sap. 1.* *Domini repleuit orbem terrarum.* Et rursum: *Domine, quòd ibo à spiritu tuo, & à facie tua quòd fugiam? Si ascendero in cælum, tu ibi es: & si descendero in infernum, ades. Si sumpsero pennas meas in directum, & habitauero in nouissimo maris: etenim illic manus tua deducet me, & continebit me dextera tua. Psal. 138.* Nihil scilicet prætermisum est mundi, ubi non præsentiam totius Trinitatis esse monstraret. Quo modo

filium credimus missum secundum hominem, ita missum spiritum sanctum propter columbam vel ignem. Sed filius adsumptum hominem propter hominem ita suæ personæ coniunxit, ut esse semper habeat, nec vnquam desinat, aut aliquando finem accipiat. Spiritus verò sanctus ita columbam, vel ignem: ut factæ illæ visiones ex tempore esse postea desinerent. En habes propter quid dicatur missus spiritus sanctus. Sed iam satis sint ad corroborandam fidem tuam hæc pauca quæ diximus, quia pater & filius & spiritus sanctus vnus Deus sit. Non est certè creata natura, non terra, neque aqua, neque aër, neque ignis. Ex his enim elementis animalium compacta sunt corpora. Non est certè spiritus irrationalis, sicut est in pecoribus, neque spiritus rationalis, sicut est in hominibus, aut angelis: sed est Deus Trinitas immutabilis, creans omnia per bonitatem suam, creatus à nemine. Quis itaque potest, ut dignum est, & ut se habet illa infabricata forma, à qua formata sunt vniuersa, vel mente percipere, quanto magis eloquio proferre, nisi quòd ita creditur ac dicitur Trinitas Deus? Hæc autem Trinitas increata, creaturæ suæ indidit Trinitatis qualia-

cumque vestigia. Sic enim scriptum est, quòd omnia in numero, in mensura, & ^{Sap. 11.} pondere disposuerit. Omne scilicet corpus, siue paruum, siue magnum sit, & numerum habet pro quantitate partium, & mensuram habet, & pondus. nec esse possit numerus sine pondere; aut mensura sine pondere, & numero. Vbi cumque enim fuerit vnum horum, sine duobus esse non potest. Sed ecce in corporeis rebus faciliè adprobatur pondus, numerus, & mensura: quomodo in incorporeis rebus reperiri queat, videamus. Igitur in anima hominis memoria inest, consilium, & voluntas. Hoc enim cogitas quod vis, quod etiam memoria tua continet. Voluntas enim tua amor tuus est. Hoc enim recordaris, quod amando in cogitatione tua adducis. Tria sunt, memoria, consilium, & voluntas quam diximus esse amorem, & inseparabilia sunt, & vnum sunt, & alterum sine altero esse nequit. Quidam etiam Patrum eleganter hæc tria inesse dixit animæ, cùm Deū oraret. *Meminerim te, intelligam te, diligam te:* & in his Dei imaginem esse docuit. Imago quippe Dei humana anima, non genita, sed creata, non æqualis, sed similis. Hæc propterea breuiter insinuaui caritati tuæ, etiā

in rebus creatis aliqua signa esse illius summæ Trinitatis : vt euidenti ratione pateat, quantus sit error hæreticorum : vt cum in rebus creatis & Trinitas & vnitas sit, ipsam Trinitatem quæ Deus est, in vnitate naturæ esse non credant. Huius scilicet æternæ atque incommutabilis Trinitatis potentia creata sunt omnia. Sed excellentiorem, ac primam in creaturis ortam reperimus rationalem Angelorum naturam, de Dei sui dono beatam, & per liberum arbitrium beatificatam non iugiter adhærentem. Ex quibus quædam pars Angelorum, nolens sui creatoris facere voluntatem, ab eius cōtemplatione deiecta seruat in iudicio puniendi, Petro Apostolo dicente, *Deus*

1. Pet. 2. *Angelus peccantibus non perpercit : sed catenis inferni detractos in tartarum tradidit in iudiciū reseruati cruciandos.* Meritò quippe pœna ignis æterni in perpetuum punientur: quia si voluissent in sua perseuerare beatitudine, suffragabatur eis utiq. voluntas libera. Per quā voluntatem ad seipsos, non ad Deum conuersi, effecti per superbiam tenebrosi, & in huius aëris ima detrusi, seruantur in iudicium puniendi. nullum in eis voluntatis bonæ remansit vestigium. Illi autem, qui seruauerunt id quod facti sunt per idem li-

berum arbitrium, Deo scilicet creatori suo incessanter adhærentes, per id quod steterunt gratia Dei beatiores effecti sunt: sic etiam ut voluntas eorum, nec velle habeat peccare, nec posse. quoniam quamvis mutabiles facti fuerint per naturam, immutabiles sunt facti per gratiam. stabiles etiam & certi de sua beatitudine nullatenus amittēda, fruuntur Deo, cuius contemplatione beati sunt. Planè ex duplici eos esse substantia adserūt magni & docti viri, id est ex spiritu incorporeo, quo à Dei contemplatione nunquam recedunt: & ex corpore, per quod ex tempore hominibus apparent: adprobantes hoc ex illo loco Psalmi ubi dicit, *Qui facit Angelos suos spiritus, & ministros suos ignem urentem.* Corpus ergo Psal. 103 æthereum, id est igneum, eos dicunt habere: Angelos verò malos, id est demones, corpus aëreum. Ergo post lapsum malorū, & stabilitatem bonorum, placuit omnipotenti Deo aliam condere creaturam rationalem, libero arbitrio exornatam, per quā numerus ille Angelorum de cælo labentium qui perierat, suppleretur, hominum dico primorum, secundum animam ex nihilo, secundum corpus ex limo substitutorum: secundum animam; rationalem &

immortalem : secundum corpus verò , si non peccasset , immortalẽ ; si autem peccasset , mortalem : talem scilicet quod mori posset , dicente Apostolo , *Corpus quidem mortuum est propter peccatum* : quoniam pœna peccati mors inflicta est corpori. Excepta enim spiritus morte in id quod deferitur à Deo , hanc etiam accepit in carne : quia sicut vita est animæ , beatè viuere , id est frui Deo : ita mori , est corpore ab anima deferri. Harum mortium disparem pœnam expertus non esset , si non peccasset. Factus itaq. homo rectus , & ad imaginẽ Dei sui secundum rationem & intellectum factus atque formatus , legem accepit , quam non transgrediendo beatus esset , quoniam habebat liberum arbitrium , vt posset bonus esse si vellet : non quidem sine gratia Dei , qua ipsa regebatur voluntas , vt vellet ; & tamen in potestate eius erat ipsam gratiam deferre cum voluisset. Quia voluit , & peccauit , ob hoc etiam meritò damnaretur in æternum , atque omnis stirps eius in perpetuum cum Angelis præuaricatoribus puniretur , nisi gratia superueniret per Iesum Christum Dominum nostrum. Ipsius enim mors humanum genus à potestate diaboli liberauit ; quod quadam iustitia Dei ei tra-

ditum fuerat possidendum, & dominabatur in eis vt in filiis diffidentia, sicut Apo- ^{Ephes. 5.} stolus ait. Ergo mors Christi, quam sine peccato suscepit, vitam tribuit peccatori. Suscepit hominem vnigenitus Dei, & Verbum caro factum est, qui inter Deum & homines mediatoris fungeretur officio: vt quia per liberum arbitrium reuerti ad Deū minimè poteramus, per Deum hominem factum reuerti possimus. Per hunc mediatorem à diabolo gratis occisum ipse diabolus auctor mortis amisit quos idem mediator iudicio iudicauit occulto. Non igitur gloriatur homo de meritis suis: sed qui gloriatur in Domino gloriatur. Quid enim habet, quod non accepit? quòd si accepit, quid gloriatur quasi nō acceperit? Sic enim ipse Dominus ait. ^{Ioan. 8.} *Si vos filius liberauerit, tunc verè liberi eritis.* Liberatio nostra in eius arbitrio, in eius sita est voluntate. ^{Psal. 29.} *Quoniam ira in furore eius, & vita in voluntate eius,* ait Psalmographus. Vnde quòd damnatur reus, suis deputet meritis; quòd liberatur, gratia redēptoris. Nec hoc dicimus, quòd liberum arbitrium perdiderit humanum genus. Habet enim, antequam liberetur gratia saluatoris, ad malum non ad bonum proclive. Quapropter ipsum liberum ar-

August.
Enchir.
cap. 32.

bitrium gratia Dei liberatur ut bonum velit & possit. Ita enim quidam ex Patribus ait, quod gratia Dei pręueniat nolentem, ut velit; subsequatur volentem, ne frustra velit. Ac sic homo antequam sit fidelis, habet liberum arbitrium ad malum: habet fidelis liberum arbitrium & ad bonum, gratia Dei scilicet liberatum. Non utique immerito: ut pro malo opere pœnam, & pro bono vitam consequatur æternam. Gratiã igitur quam primus homo habebat ante peccatum, & gratiam, qua nunc redimuntur homines à massa damnata peccati, qui-

August.
de corr.
in gra-
tia, c. XI

dam discernens sic ait. Prima est enim, ut habeat homo iustitiam si velit. secunda ergo plus potest, qua etiam fit ut velit, & tantum velit, tantoque ardore diligat, ut carnis voluptatem contraria concupiscentem voluntate spiritus vincat. Nec illa quidem parua erat qua demonstrata est etiam potentia liberi arbitrij: quoniam sic adiuvabatur, ut sine hoc adiutorio in bono non permaneret, sed hoc adiutorium si vellet desereret. Hæc autem tanto maior est, ut parum sit homini per illam reparare perditam libertatem: parum sit denique, non posse sine illa vel apprehendere bonum, vel permanere in bono si velit, nisi etiam efficiatur

ciatur vt velit. Quid igitur in hac gratia prius est nisi fides, quæ nos ductura est ad speciem, vt scilicet id quod credimus videamus? Hanc etiam fidem non accipiet homo, nisi baptizatus fuerit in nomine Trinitatis: vt fidelis effectus, sciat quid vel unde petat, quærat & pulset vt inuenire valeat: Domino in Euangelio admonente, *Mat. 7.*
Petite & accipietis, quærite & inuenietis, pulsate & aperietur vobis, Non introducuntur nisi fideles, nisi baptizati fuerint in nomine Trinitatis. Nec omnes tamen qui baptizantur fideles salui erunt: quoniam reuera multæ hæreses hoc Trinitatis baptismo gloriantur, & eodem modò vt Ecclesia Catholica baptizari videntur: sed magno errore tenentur, dum fidei vnitatem scindunt, & toto orbi communicare nolunt: ac per hoc meritò damnabuntur. Nihil ergo eis prodest tingui in nomine Trinitatis, qui ipsum nomen deitatis indiuiduum diuidere temeraria præsumptione nituntur. Sanè cum compuncti corde ad Ecclesiam Catholicam humili pietate reuertuntur, non in eis iteratur baptismus quem iam acceperunt; sed per impositionem manus Ecclesiæ Catholicæ concilian-
tur. Quoniam sic custoditur illa sententia

Matth.
28.

Domini, *Ite, baptizate omnes gentes in nomine Patris, & Filij, & Spiritus sancti.* ut quamvis foras Ecclesiam, aut certè in Ecclesia à malo peruerso sacerdote secundum hanc regulam baptizentur, in eis nullatenus iteretur. Fides quippe, quæ per dilectionem operatur, à sancta Ecclesia Catholica habetur. Quam hæretici nullatenus habere probantur: quia reuera fides sola non sufficit, nisi Deum credens diligas Deum, præceptisque eius obedias. Obedire præceptis eius est non facere malum, & facere bonum; pugnare contra diabolum, qui cursum nostrum ad Deum tendentem impedire momenti singulis nititur. Vnde iuxta Apostolum, *tanquam leo rugiens circuit querens quem deuoret:* cui resistendum est in fide fortiter. Et licet quamdiu in hoc mundo mortaliter viuimus, sine peccato esse non possumus; tamen ne ullis criminibus implicemur, ut ad eius seruitium redeamus, & vasa eius effecti, rursus incipiat habitare in nobis. Quæ sunt criminalia peccata, & scriptura diuina, & mundanæ leges publicè puniunt: sed & conscientia tua quæ ab alio non vult pati non nescit. Sed si fortè post baptismum aliquibus criminibus inuoluti sumus, non pigeat pœnitentiam agere, &

1. Pet. 3.

contrito corde & corpore à Deo indulgentiam postulare. Nam qui sibi peccata impune videntur committere, dum fortasse aliquas eleemosynas in pauperes faciunt, multum falluntur. Nesciunt enim quòd opus misericordiæ primum sit, seipsum Deo offerre, & sic in alio misericordiam facere. Sic enim scriptura ait: *Miserere anima tua placens Deo.* & iterum: *Qui sibi nequam est, cui bonus?* Ergo faciendæ sunt eleemosynæ: sed antè sunt vitia relinquenda. Multù igitur differunt ab his, qui vestem suam candidam seruauerunt, qui tales vt renati sunt, auxiliante Domino, vsque ad finem exitus perseuerant: quibus quotidiana oratio sufficit ad soluenda minima delicta, quæ in hoc corpore mortali subripiunt; de quo se Apostolus liberari exoptat dicens: *Infelix ego homo, quis me liberabit de corpore mortis huius?* *Gratia Dei per Iesum Christum Dominum nostrum.* Nam & Dominus in Euāgelio tres fertilitates terræ ostendit, id est tres gradus bonorū in Ecclesia demonstrauit, tricesimū, sexagesimum, & centesimum. Vnde & arca Noe, quæ significauit Ecclesiam, bicamerata, tricamerataque fuit: significans, vt diximus, tres gradus, aut ordines: quos tractatores Ecclesiæ ad coniugatos, continentes,

Ecc. 30.

Ecc. 14.

Rom. 7

Matt. 13

& virgines retulerunt. Tricesimum scilicet ad coniugatos, sexagesimum ad continentes, centesimum ad virgines. Ita etiam Ecclesia catholica in his gradibus constituta est: ut quamvis tres sint gradus, multæ tamen differentia meritorum. Neque enim aut omnes virgines æqualiter accipiunt præmium regni cælorum, aut omnes continentes, aut omnes coniugati: sed *unusquisque propriam mercedem accipiet*, ait Apostolus, *secundum suum laborem*. Et quantum amplius alius alio obediens Deo fuit, tantum amplius mercedis accipiet. Et quæ erit ista merces, vel præmium, nisi ipse Deus præmium virtutis erit? Dixit quidam. Is qui virtutem dedit, qui dedit certatibus victoriam, ipse procul dubio erit corona. Quod intelligimus, tantum amplius alio in illa vita Deum videbit, quantum amplius in hac vita eum dilexit, præceptisque eius obediens fuit. Sed & in ipsa carne resurrectio mortuorum multæ erunt differentia claritatis, *1. Cor. 15* dicente Apostolo, *Alia claritas solis, alia claritas lune, alia claritas stellarum. Stella enim ab stella differt in claritate, ita erit resurrectio mortuorum*. Igitur quæcumque corpora aut ignis cōsumpsit, aut bestia deuorauit, aut aqua absor-
buit, illo momento tēporis atq. in ictu oculi

resurgent, in sexu vnusquisq. quo mortuus est. masculus itaque in masculino, & fœmina in fœminino. Quod verò resurgāt mortui, Dominus in Euangelio ait. *Non legistis* Luc. 20. *quod dicit Dominus ad Moysen de rubo, Ego Deus Abraham, & Deus Isaac, & Deus Iacob.* & subnectens adiungit. *Non est Deus mortuorum, sed viuorum.* Omnia enim viuunt ei & iterum: Tunc omnes, inquit, qui in monumentis sunt audient vocem filij Dei, & resurgent qui bona fecerunt in resurrectionem vitæ, qui verò mala egerunt in resurrectionem iudicij. Nam & alibi misericordiæ opera numerans, bonos & malos redarguens, hos dicit ire in supplicium æternum. Bonos etiam suscipiet gaudium sempiternum; vbi cum Deo suo sine fine regnabunt: & de sua stabilitate securi, nihil eos indecens delectabit. Vbicumque enim eorum spiritus erit, protinus in cœlo nouo & terra noua. Malos autem suscipiet ignis æternus, quos in perpetuū cruciabit. Vbi vermis eorum non morietur, & ignis non extinguetur. Ideoque, carissime, satagendum est, & iugiter Dei misericordia imploranda, vt sobriè, piè, iustè viuiamus in hoc sæculo, quatenus possimus cælorum peruenire in regnum.



EPISTOLA VICTORIS
AD B. FVLGENTIVM
Episcopum.



DOMINO beatissimo, & Aposto-
licis meritis coequando, sancto
Patri Fulgentio Episcopo, Victor.
Desiderata rei diuinitus attributū
tempus aduenit, quo nostra petitio
sortiatur effectum. Nefas enim fuerat, ut is qui
ad respondendum callidæ machinationi beatitudi-
nem tuam frequenter ipse petieram, differrem vo-
lentem: quod apud honestissimos mores mendacio
plerunq. deputatur, quidquid differendo promitti-
tur. Sed hoc sicut nobiscum vestra beatitudo melius
recognoscit, non voluntate factum est: sed spatiū
regionum diuersarum impedimentum detulerat,
quibus huc atque illuc in cassum ducimur. Vbi nul-
la salutis æternæ vitæ utilitas inuenitur: sed potius
ab ipsa futura vitæ utilitate exquirenda, mens di-
uersis occupationibus auocatur, ut cum tempus est,
diabolici timoris instinctu, aliquid quod ad salutē
æternam proficiat, quisque nostrum minimē agere

permittatur. Induimur enim diuersis cupiditatibus ac desideriis huius mundi, quæ subito tanquam fumus euanescent: & insanabiliter secularibus illecebris sic nostra deseruit intentio, ut tanquam si immutabiliter in hoc mundo viuamus, sic de futura eternitate, aut vitæ aut mortis periculo, quod utrimque est, minimè cogitemus: sed hoc tantum satagimus, quod in præsentì cognoscimus nostris desideriis adfuturum. Quantacunque enim vtilitas nostræ voluntati adcreseat, parum esse putamus, secundum illam B. Cypriani sententiam: *Lib. de mortali-*
tate. Quid aliud in mundo quàm pugna aduersu diabolum quotidie geritur? Et paulo post sequitur: Si auaritia prostrata est, exurgit libido: si libido compressa est, succedit ambitio: si ambitio contempta est, ira exasperat, inflat superbia, vinolentia inuitat, inuidia concordiam rumpit, amicitiam zelus abscindit. & cætera. peruidens vir venerabilis tantis animam inimici iaculis quotidie vulnerari: Unde non virtus propria, sed sola diuina poterit eruere misericordia. Propterea lacrymabiliter exoramus, ut pro nobis cum omnibus illis quos Domino acquisisti, ac mundanis squaloribus erutos ad spiritalem vitam conuerti fecisti, eius pietatem exorare digneris, ut nobis misericordie suæ lumen ostendat, ut non sumat vindictam de peccatis nostris, ut in delictis nostris non moriamur,

Ut exuamur à laqueis & compedibus inimici, ut
 non se gaudeat lucrasse animam, quam Dominus
 suo sanguine redemit. Sed hoc enixissimè obsecra-
 mus, ut nostram supplicationem tuis precibus iu-
 stis, nostrosque gemitus tuis sanctis fletibus ad-
 iungas, ut mereamur vestris intercessionib. futura
 vitæ subsidium reportare, ut qui peccatis mortui
 4. Reg. 4 sumus, vestris sanctis orationibus resurgamus.
 Aliter enim Eliseus Propheta suscitare non possit
 cadauer exanime, nisi refrenatis membrorum li-
 neamentis, illo se corpori faceret aequalem. Mi-
 norauit se paululum magnitudo, ut cum osculatur
 mortuum, implastraret animam, & redderet pue-
 rum viuum. Vnus se sternit, & duo consurgunt,
 & subito redditur incolumis genitrici, qui alieno
 spiritu reuixit. Et ego ita confido vestra interces-
 su me viuum Ecclesiae matri restitui, qui videor
 grauantibus peccatis mortis aculeo detineri. Scio
 enim quòd in iuuenili aetate vitæ, ante annos plu-
 rimos salutem animæ nostræ quasieris, Dominū-
 que ex hac re sepius postulaueris, ut me à ten-
 tationibus huius vitæ erueret. Et quia adhuc pec-
 catorum mole depressus mereri non potui, hoc de-
 precor, ut assiduis supplicationibus pro nobis Do-
 minam exorare digneris, ut quolibet ordine vel
 tempore delictorum nostrorum veniam assequa-
 tur. Et ne nostra flebilis ac diuturna oratio vestrae
 Paternitatis sensibus fastidium generet, illud nobis

iterum postulandum est, ut promissionibus vestris celer sequatur effectus: ac maligno operi illius, qui venerabilium monachorum spirituales vitam, & secundum saeculum quasi vilissimam, fastidiose contemnens, usque ad cedros Libani euolans se peruenisse gloriatur. Cuius nomen nisi fallor per ordinem verborum superiore versu evidentius videor expressisse, cuius tractatum direxi. Qui emendicatis hinc inde sermonibus, aduersum rectam fidem & catholicam veritatem visus est oblatrasse, & Homousianos (quos nos esse appellauit) & Donatistas obiectionum suarum iaculis quasi vulnerans, sibi postea catholicam vindicauit, sicut ex lectione diligenter vestra Paternitas aduertebit. Quare petimus, ut de mellifluis vestra paternitatis fonte istius Vanitas refellatur, auctorisque eius serpentis, cuius iste mala gramina pastus, quandam velut nouum errorem visus est pullulasse. Adsit luculenta responsio, & omnis aduersus Deum excogitata nequitia comprimatur: ne aliquid rectum aduersus dogmatis fidem, qui legunt eum dixisse reputent. Confundatur antiqui serpentis astutia, quia sibi tales praedicatores diuersis seditionum ac voluptatum illecebris aggregauit: eiusque vipeream venenosamque trifurcā linguam suis sanctis responsionibus dissipa. Qui non doctoris, sed potius adulatoris id temporis officio fungebatur falsitatis. Commentum quod suis posteris

dereliquit, te respondente eorum mentibus evanescat, quo aduersus Dei mysterium voluit militare. Propterea rogamus ut in hac parte, Domino adiuuante, bonæ famæ meritum, & præclarum omnibus extendas ingenium. Et quoniam præsens æstus aliqua recentia querit, desiderium mentis audacter expressi, antiquæ familiaritatis caritate possessus; & sicut præ cæteris Sacerdotibus mentibus & oculis intuentium fulges, ita te cupimus frequenter florulentis opusculis fulgentiorem, & nobis & omnibus gentibus apparere. Hoc pio fretus amore indocilis rerum scirpsi: sitiens cū nimio ardore ad fontem peritiæ, ac doctrinæ cum rustico meo eloquio alacer accucurri. Vnde nostrā sitim & imperitiā satiari cupimus, ut non solum futura vitæ præmium, sicut in primā fronte Epistolæ vestrarum orationum solatia conquiesui, merear adipisci; verum etiam huic operi in omnibus satisfactum fuisse gaudeamus. Ut non solum nos, sed & omnis conseruatorum nostrorum filiorum vestrorum religiositas, qui in te pio affectu dependent, & hoc de te nobiscum expectant, diuino muneri cum eis referam gratias. Et petimus ut nostræ rusticitati ignoscas, qui ut hac auderem ipse iussisti. Et licet nos aut exigua aut nulla doctoris scientia imbuat, accedit etiam, ut si aliquid corde conceptum retineremus, alijs occupationibus implicati, vsum pænè Latini sermonis amisimus,

secundum illud dictum, Pectora vestra duas non dimittentia curas. Sed ora ut Dominus præstet & faciat quod volumus. Guberna ergo & exorna famulum quem nutriti, & præsta doctrinam quam frequentius docuisti. Orantem pro nobis beatitudinē tuam diuinitas æterna custodiat, quod optamus Domine Pater.

SERMO FASTIDIOSI ARRIANI.



DICIMVS, prudentissimi fratres, quod nostra dignatur pusillitati diuinitas largiri. Deus iustitiæ est auctor & vitæ. immo ipse iustitiæ nostra & vitæ nostra. Nec ad peccatum fecit hominem, nec ad mortem; Scriptura dicente, Deus mortem non fecit; nec lata- sap. 1. tur in perditione viuorum. Quid ergo? mors accidit homini, quem fecerat Deus. Non enim dicitur creatoris, sed diaboli deceptoris. Postquam igitur à diabolo deceptus est homo, qui volens fecit iniquitatem, inuitus incurrit in mortem. præu- ricatus est iniuste, & punitus est iuste. Deus verò cum hæc vidisset duo in homine, culpā & mortem; vnam quam malè fecerat, alteram quā

iuste pertulerat ; cum his duabus validissimis catenis homo tenebatur innexus , præcepit ut carnem susciperet Dominus CHRISTVS , non in qua peccator debitor fieret , sed in qua sine peccati debito , mortem indebitè pro debitoribus sustineret. Non ut Dei filius iniquitatis vinculo ligaretur : sed ut homo peccator iniquitatis vinculo solueretur. Hoc est quod Apostolus dicit,

1. Tim. 3 Magnum pietatis sacramentum , quod manifestatum est in carne , iustificatum est in spiritu , apparuit Angelis , prædicatum Gentilibus , creditum est in hoc mundo , assumptum est in gloria. Et reuera , doctissimi Christiani , quæ maior potuit esse pietas , quàm ut pro carnalibus hominibus Dei filius , paterno parens imperio , humanam carnem susciperet , & vita mortem pro mortalibus sustineret ? & ille qui ante sæcula nascitur fundatus à patre , in nouissimo tempore nasceretur ex Virgine ? ille qui dat vitam mundo , iaceret mortuus in sepulchro ? Quantis ergo nunc descendum est lacrymis , vel quanta cordis afflictione lugendum , quòd plerique nunc usque durissimæ obstinationis nolunt peruicaciam deferere , dum assumptioni noxiæ indiscretè cupiunt deferuire. Qui cum salutaribus nequaquam remedijs acquiescant , vel correctionis voluntatem abijciunt ; vitalibus diætis tanquam medicinalibus ferramentis manus contrarias op-

ponentes, inde se vulnerant unde curari debuerant, ac vim spiritalium medicaminum sibi in contrarium vertunt: inde vulneribus suis augent putredinem, unde assequi potuerant sanitatem. Bipareitus namque pridem error irrepsit, qui hactenus perditorum animas vinciens, ad quærendam veritatem spirare non sinit; Homonianis asserentibus inseparabilem atque individuam Trinitatem, nec patri filium fuisse minorem, nec patrem ingenitum filij sui esse factorem. Donatistis etiam prædicantibus communionem aliorum bonos pollui, dum sanctæ Scripturæ munus medelam salutis procul abijciunt. Inter quos sancta mater Ecclesia catholica Davidico murmure noscitur decantare, sicut in præsentì cecinimus psalmo, Domine deduc me in tua iustitia *Psalm. 5.* propter inimicos meos. In tua enim deducor iustitia, dum te omnipotentem Deum, ingenitum atque increatum, filij tui Domini CHRISTI credo factorem. Ioanne Baptista testante, Post *Ioan. 1.* me venit qui ante me factus est. Et Petro Apostolo prædicante ac dicente, Sciet omnis domus Israël quia Dominum illum & *Act. 2.* Christum Deus fecit hunc IESUM quem vos crucifixistis. Salomone etiam ex persona CHRISTI prius declarante, Ante sæcula *Pron. 8.* fundavit me. Ecce factum, creatum, atque fundatum scriptura testatur, quem ita credere sacri-

legi detestantur. Item inseparabilem atque indi-
 uiduam, *ut superius dictum est*, adserunt Trini-
 tatem. Et si filius, de quo Evangelista dicit, Ver-
 bum caro factum est, & habitavit in nobis,
 obcelata paulisper Divinitatis potentia thala-
 mū virginalis uteri solus ingressus est, pròculdu-
 bio separatus à patre & spiritu sancto est. Sed ab
 vno nullatenus potuit Trinitas separari, quam
 constat omnino non diuidi, secundum ipsorum ab-
 surditatem. Ergo tota Trinitas carnem assumpsit,
 tota Trinitas passionum iniurias sensit, tota Tri-
 nitas in sepulcro iacuit, tota Trinitas inferos pe-
 netrauit, tota Trinitas tertia die à mortuis resur-
 rexit, tota Trinitas quadragesima die in coelos
 ascendit. Et ad cuius dexteram tota Trinitas se-
 det, vel quem spiritum die Pentecostes tota Tri-
 nitas in Apostolos misit, aut cui Deo tota Trini-
 tas in cælo dicere potuit, Deus, Deus meus,
 quare dereliquisti me, vel cui patri tota Tri-
 nitas ait, Pater, in manus tuas commendo
 spiritum meum, si possunt edicant. Quod si
 dicere nequeunt, ipsi se propriis iaculis perimunt,
 qui Trinitatem inseparabilem esse contendūt. Do-
 natiana quippe Vanitas non attendit ob hoc collatū
 hominib. baptismi beneficium, ut qui originaliter
 alienis grauātur erroribus, gratia medētis auxilio
 releuati, propria deinceps tantummodo baiularent;
 nec communio sacramenti, sed consensus damnaret

Unumquemque peccati. Quoniam sicut peccata parentum in tertiam & quartam generationem ait se Dominus redditurum, quia terrena carnalisque natiuitas originali delicto monstratur obnoxia: sic alio loco, sicuti animam patris, ita & animam filij suam esse testatur, ut secunda celestisque natiuitas alienis peccatis cognoscatur penitus absoluta. Statim namque infert: Anima Ezec. 18. quæ peccauerit ipsa morietur. Cui sententiæ Salomonis monitio concinit, nec alterum alterius grauari peccatis ostendit: Fili, inquit, si Prou. 9. bonus fueris, tibi & proximis tuis: si autem malus euaseris, solus hauries mala. Itaque Catholica fides: uniuscuiusque erroris prærupta refugiens, ac Domino reducente, viam itineris celestis incedens, sobria credulitate decantans ait, Domine, deduc me in tua iustitia propter Psal. 5. inimicos meos. Atque inde à Patre per Filium Spiritum sanctum flagitans, itineris rectitudine, cuius gratuito munere gradiendi adepta est facultatem, sicuti necdum baptizatos, non solum proprijs, verum etiam alienis peccatis fasetur obnoxios, quos in iniquitatibus nouit esse conceptos: ita genitalem ter lotos latice iniquitatis indemnes asserit alienæ, si voluntatis adensus non teneatur in crimine. Quotquot enim crediderunt in Ioan. 1. eum, ait Ioannes Euangelista, dedit eis potestatem filios Dei fieri: his qui credunt in

nomine eius. qui non ex sanguinibus, neque ex voluntate carnis, neque ex voluntate viri, sed ex Deo nati sunt. Sicut ergo ex voluntate carnis, atque ex voluntate viri exorti, aliena trahunt peccata, quamvis nondum habeant propria: ita ex Deo nati, si propriae voluntatis in eis culpa non fuerit, nulla asperguntur alienae iniquitatis iniuria. Quoniam sicut prima natiuitas edendo infixit, quod nascens non fecit: ita secunda abluto originali peccato natiuitas, in sola positum imputat voluntate delictum. In hac igitur parte à malis sequestrari debemus, in qua primitias spiritus habentes consepulti CHRISTO in baptismo resurreximus. In quo etiam veterem hominem, qui corrumpitur secundum desideria erroris, gratia Dei praeueniente & comitante, deponimus, ut nouum hominem, qui secundum Deum in iustitia, & in sanctitate caritatis creatus est, induamus. per Dominum.



B. FVLGENTII

EPISCOPI RVSPENSIS

Contra sermonem Fastidiosi Arriani, ad Victorem,

LIBER VNVS.



VM tuas litteras, carissime fili Victor, fidei & caritatis odorem suauissimum continentes, tota delectatione atque alacritate animi recenserem, subiectum reperi, quem mihi refellendum destinasti, Fastidiosi sermonem. Quo recensito, tanto dolui perditum, quanto magis sum compulsus exhorrere blasphemum; quem nouimus post Christianam fidem, post monachi professionem, post presbyterij honorem, quem in conspectu hominum cepit, & coram Domino non habuit, à via veritatis auersum, & suæ prorsus redemptionis oblitum, factum fuisse fornicationis ac luxuriæ seruum, & ex hoc respuere maiestatis diuinæ

M

seruitium. Inde est quod ex catholico factus hæreticus, ac de malo thesauro cordis sui proferens mala, contra rectam fidem, contra catholicam veritatem non immerito illum sermonem veneno impietatis crapulatus euomat: quando panem vitæ respuit, & salubrem veræ fidei cibum sui nominis indicio fastidiosus abiecit. In illo autem profano sermone vocans nos Homoufianos, quod nos Arriani assolent nuncupare, hæc verba posuit: *Homoufianis*, inquit, *asserentibus inseparabilem atque indiuiduam Trinitatem, nec patri filium fuisse minorem, nec patrem ingeneratum filij sui esse factorem.* Attende, quæso, in istis Fastidiosis verbis quædam sic malè posita, ut nūquam possint benè asseri: quædam sic ab illo impiè dicta, ut & bene possint, si tamen adsit pietas, & dici pariter & audiri. Illud enim quod nos arguendos putauit, quia inseparabilem atque indiuiduam Trinitatem dicimus, ita malè atque impiè protulit, ut hoc quisquam benè proferre non possit. Quis enim non videat quanta impietate ab Arrianis Trinitas separabilis asseratur? Beatus Apostolus de nobis di-

Rom. 8. cit, Quis nos separabit à caritate. CHRISTI? Tribulatio, an angustia, an periculum, an fames, an persecutio, an gladius? & paulo post: Certus

sum quod neque mors, neque vita, neque Ange-
 li, neque principatus, neque instantia, neque fu-
 tura, neque fortitudines, neque altitudo, neque
 profundum, neq. creatura alia poterit nos separa-
 re à caritate Dei quæ est in Christo Iesu Domino
 nostro. Cum ergo beatus Apostolus per
 gratiam Dei non nos posse ab ipsius separa-
 ri caritate confidat, quomodo se non sen-
 tiant laqueo mortifero impietatis innexos,
 qui S. Trinitatem separatam prædicare non
 dubitant, cuius opera in aliquo separabilia
 demonstrare non possunt? Nam in eo quod
 Euangelista de filio dicit: *Omnia per ipsum* Ioan. 1.
facta sunt, & sine ipso factum est nihil: &
 in eo quod B. David canit, *Quam magnifi-* Psal. 103
cata sunt opera tua Domine! omnia in sapientia
fecisti: Christum autem Dei virtutem &
Dei sapientiam beatus profitetur Aposto-
lus, de quo dicitur, Quia in ipso condita sunt Coloss. 1.
Uniuersa in cælis & in terra, visibilia & inuisi-
bilia, siue throni, siue dominationes, siue princi-
patus, siue potestates, omnia per ipsum & in
ipso creata sunt: manifestum est omnia ope-
ra patris eadem esse opera filij, eademque
esse opera Spiritus sancti. Inseparabiliter
quippe S. Trinitas operatur. nec est opus,
quod fecerit pater, & non fecerit filius:
aut quod fecerit filius, & non fecerit Spiri-

Psalm. 32. tus sanctus. Scriptum est enim, *Verbo Domini*
cœli firmati sunt, & spiritu oris eius omnis
virtus eorum. De sapientia quoque quam
Eccles. 1. nos in Angelis creatam dicimus, in Eccle-
*sia*stico libro scriptum legimus. Prior omnium
creata est sapientia, & intellectus prudentiæ ab
æuo. Ut ostenderet verbo Dei, per quod
 facta sunt omnia, etiam Angelos factos,
 continuò sancta Scriptura subiunxit: *Fons*
sapientiæ verbum Dei, & ingressus illius man-
data æterna. Et paulo pòst, ut ostende-
 ret Angelos ad opera Spiritus sancti per-
 tinere, ita dicitur: *Vnus altissimus creator*
1: Cor. 12 *omnipotens est, rex potens, metuendus nimis,*
sedens super thronum illius & dominans. Deus
 creauit illam Spiritu sancto. Quid igitur ab
 Spiritu sancto factum negabitur, à quo
 virtus cœlorum firmata legitur, & cuius
 opera creata sapientia prædicatur? Nam
 & de diuinis donis, quæ Deus Ecclesiæ suæ
 tribuit, cum beatus loqueretur Apostolus,
 & dixisset, *Diuisiones autem gratiarum sunt,*
*idem autem spiritus, & diuisiones ministratio-
 num sunt, idē vero Deus, qui operatur omnia in omni-*
bus: enumerata deinde donorum diuersita-
 te cœlestium, intulit. *Hæc omnia operatur*
vnus atque idem spiritus, diuidens singulis prout
vult. Quid autem in omnibus creaturis, in

quibus sapientia attingit à fine vsque ad finem fortiter & disponit omnia suauiter, ab operatione Sancti spiritus inueniri poterit alienum, cum se in spiritu Dei eicere dæmonia CHRISTVS, qui est Dei virtus & sapientia, protestetur? Ipse enim dicit: *Si autem ego in spiritu Dei eicio dæmonia, ergo peruenit in vos regnum Dei.* Matt. 12. Quomodo ergo Fastidiosus Trinitatem inseparabilem negat, cum opera Trinitatis eadem atque inseparabilia esse in creaturis omnibus, nemo negare audeat Christianus? Inseparabiliter quippe operatur vnus Deus, videlicet Pater, & Filius, & Spiritus sanctus. Eadem namque opera sua esse quæ patris sui, Dei vnigenitus protestatur, dicens: *Quæcumque enim pater facit, hæc eadem filius similiter facit:* Ioan. 5. Et tamen quæ filius facit, in Spiritu sancto facit, in quo dæmonia eiicit. Ne verò, pro eo quod diximus quòd & filius ex Spiritu sancto facit quæcumque facit, aliquam diuersitatis velint Arriani asserere quæstionē, putantes minorem debere accipi eum in quo aliquid fit, ab eo qui facit; audiant Saluatorem nostrum huic peruersitati omnimodo resistentem in eo quod dicit. *Qui autem facit Veritatem venit ad lucem, vt manifestentur eius opera, quæ in Deo sunt facta.* Ioan. 3. Hic eli-

gant Arriani , quomodo velint accipere Deum, in filio nominato, vtrum Patrem an Filium, an Spiritum sanctum? Si enim patrem putauerint accipiendum esse, in quo bona opera ab hominibus fiunt, ipsi destruunt quod personæ Spiritus sancti blasphemantes obiiciunt. Neque enim patrem audebunt minorem dicere, cui secundum diuinitatem nolunt æqualem filium prædicare. Ac per hoc, cùm in patre homo bona opera facit, & in Spiritu sancto CHRISTVS eicit dæmonia, cognoscant æqualitatem patris & Spiritus sancti. Si verò filium hîc accipiendum dixerint: ex hoc quòd in filio & in Spiritu sancto bona opera fiant, non solum compelluntur filium & Spiritum sanctum æquales fateri, verum etiam fatebuntur eadem atque inseparabilia esse opera Patris, & Filij, & Spiritus sancti. *Omnia enim operatur vnus atque idem spiritus*, sicut beatus Apostolus testatur. Si verò Spiritum sanctum æstimant Arriani, necesse est vt ex hoc loco compellantur Deum fateri Spiritum sanctum. Non enim dixit spiritus Domini, qui facit veritatem, vt manifestentur eius opera quæ in Spiritu sancto sunt facta, sed quæ in Deo sunt facta: quæ nos non in solo patre, nec in solo filio, nec in

1. Co. 12.

solo Spiritu sancto facta dicimus, sed in ipsa Trinitate sancta, quæ vnus Deus est, veritatem ab homine fieri confitemur in quo virtutem à fidelibus fieri beatus Dauid insinuat dicens, *In Domino faciemus virtutem:* *Psal. 59.*

& ipse ad nihilum deducet tribulantes nos. Ipse enim est vnus Deus, de quo B. Apostolus dicit, *Quoniā ex ipso & in ipso omnia sūt: ipsi gloria* *Rom. II.*
in sæcula. Quomodo igitur sancta Trinitas ab impiis, separabilis dicitur, cū inseparabiliter operatur: à quibus, quantum datur intelligi, nec in spiritu quod dicitur, separari, sicut rei veritas exigit, cogitatur? A Deo enim nostro, id est ab ipsa Trinitate sancta, nihil potest localiter separari. quia idē Deus summus verus & bonus, sicut omnia fecit, sic omnia continet & replet immēsus. Non est autē corporalis, neq. localis: & ideo nec ipsa corporalia possunt à Deo localiter separari. quia in loco est omnē corpus, & sine Deo nullus est locus. Deus enim sic nullo continetur loco, vt ipse contineat omnem locum: in quo moles est nulla, & cuius est virtus immensa. Cū igitur corpora, quæ sine loco esse non possunt, non possint à Deo localiter separari, proculdubio neque spiritus quos Deus creauit à Deo localiter separantur. Omnis enim spiritus,

quem creauit Deus in quocunque loco sit, ibi est Deus. qui licet in spiritibus malis non sit per gratiam, per quam quibus ipse vult vitam sanctam beatitudinemque largitur, per potentiam tamen naturalem in omnibus creaturis suis sic semper est, vt nulla creatura, vel particula creaturæ inueniri possit, in qua Deus per potentiam non sit. Illa igitur natura separari potest à Deo, quæ potuit aut potest subiacere peccato. Nec est alia res quæ possit à Deo discedere, nisi substantia quæ potest aut potuit propria voluntate peccare. Dicit enim Esaias: *Ecce non est abbreviata manus Domini, vt saluare nequeat, neque aggrauata est auris eius, vt non exaudiat: sed iniquitates vestra diuidunt inter vos & Deum vestrum.* In libro quoque sapientiæ ostenditur homines à Deo non locis, sed prauis cogitationib. & iniquis actib. separari. Ibi enim dicitur, *Peruersæ enim cogitationes separant à Deo. Probata autem virtus corripit insipientes, quoniam in maleuolam animam non introibit sapientia, nec inhabitabit in corde subdito peccatis. Spiritus enim sanctus disciplina effugiet fictum, & auferet se à cogitationibus, quæ sunt sine intellectu.* Hic autem quis non videat Trinitatem personarum proprietatibus intimatam? Dictum est enim, quoniam peruersæ

Esai. 59.

Sap. 1.

cogitationes separant à Deo. quo nomine persona Dei patris agnoscitur. Deinde adiectum est, quoniam in maleuolam animam non introibit sapientia. quo nomine Christus ostenditur, quem Dei virtutem & Dei sapientiam Paulus appellat. Deinde dictum est, quoniam Spiritus sanctus effugiet fictum, & auferet se à cogitationib. quæ sunt sine intellectu. Ne quis autem putaret, quoslibet iniquos aut impios ab ista sancta Trinitate, quæ vnus verus & bonus est Deus, localiter posse separari, paulo post scriptura sic loquitur. *Humanus est enim Spiritus sapientia, & non liberabit maledictum à labijs suis, quoniam renum illius testis est Deus, & cordis eius inspector verus, & linguæ illius auditor. Quoniam Spiritus Domini repleuit orbem terrarum.* Immensitatem itaque sanctæ Trinitatis diuina non cessant eloquia profiteri. Hanc vtique beatus Dauid certissimè nouerat, & ideo dicebat, *Quo ibo à spiritu tuo, & à facie tua quò fugiam? Si ascendero in cælum, tu illic es: si descendero in infernum, ades.* De sapientia quoque, id est Dei filio, scriptura dicit, *quoniam attingit à fine vsque ad finem, & disponit omnia suauiter.* Quoniam igitur à sancta Trinitate, quæ vbique tota est, nulla res localiter separatur; sed solæ separant

Psal. 138

Sap. 8.

à Deo, sicut iam diximus, iniquitates & perversæ cogitationes: quisquis Trinitatem separabilem conatur adserere, necesse est dicat, aut Patrem, aut Filium, aut Spiritum sanctum pravis cogitationibus & iniquitatibus posse naturaliter subiacere. Quis autem se ipsum laqueo tantæ impietatis euoluat, ut aliquam separationem in illa Trinitate, ubi naturalis est vnitas, suspicetur; cum per acceptam gratiam, sicut est superius à nobis demonstratum, confidat Paulus fidelis à caritate Dei, quæ est in Christo Iesu Domino nostro, posse nullatenus separari? Beatus autem Ioânes Apostolus & caritatem ex Deo esse, & caritatem

1. Ioan. 4 Deum esse confirmat his verbis: *Carissimi, diligamus inuicem, quoniam caritas ex Deo est, & omnis qui diligit ex Deo est, & Deus est caritas.*

Ibid. A seipsa utique separari non potest, quia inseparabilis est. Nam cum homines, qui à se possunt inuicem separari, non solum ipsa inseparata possideat, sed ex multis cordibus atque animabus vnum cor, vnamque animam faciat; quæ dementia est ipsam caritatem separabilem dicere, quæ separatas mentes inseparabili solet amore sociare? Hinc est utique quod Paulus dicebat:

Coloss. 11 *Nam etsi corpore absens sum, sed spiritu vobiscum*

sum, gaudens & videns ordinem vestrum. Et in actibus Apostolorum scriptum est, quia multitudinis credentium erat cor & anima vna. quod utique non scit nisi spiritus fidei & caritatis. Caritas enim Dei diffusa est in cordibus nostris. Et per ipsum spiritum fit vt omnes credentes, sicut Apostolus ait, sint vnum corpus & vnus spiritus. Vnde ipse *1. Cor. 1.*
alio loco dicit: Etenim in vno spiritu omnes nos in vnum corpus baptizati sumus, siue Iudei, siue Gentiles, siue serui, siue liberi, & omnes in vno spiritu potati sumus. Baptizari autem omnes gentes in nomine Patris & Filij & Spiritus sancti vnigenitus Dei filius ore suo mandauit. Cùm ergo baptisma datur in nomine Trinitatis, in vnum corpus fideles omnes baptizari facit, vt ex hoc vnum corpus omnes efficiantur, dicente beato Apo- *Rom. 12*
stolo, quia vnum corpus sumus in Christo, singuli autem alter alterius membra. Multitudinis quoque credentium fuit cor & anima vna per caritatem, quæ diffusa est in cordibus nostris per Spiritum sanctum, qui datus est nobis. Profecto apparet quanta impietate Trinitas ipsa separabilis dicatur, cùm utiq. à Deo quælibet creatura, non loco, non tempore, sed solis iniquitatibus separetur. Inde est quod de quibusdam dicit Deus,

Matth. 15 Populus hic labijs me honorat: cor autem eorum
Hier. 13. longè est à me. Et tamen ipse dicit, *Ego sum*
Deus approximans, & eorum Deus de longin-
quo: si absconditus fuerit homo, ego non videbo
eum? nonne cælum & terram ego impleo? Ipse
 tamen David dicit, *Ecce qui se elongant à te*
peribunt. Et ut ostendat quid sit elongare à
Psal. 71. Deo, adiecit, *perdidisti omnes qui fornicantur*
abs te. Corde igitur deceditur à Deo, ad
 quem & corde acceditur. Nam manifestū
 est Deum ubique totum esse, sed loco nul-
 latenus contineri. Spiritus est enim Deus,
 creator utique non creatus, omnium cor-
 porum omniumque spirituum factor in-
 commutabilis, æternus, immensus, iustus
 & bonus. Qui ab omnibus rebus quas fe-
 cit, nunquam discedit per immensitatem
 naturæ. Neque enim fieri potest ut alicui
 rei, quæ habet à Deo ut sit, ipse Deus per
 potentiam desit. Et tamen per misericor-
 diam & iudiciū, quo ei cantare non de-
 sistit Ecclesia, non incongruè dicitur & fi-
 delibus adesse, & infidelibus longe abesse.
 Nam quòd attinet ad naturam, quia totum
 quicquid creatum est, siue corporale, siue
 spiritale, sola sancta Trinitas, id est, vnus
 Deus, qui est Pater & Filius & Spiritus san-
 ctus, vna voluntate, vna operatione, vna

virtute, vna beneuolentia, vnaque omnipotentia fecit: sicut totam creaturam implet Pater, vtique virtute non mole, sic totam implet filius, sic totam implet Spiritus sanctus. Neque enim totam creaturam sic implet Trinitas, vt partem impleat Pater, partem filius, partem Spiritus sanctus, nec tamen tota impleatur à solo Patre, neque à solo Filio, neque à solo Spiritu sancto. Quis enim sic de Trinitate, id est, de vno Deo audeat sentire, non dico stultus, sed omnino sacrilegus, cùm virtus Dei atque diuinitas necesse est ita sit naturaliter immensa, sicut est naturaliter sempiterna? Sed homines carnalibus sensibus dediti etiam ipsum Deum non possunt nisi carnaliter cogitare. Et existimant Patrem & filium & Spiritum sanctum, sic posse ab inuicem separari, sicut à se homines separantur; qui sicut distinguuntur modo & quantitate vniuscuiusque corporis, necesse est ita discernantur & locis. Tales autem dum in luto carnis animas voluunt, creatis phantasmatibus suis, & grauati pondere vanitatis, quanto magis in illarum rerum cogitatione versantur, quæ corporeis oculis corpoream ingerunt molem, tanto minus possunt ad intelligendam conscendere deitatem. Nec atten-

dunt à Domino Deo per sanctum Esaiam præcipi, ne de illo sic cogitare velimus, sicut de creaturis, quas ab eo factas nouimus: quia nec ipse sic cogitat, sicut nos homines cogitamus. Vnde dicit Esaias: *Non enim cogitationes meæ, cogitationes vestræ, neque viæ meæ, viæ vestræ, dicit Dominus. Quia sicut exaltantur coeli à terra, sic exaltatæ sunt viæ meæ à vijs vestris, & cogitationes meæ à cogitationibus vestris.* Deus itaque Pater & Verbum eius, & Spiritus sanctus, id est, sancta Trinitas, solus, vnus, verus, & bonus Deus, sicut non est in eo cogitatio, quæ tēporis volubilitate varietur, (neque enim, sicut homines, aliter cogitauit priusquam mundum faceret, aliter cogitat postquam mundum fecit, aut aliter cogitaturus est postquam mundi huius figura transierit; quia consilium Domini manet in æternum) sic est inseparabilis, sicut incommutabilis. Trinitas enim vnus Deus, nec corpus est, nec creatus spiritus; quia corpus loco concluditur, & omnis spiritus qui creatus est, naturæ suo modulo terminatur. Trinitas autem vnus Deus, sicut est æternus, & nulla illi coæterna sunt tempora; sic est immēsus, quem nulla potest concludere creatura. & quia immensus, vbique totus: quia

nec continetur loco, nec distenditur aut contrahitur spatio. Deus itaque sapientia est, Deus veritas est, Deus caritas est. Hoc Pater, hoc Filius, hoc Spiritus sanctus, hoc ipsa Trinitas, qui vnus, verus, & bonus est Deus. Si quis ergo docere potest, siue in sapientia, siue in veritate, siue in caritate aliquam diuisionem esse, audeat indubitanter & asserere Trinitatem. Si verò nec sapientia, nec veritas, nec caritas aliquatenus diuiditur, ex hoc vtique Trinitas indiuisibilis atque inseparabilis agnoscitur. Apparet igitur magnā fuisse Fastidiosi impietatem, qua nos in eo putauit omnino culpan- dos, quia fatemur inseparabilem atque indiuiduam Trinitatem. Cū vtique, sicut præcedens disputatio docuit, quam non solum ratio, sed & testimoniorum sufficiens diuinorum copia roborauit, nec loco contineri queat natura Trinitatis immensa, nec peccato subiacere possit quælibet in Trinitate persona, quia ipsa Trinitas est naturaliter æterna, perfecta, incommutabilisque iustitiæ. Minorem verò filiū hæretica quidem prauitas malè asserere nititur. Pietate seruata verò catholica veritas æqualem cōfitemetur. Hæretici quippe incorpoream Diuinitatē nō nisi corporaliter cogitantes, cū

secundum naturam dicunt filium minorē,
 sub imagine Christiani nominis quam fal-
 laciter prætendunt, idololatriæ nefando
 crimine semetipsos inuoluunt. Quid est
 enim Deum maiorem & Deum minorem
 in singulis personis dicere, nisi diuersi ge-
 neris diuersæque virtutis Idola, non in pa-
 rietibus, sed quod deterius est, in cordibus
 collocare? Hinc enim se duos Deos colere
 Arriani euidenter ostendunt, dum æqualē
 Patri filium negant; & eum minorem, non
 assumptione carnis (quod fidei veritas ha-
 bet) sed natura immensæ diuinitatis asseue-
 rant. Cū de ipso dictum sit, qui sapientia
 Sap. 7. Dei est, *Qui candor est lucis æternæ*. De quo in
 Hebr. 1. epistola ad Hebræos dicitur, *qui cū sit splen-*
dor gratiæ, & figura substantiæ eius. Attendant
 autem candorem lucis æternæ, & agnoscāt,
 quia sicut illa lux æterna est & immensa, ita
 suum quoque candorem nec posteriorem
 naturaliter habet aliquatenus, nec minorē;
 sed æternitas immensitatem, æternitatem
 immensitas æqualem. Fides igitur Christia-
 na, quæ nouit vnigenitum Deum & de Pa-
 tris natura solū natum, & de virgine Ma-
 ria creatum, cognoscens in eo veram ma-
 nere vtramque substantiam, sic eum verē
 de patre Deo Patri confitetur æqualem, vt
 sine

sine mēdacij atque impietatis crimine prædicet & minorem. Nam quia vna est illi naturalis cum patre diuinitas, & vna cum matre naturalis humanitas: in eo est æqualis patri filius, in quo de patre verus est Deus, & in eo est pater maior filio, in quo ipse vnigenitus Deus verus est homo. Ipsa est ergo fides vera, ipsa pietas sancta, ipsa credulitas Christiana, in vno eodemque Dei filio, & naturam paternæ diuinitatis credere, & maternæ humanitatis substantiam non negare. Nec diuersam credere diuinitatem Filii à diuinitate Dei Patris: nec separari humanitatē filij ab humanitate virginis genitricis: sed in eodem vero Deo veram totamque credere nostri generis humanitatē, & in eodem vero totoque homine veram plenamque paternæ naturæ credere deitatem. Qui enim substantiæ Patris in filio denegat vnitatem, Arriana impietate polluitur: qui autem negat veritatem carnis in vnigenito Deo, Manichææ pestis crimine profanatur. qui verò negat in eodem Dei filio humanam, id est, rationalem animam, Apolinaristarum sacrilegio protinus inquinatur. Quocirca paternæ maternæque naturæ in vnigenito Deo veritate ad plenitudinem credita, & in vna Christi persona ge-

minæ substantiæ naturali proprietate seruata, piè veréque Patri filius æqualis & minor dicitur, piè veréque coæternus & posterior prædicatur, piè veréque & semper natus, & in tempore natus, & semper incommutabilis, & in tempore mutatus adseritur. Est itaque filius æqualis Patri, quia hoc semper habet ex Patre. Est etiam Patre minor, quia hoc temporaliter accepit ex virgine. Quocirca sicut piè filius æqualis dicitur Patri, quando in eo humanitas, qua Patre minor est, non agnoscitur: sic impiè minor idem filius dicitur, quando in eo naturaliter cum Patre diuinitatis vnitas & æqualitas denegetur. Dicimus ergo filiū naturaliter æqualem, dicimus & minorem. Dicimus secundum formam Dei æqualem natum: secundum formam verò serui habitu minoratū. Dicimus æqualem Patri, in quo cognoscimus sine initio natum de Patre: dicimus & minorem, quia cū venit plenitudo temporis, misit Deus filium suum factum ex matre, factum sub lege. Proinde sicut indubitanter prædicamus natum, sic vtique prædicamus & factum. Dicimus enim sine initio natum de corde patris: dicimus in tempore factum opere Trinitatis. Filium enim suum propriū & de sua natura pater

genuit, & de natura virginis fecit. Quid-
 quid autem fecit, cooperante filio & spiri-
 tu sancto fecit. Filium ergo suum solus
 quidem pater genuit, sed non solus fecit.
 In filio enim vnigénito solius æterna ge-
 neratio patris: & in eodem filio facta vna
 totius operatio est Trinitatis.. Creator
 quippe hominis vnigenitus Deus, creatus
 est homo; & idem qui de viro mulierem fe-
 cit, de muliere vir factus est. Vnde appa-
 ret, quia testimonia, quæ de Euangelio, &
 de Actibus Apostolorum, ac Salomone
 Fastidiosus impiè protulit, non vnitatem
 paternæ naturæ filio adimunt, sed sacra-
 mentum diuinæ incarnationis ostendunt.
 Quod certissimè sciens Ioannes Baptista,
 dixit: *Hic est de quo dixi, Post me venit, qui* Ioan. 1.
ante me factus est. Cuius sacramenti verita-
 tem prædicans Petrus Apostolus ait, *Certif-*
simè itaque sciat omnis domus Israël, quia Act. 2.
Deum illum & Christum Deus fecit hunc Ie-
sum, quem vos crucifixistis. Dignè vtique di-
 xit factum, quem prædicat crucifixum.
 Deus quippe vnigenitus, incomprehensi-
 bilis, & immortalis, à nullo factus, & rerum
 omnium factor æternus, suo dignatus est
 opere Christus fieri, vt Iudæorum posset
 opere crucifigi: quia redemptorem mundi

traditum crux nulla ratione portasset, nisi mundi factorem conceptum virginis vterus edidisset. Ipse igitur etiam per Salomonem generationis creationisque suæ insinuans veritatem, dixit; *Dominus creauit me initio viarum suarum in opere suo.* Sed antequam hoc diceret, manifestum futuræ incarnationis suæ præmisit indicium, dicens: *Si nuntia uero vobis quæ quotidie fiunt, commemorabo quæ à sæculo sunt.* Enumerans deinde subiunxit, *Dominus creauit me initio viarum suarum in opere suo.* Hæc utique creatio à sæculo est, non ante sæculum. Nam postmodum dicit, *ante sæcula fundauit me.* & paulo post: *ante omnes colles genuit me.* Hic quod dicit, *ante sæcula, & ante omnes colles*, æternitatem voluit intelligi natiuitatis diuinæ. Et ante sæcula, & post sæculum æternitas est. Et sic æternitas filij Dei ante sæculum non habet initium, sicut æternitas eius post sæculum non habet finem. Sic autem pro tempore futuro tempus præteritum ponēs dicit sapientia, *Dominus creauit me*; pro eo quod est, creaturus est me; & ita dixit tanquam factum, quod utique erat faciendū: sicut per beatum Dauid dixit: *Foderunt manus meas & pedes meos: dinumerauerunt omnia ossa mea. Ipsi verò considerauerunt & conspe-*

xerunt me. Diuiserunt sibi vestimenta mea, & in vestimentum meum miserunt sortem. Dicens itaque, Dominus creauit me, ostendit quemadmodum fuerit factus. Dicens etiam, foderunt manus meas & pedes meos, ostendit quemadmodum fuerit crucifixus. Sicut autem hoc utique futurum erat, quod tanquam factum de sua passione per David Dei filius cecinit: ita futurum erat, quod tanquam factum de sua incarnatione per Salomonem ipse qui est Dei sapientia prophetauit. Nam ipse Salomon paulo prius ait: *Sapientia edificauit sibi domum, & subdidit columnas septem.* quod ad incarnationis dominicę pertinet ortum. Isaias quoque de Christi passione loquitur sic, ut quod futurum prophetat, tanquam pręteritum dicat. Ipse enim dicit de Christo: *Sicut omnis ad immolandum ductus est, & sicut agnus coram tudente sine voce, sic non aperuit os suum.* Nam & ipsam vnigeniti Dei secundum carnem de virgine natiuitatem, non solum aliquando tanquam futuram prędicat, sed aliquando tanquam pręteritam dicit. Denique quodam loco ait: *Ecce virgo in utero habebit, & pariet filium.* Alio item loco tanquam factum atque transactum insinuans, ait: *Puer natus est nobis, filius datus est nobis.* Quis ergo non

Sap. 9.

Esai. 7.

Esai. 7.

Esai. 9.

videat, illud totum quod de humanitate & passione vnigeniti Dei dictum est per Prophetas, eodem tempore sic fuisse in veritate futurum, sicut nunc est in veritate præteritum. Ad ostendēdā verò incommutabilitatem diuini consilij, factum est vt prophetica scriptura tanquam præteritum sit diceret in sermone, quod futurum expectabatur in opere. Deus enim, de quo hic dicit Propheta, *qui fecit quæ futura sunt*, ideo quæ facienda fuerant, tanquam facta narrare voluit, quia quæ in tempore mutabiliter fiunt, incommutabili dispositionis æternitate firmavit. Itaque & his, in quibus necdum est effectus operis, firma permanet in æternitate dispositio creatoris. Sic ergo Dei filius cum suo esset opere creandus, se dixit creatum; sicut crucifigendus non se dubitauit dicere crucifixum. Adhuc autem corde peruerso atque ore sacrilego Fastidiosus insaniens ex hoc voluit adserere filium à patre & spiritu sancto separatū, quia solum constat thalamum vteri virginalis ingressum. De quo in libro Psalmorum dicitur: *Et ipse tanquam sponsus procedens de thalamo suo*. Cupiens deinde peruerfitatis suæ firmare sententiam, etiam illam non dubitauit adserere blasphemiam, dicēs

*Esai. 48.**Psal. 18.*

quòd se nullatenus potuit Trinitas separare; quam constat omnino non diuidi: Ergo, tota Trinitas carnem adsumpsit, tota Trinitas passionum iniurias sensit; tota Trinitas in sepulchro iacuit: tota Trinitas infernum penetrauit: tota Trinitas tertiadie à mortuis resurrexit: tota Trinitas quadragesimo die in cælos ascendit. Ad cuius dexteram tota Trinitas sedet, vel quem spiritum die Pentecostes tota Trinitas in Apostolos misit, aut cui Deo tota Trinitas in cruce dicere potuit, Deus meus, Deus meus, quare me dereliquisti: vel cui patri tota Trinitas ait, Pater in manus tuas commendo spiritum meum, si possunt, edicant. Quod si dicere nequeunt, ipsi se propriis iaculis perimunt, qui Trinitatem inseparabilem esse contendunt. Hactenus in illo profano sermone contra catholicam fidem Fastidiosi verba tenduntur. In quo tamen, exceptis his quæ in sanctæ Trinitatis contumeliam blasphemauit, penè omnia, siue præcedentia, siue subsequencia, de aliorum dictis nequissimus vsurpauit. Denique omnia quæ aduersus Donatistas posuit, de quibusdam duabus Epistolis furatus est, in quibus cōtra Pelagianos atque Donatistas, cū nobis in exilio Sardinia constitutis, ad religiosam Ecclesiæ filiam Stephaniam esset ab omnibus rescribendum, ipso prorsus

verborum ordine, quo illa idem nequissimus fraudulenter sub nomine suo posuit, inueniuntur inserta. Vt autem tibi non deficeret rei huius agnitio, duas Epistolas quas ad nos memorata Stephania destinauit, & quas ei nos rescripsimus, huic feci opusculo subiici. Vt agnoscas in illo sermone ea tantum fuisse Fastidiosos, quibus in ipsius sanctæ Trinitatis iniuriam cæco corde profiliens catholicam oppugnare conatus est veritatem. Nunc itaque blasphemias eius Domino adiuuante respondeo. Non tota Trinitas carnem adsumpsit, nec tota Trinitas passionum iniurias sensit, neque tota Trinitas in sepulcro iacuit, neque tota Trinitas infernum penetrauit, neque tota Trinitas tertio die à mortuis resurrexit: & si quæ sunt alia quæ conuincantur in sacramento illo incarnationis ad solius filij pertinere personam. Hæc enim quæ catholicæ veritati Fastidiosus plena falsitatis & peruersitatis obiecit, non nisi Sabellianis, id est Patripassianis, possunt veraciter obiici. in quibus reuera illi conclusi atque conuicti deficiunt, qui sanctæ Trinitatis, sicut vnā naturam, sic vnā personam prædicare contendunt. Vbi eos sua peruersitas consequenter ad hanc absurditatem præcipitat, vt natiuitatē qui-

dem diuinam nullatenus credant: naturam verò secundum carnem, nihilominus passionem ac mortem, resurrectionem quoque ab inferis, & ascensionem in cælum, & omnia illa quæ in sacramento incarnationis ad personam vnus filii pertinent, Patri consequenter adsignent. Catholica verò Ecclesia diuinitus inspirata, tenens Fidei veritatem, sicut nouit vnā naturam sanctæ Trinitatis asserere, ita cautissimè sua tribuit vnique personæ. Filius ergo Dei nos misericorditer redempturus, in eo rectè creditur solus assumpsisse, quia humanam naturam non ita suscepit, vt vna in eo fieret natura diuinitatis & carnis. Neque enim in Christo hoc Deitas potuit esse, quod caro. quia vtraque natura retinente proprietatē suā, fieri non potuit, vt quælibet earum aut esse desineret, aut in alteram omnimoda prorsus abolitione transiret. Quod si fieret, dignè diceretur à tota Trinitate carnem susceptam, quando carnem suam filius in illā conuerteret diuinitatē, quā ei cum Patre & Spiritu sancto profiteamur manere communem. Nunc verò, quia in Christo alteram diuinam, & alteram humanam dicimus esse naturam; propterea vtique humanam naturam, id est carnem rationalemque ani-

nam, non à tota Trinitate, sed à solo Filio credimus confitemurque susceptam. In vnitatem quippe personæ, non in vnitatem naturæ, Deus vnigenitus carnem suscepit & animam: quia vtique persona filij non est eadem, quæ Patris est, aut Spiritus sancti. Vnitas ergo personæ, manente duntaxat vtriusque proprietate substantiæ, sicut in Christo personam non fecit duplicem, sic humanæ naturæ susceptionem non fecit sanctæ Trinitati communem. Filio enim Dei non sicut est vna communisque cum Patre & Spiritu sancto natura, sic & vna communisque persona. Proprium est itaque solius filij, seruilem formam misericorditer accepisse. Ad personam quippe Dei verbi acceptio illa seruilis formæ pertinuit, quæ non in Diuinam naturam confusione transiuit. Ideo illius formæ seruilis acceptio, secundum quam Dei filius, qui est omnium rerum Dominus, & in quo inhabitat omnis plenitudo diuinitatis, verus & plenus factus est homo, nihil ei diuinæ plenitudinis abstulit, nihil dominationis ademit: quia in ipsa vna persona sine confusione mansit diuina humanaque natura. Hinc est quòd in vno eodemque Christo & humanæ naturæ veritas claruit, & diuinæ naturæ incommuta-

bilitas æterna permansit. Neque enim vel imminutum est in illo aliquatenus, vel mutatum, quod naturaliter habuit in æternitate, per illud quod accepit ex tempore. Factus est quippe habitu seruus, sed Dominus rerum omnium naturaliter esse non desistit. Et factus est secundum carnem pauper: nihilominus tamē secundum diuinitatem ditissimus mansit. Hinc est quod beatus Apostolus Christianos asserit paupertate ditatos dicens, *Noſtis gratia Domini noſtri Ieſu Christi, quia propter nos egenus factus eſt cū eſſet diues, ut illius paupertate vos diuites eſſetis.* ^{1. Cor. 4} Nos autem diuites ſua paupertate nullatenus faceret, ſi pauper factus naturalis diuinitatis in ſe diuitias non haberet. Pauper ergo factus eſt ſecundū formā ſerui: diues permāſit ſecundū formam Dei. Paupertas itaque formæ ſeruilis non eſt illi cum patre & Spiritu ſancto communis. quia poſt naturę humanę paupertatem in vnitatem perſonæ ſuſceptam, diues in eo permansit diuina ſubſtantia. Quę fuit autem diuitis filij Dei paupertas, niſi noſtra infirmitas, noſtraque mortalitas? Quidquid autem in infirmitate ac morte ſecundum carnem Deus vnigenitus pertulit, diuinitas non ſenſit. Miſit enim Deus filium in ſimilitudinem carnis pecca-

ti, in quo fuit vera caro, sed nulla fuit peccati pollutio. Similitudo ergo carnis peccati illa fuit in carne Christi, cum illa non esset caro peccati: quod fuit infirma, quod passibilis & mortalis, quod vulnere subdita, dolorique subiecta. Veruntamen hæc omnia non substantialiter, sed personaliter diuinitati Christi, humanitatisque communia. Persona verò Christi à persona Patris & Spiritus sancti omnino discernitur. Quæ vna persona diuinitatis atque humanitatis in Christo sic permanet, vt nec alteram naturam separari ab altera sinat, nec confundi vtrâmq; permittat. Christus igitur, qui est via, veritas, & vera vita, via nobis est, quia veram infirmitatem in veritate carnis habuit: & vera vita nobis est, quia vera virtus in eius vera diuinitate permansit. Hoc 2. Co. 13. Apostolus discernens ait, *Nam etsi crucifixus est ex infirmitate, sed viuit ex virtute Dei.* In vno ergo eodemque Christo, sicut humanæ carnis infirmitas non sibi potuit vitam vel dare vel reddere, quia potestas illa ponendi animam & sumendi, non fuit ex infirmitate humana, sed ex virtute diuina: ita diuinæ virtutis æternitas, cui proprium naturaliter est incommutabiliter atque indeficiente viuere, nihil infirmitatis aut mortis potuit

in cruce sentire. Vnigenit⁹ itaq. Dei filius, in eo ex patre nat⁹, Deus verus, & de matre factus, homo verus cognoscitur: quia & indicia infirmitatis in veritate carnis ostendit, & documenta virtutis in diuinitatis veritate monstrauit. ostendens scilicet in vnitate personæ, aliud sibi nobiscum, aliud cum patre & Spiritu sancto naturaliter esse commune. Christo enim nobiscum naturalis est communio animæ & carnis: cum patre autem, spirituque sancto naturalis est ei cōmunio deitatis. Quomodo igitur quæ carnis sunt, cum patre & Spiritu sancto communia Dei filius habere potuit, qui carnem suam nullatenus cum sua diuinitate confundit: ita non præiudicat catholicæ Fidei, quod credimus nostram naturam in vnitate personæ ab vnigenito saluatore susceptæ cū fateamur vnā sanctæ Trinitatis manere substantiam. Illam quippe humanitatē Filij tota Trinitas fecit, sed non sicut tota Trinitas fecit, sic Trinitas tota suscepit: quia persona, quæ non est filio cum patre & Spiritu sancto communis, ipsa in Christo vna est diuinitatis & carnis. Vbi autem siue personarum, siue substantiarum, inuenitur vlla discretio; non semper ad communionem acceptionis refertur, quidquid in commu-

nione operis inuenitur. Quod quia obscurum videtur dum solo profertur eloquio, melius est vt intelligēdi facilitas apto, quantum res permittit, præbeatur exemplo. Est quidem similitudo ad cognitionem fidelibus prompta, quam in sua Deus similitudine collocauit. Imago autem ista mens humana est. Legitur enim dixisse Dominum.

Gen. i. Faciamus hominem ad imaginem & similitudinē nostram. In quo sermone multum dolendi sunt hæretici Arriani, qui scripturas sanctas legunt nec intelligunt: & cordis cæcitate confusi, vnitatem naturalem in sancta Trinitate nō agnoscunt. In qua personas patris & filii & spiritus sancti prædicatione discernūt. Cū vtrique in eo testimonio quod supra posuimus, ipsa Trinitas, quæ est Deus vnus, verus, & bonus, & vnitatem suæ diuinitatis ostendat, & trium personarum euidenter demonstret indicium. Dixit enim, *Faciamus hominem ad imaginem & similitudinē nostram*, ne in tribus personis vnitas substantiæ negaretur: nec dixit, *faciam hominem ad imaginem & similitudinem meam*, ne in illa diuina natura vna tantum crederetur esse persona. Sed singulari numero pluralem salubriter miscuit. & cū Deum dicentem, *Faciamus hominem ad imaginem &*

similitudinem nostram legimus, hoc quod singulariter dicimus esse naturæ, pluraliter in personis esse definimus. Hæc itaque imago, id est interior homo, tria quædam secū habere naturaliter inuenitur, memoriam intelligentiam, & voluntatem. Memoria, igitur est vis animæ qua reminiscimur. Intelligentia est, qua illa quæ memoria concepimus, cogitatione versamus. Voluntas est, qua vel appetimus aliquid, vel vitamus: hoc est, qua inuenimur vel diligere aliquid, vel odisse. Hæc itaque tria, licet proprias personas in homine non habeant, discretionem tamen ad inuicem distant. & sic in tribus istis est vnus hominis vna persona, & humanæ mentis vna substantia: vt tamē in ipsa natura rationalis animæ, in qua Dei constat esse imaginem, aliam inueniamus memoriam, aliam intelligentiam, & aliam nihilominus voluntatem. Nam licet nihil cogitare, vel diligere, vel odisse possimus quod in memoria nō habeamus: quia quod obliuio abstulerit de corde, non ibi potest cogitatio, aut voluntas aliquatenus inueniri: tamen ad agnoscendam discretionem memoriæ, cogitationis, & voluntatis, plerumque reminiscimur, quod nec versamus cogitatione, nec appetimus voluntate: itē

rogitamus aliqua, quæ nō diligimus. Cogitatio itaque nostra, quæ in memoria nascitur & formatur, dignè verbum interius dicitur. Quid enim est cogitatio, nisi interna locutio? Propter quod scriptum est, *Quæ dicitis in cordibus vestris, & in cubilibus vestris cōpungimini.* Nam & in Evangelio, cū Dominus Iesus illi paralytico quem sanauit, dixisset, *remittuntur tibi peccata tua:* Lucas Euāgelista subiunxit dicens, *Et cœperunt cogitare Scribæ & Pharisei, dicentes, Quis est hic, qui loquitur blasphemiam? Quis potest dimittere peccata, nisi solus Deus? Vt cognouit autem Iesus cogitationes eorum, respondens dixit ad illos, Quid cogitatis mala in cordibus vestris? Quod autem Lucas dixit, cœperunt cogitare Scribæ & Pharisei dicentes: hoc Matthæus ait, *Et ecce quidā de Scribis dicebant intra se, blasphemat. Et cū vidisset Iesus cogitationes eorum, dixit, Vt quid cogitatis mala in cordibus vestris?* In libro quoque Sapientiæ dicitur de quibusdam, *Dixerunt intra se cogitantes non rectè.* Manifestum est ergo, hoc esse cogitare, quod est intra se dicere. Ibi ergo inuilibiliter cogitatur. Sine strepitu ergo vocis corporeæ vnusquisque quod cogitat, dicit. Quod tamen ad alterius auditum, non nisi corporea locutione perducit. Illud itaque verbum, quod ex memoria*

memoria natum est, secundum solam naturam, quo de memoria inuenitur nasci, non potest ad aures cuiuslibet hominis sine corporea voce perducī. Proinde ut proferri ad alios possit, habitu corporeæ vocis induitur. Cui verbo ex ore vox corporea copulatur. Atque ita fit, ut illud verbum, quod totum in mente spiritualiter fuit, & ad alios per corporalem vocem veniat, & ab animo, de quo & in quo spiritualiter permanet, non recedat. Totum enim necesse est ut permaneat in mente, etiam quando totum profertur in voce. Nec tamen possumus dicere illam prolationem solius verbi à memoria vel à voluntate non fieri. Omnis enim qui loquitur, & meminit utique, & cogitat quid loquatur; & propterea loquitur, quia illam locutionem cum memoria & cogitatione voluntas pariter operatur. Nam in tantum quidquid homo loquitur sciens, non utique loquitur nisi volens, ut quidquid homo inuitus dicere cōpellitur, non dicat, quamdiu voluntas ad loquendum nullatenus inclinatur. Inde est quod non solum illi, qui nunc rerum temporalium, tribulationum, vel tormentorum timore siue dolore compressi, veritatem catholicæ fidei relinquentes, ad impietate

O

ac perfidiam tranſierunt , nullam excuſationem inuenire poterunt , vt dicant quod inuiti negauerint veram fidem ; cū hoc eos propria feciſſe appareat voluntate. Et ſi enim vel tribulatione vel tormento ad negandam fidem perductus eſt animus , nō eam tamen negauit inuitus. Vt enim fidem negaret , prius cogitauit & voluit , & ſic illam negatiōnem protulit : quia hoc vt fieret , cogitatio ſimul cum voluntate decreuit. Vt ergo ad illud , quod agebam , redeā : in ipſa imagine Dei , hoc eſt in ipſa mente hominis , cogitatio quæ ex memoria naſcitur atque formatur , & rectè verbum dicitur , ſolam corpoream vocem accipit , vt audiri corporeis auribus poſſit. Sic ergo in illa ſancta ac diuina Trinitate , ſolum Patris verbum , quod eſt ſpeculum ſine macula , & imago bonitatis Dei , ſplendor ſcilicet & figura ſubſtantix eius , cū in forma Dei eſſet , non rapinam arbitratus eſt eſſe ſe æqualem Deo ; ſed ſemetipſum exinaniuit formam ſerui accipiens : ſolus ergo filius accepit carnem , vt poſſit corporeis oculis videri , manibus contrectari : ſolus humanam naturam ſic accepit , vt ſuam faceret , & per illam diuinitatis quoque ſux notiā miſericorditer infunderet. Qui tamen re-

uelans seipsum, in seipso utique reuelauit
& patrem. Tribuens quippe agnitionem
sue diuinitatis, simul agnitionem donauit
& patris. Diuinitas enim quæ una est patris
& filij, facit & filium sine patre, & patrem
sine filio non agnosci. Inde est quod ait,
Tanto tempore uobiscum sum, & non cognouistis Ioan. 14.
me? Philippe, qui uidet me, uidet & patrem.
Sic ergo filius, qui carnem solus accepit, in
seipso patrem iure unius diuinitatis natura-
liter ostendit: sicut fermocinator, dum ve-
ritatem quam meminit loquitur, quod à se
prolatum indicat, hoc intus in mente repo-
situm monstrat. Vox autem illa corporea,
quæ spirituale uerbum induitur, ut ad au-
dientium notitiam proferatur, simul fit à
memoria, & à cogitatione, & à voluntate:
sed à sola cogitatione, id est interiore susci-
pitur uerbo, ut ad corporeas circumstantium
aures interioris cogitationis procedat au-
gurio. Illud autem uerbum, sicut habitu
corporeæ uocis accepto, totum ad audien-
tes egreditur, sic in corde totum cum me-
moria & voluntate spiritualiter inuenitur.
Proinde quisquis hanc imaginem in mente
hominis conspexerit, hæreticorum vanilo-
quia citius irridebit: qui carnaliter de spiri-
tualibus sentientes, nolunt credere in illa

sancta Trinitate aliquid à tribus factum, quod ab vna persona tantum fuerit diuina dispositione susceptum: cum illa humana natura totius quidem Trinitatis opere sit facta, à solo tamen filio fuerit in vnitatem personæ suscepta. Sicut enim certum est, *Ioan. 1.* quia in principio erat Verbum, & Verbum erat apud Deum, & Deus erat Verbum. ita certum est, quia verbum caro factum est, & habitauit in nobis. Quid autem accepimus? Domini verbum, & Deum apud quem erat verbum, non patrem & filium. Nomine itaque verbi ostēditur discreta patris filiiq. persona: sed quia Deus erat, docetur vna patris filiiq. substantia. Non ergo patris, neque spiritus sancti, illa quæ solius verbi est caro: quia Deo verbo non est cum patre & spiritu sancto vnus personæ communio. Secundum operationem quippe diuinitatis communem, in qua est Trinitas personarum, sicut eam accepit filius, sic accepit pater, & spiritus sanctus. Illum enim filiū, qui secundum diuinitatem naturaliter solus de solo natus est patre, ipsum vtique secundum carnem naturaliter nasci decebat ex virgine. At in illa Trinitate, sicut non sunt duo patres, neque duo spiritus sancti, sic non erunt etiam duo filij. Illa enim Tri-

nitas vnum habet in se Patrem, vnum Filium, vnum Spiritum sanctum. Sed vnum Patrem, & vnum Spiritum sanctum secundum diuinam naturam: vnum verò filium, secundum diuinam humanamque substantiam. In personis itaque discreta est Trinitas, quamuis in natura non sit diuisa vel separata Trinitatis vna diuinitas. Ideo in solius Filij persona humanitas inuenitur assumpta. Propter naturam ergo vna semper est sanctæ Trinitatis operatio: propter personas autem, solius filij est humana susceptio. Veruntamen dum ista ad instructionem fidelium disputamus, debemus cogitare etiam hæreticos utique carnales atque animales, & ob hoc rerum spiritualium incapaces: de 1. Co. 2.
qualibus dicit Apostolus: *Animalis autem homo non percipit quæ sunt Spiritus Dei. Stultitia enim est illi: & non potest intelligere, quia spiritualiter examinatur.* Carnales autem siue animales maximè hæreticos esse, Apostolica testatur auctoritas. Beatus enim Paulus inter opera carnis & hæreses ponit. Beatus quoque Iudas Apostolus, eos qui se ab Ecclesia segregant, animales appellat dicens, *Hi sunt qui segregant seipsos, animales, spiritum non habentes.* Hoc est utique quod Beatum Paulum dixisse monstrauimus: *Animalis autem*

homo non percipit que sunt Spiritus Dei. Non sit ergo mirum, quia intelligere diuina nō valent qui spiritum Dei non habent. Scriptū est namque in libro Sapientix: *Sensum autem tuum quis sciet, nisi tu dederis sapientiam, & miseris Spiritum sanctum tuum de altissimis.* Inde est quòd etiam sanctus Apostolus ea quæ Dei sunt non nisi à Spiritu sancto asserit reuelari, dicens: *Nobis enim reuelauit Deus per Spiritum suum.* Et paulo post ait: *Nos autem non spiritum mundi accepimus, sed Spiritum qui ex Deo est, vt sciamus quæ à Deo donata sunt nobis.* Verū tamen bonum est vt & nos, in quantum diuinitus adiuuamur, beatum imitantes Apostolum, omnibus omnia fieri studeamus, vt omnes lucrificiamus. Quoniam igitur non capiunt Arriani quod diximus, in illa vna natura diuina aliquid à tota Trinitate factū, quod nō à tota Trinitate fuerit susceptum: nec creditur possibile, quòd carnem illam tota Trinitas fecerit, quā tamen vna ex Trinitate persona suscepit: efficiamur, sicut Apostolus ait, tanquam paruuli in medio eorum, & hoc illis proponamus exemplum, ad intelligentiæ spiritualis latitudinem nutriendā, quod hæretici cordis nō fatiget nec perturbet angustiam. Scimus illam solam esse diuinam inseparabilē,

Sap. 9.

1. Co. 2.

atque indiuiduam Trinitatem, cuius neque vna natura possit personarum Trinitate diuidi, neque tres personæ possint naturæ indiuisibilis vnitatem confundi. Nam & ipsa mens hominis, in qua imaginem Dei esse diximus, sic accepit ut habeat in se quoddam sanctæ Trinitatis indicium, ut distinctionem in se trium non habeat personarum. Hoc enim sibi proprium Trinitas diuina seruauit. Vnde quamuis sit in hominis mente memoria, intelligentia, & voluntas, tria quidem illa sunt, sed tamen personæ tres esse non possunt: quia in vnoquoque homine, in cuius mente, vel cuius mens est imago diuina, non solum ipsius mentis, sed animæ simul & carnis vna inuenitur naturaliter esse persona. In creatura igitur, quantum tantæ rei, de qua loquimur, magnitudo permittit, requirentes exemplum in naturis, tale aliquid forsitan inuenimus, quod in personis inuenire non possimus. Diximus enim quod humanitatem filij Dei tota Trinitas fecit, quam tamen non tota Trinitas, sed solus filius in suam personam accepit. A tota quippe Trinitate, id est à Patre, Verbo, & Spiritu sancto, facta est illa caro, sed solum verbum factum est caro. Quoniam igitur sicut superius diximus, quantum attinet ad

creaturā tres personas in vna mēte, id est in vna carne inuenire non possumus, duas saltē naturas in vna persona nō laboramus vt inuenire possimus. Vniuscuiusq. enim persona viuentis hominis ex anima rationali constat & corpore. à quo tamen multa ita fiunt, vt quamuis ab anima & corpore simul fiant, ad solam tamen animam, aut ad solum corpus aliquando pertineant. Quis enim nesciat solum corpus cibo carnali refici atque nutriri, in cuius comestione cōmunis operatio est carnis & animæ? Anima enim per corpus, imo cum corpore facit, quando corpus comedit, & tamen solum corpus accipit, quod vt accipiatur, anima simul cum corpore facit. In illa itaque comestione, vna est animæ carnisque operatio, sed solius est carnis acceptio. In tantum quippe sola caro cibo corporali pascitur, vt sola, si eum acceperit, pinguescat. Animæ autem refectio atque pinguedo, non in pane corporali, sed in pane spirituali consistit. *Non enim in pane solo viuit homo, sed in omni verbo quod procedit de ore Dei.* In cuius tamen verbi perceptione, vt cibo suo anima pascatur, caro illi in opere sociatur. Hoc enim agitur, quando aut aures corporales admo- uet anima verbis, vt audiat, aut oculos cor-

Matt. 4.

porales admouet scripturis, vt legat. Ecce & in hoc simul est carnis & animæ operatio, vbi est animæ solius acceptio. Ista in creaturis videant Arriani, & non dubitent sanctæ Trinitatis vnam esse diuinam naturā, & fieri potuisse, immò factum esse, vt illa caro totius Trinitatis vno atque inseparabili opere fieret, in sacramento verò incarnationis ad solam personam Dei vnigeniti pertineret. Non ergo tota Trinitas carnem assumpsit, nec tota Trinitas passionum iniurias sēsit, neque tota Trinitas tertio die à mortuis resurrexit, neque tota Trinitas quadragesimo die in cœlum ascendit. Sed sicut superius ostendi, vnus solus filius carnem assumpsit. in quo quia vna vtriusq. naturæ manet inconfusa proprietas, ideo vnus idemque est, qui & secundum veram diuinitatem impassibilis omnino permansit. Naturaliter enim diuinitas illa nihil patitur, sicut naturaliter non mutatur. Mutabilis autem naturæ est, subiacere passionib. Nulla ergo illi naturæ passio accidere potuit, cui mutatio naturalis inesse nequiuir. Solus etiam filius iacuit in sepulcro. sed illa vnigeniti Dei natura potuit sepeliri, quæ potuit mori. Secundum naturā itaque carnis Deus vnigenitus iacuit sepultus in lapi-

de, secundum quam clavis adfixus pependit in cruce. Quomodo enim diuinitas eius poterat concludi sepulcro, quæ nec terra potest concludi, nec cœlo? Illam ergo passionem, illamque sepulturam vnitas personalis vnā in Christo fecit esse diuinitatis & carnis: sed proprietates vtriusque in Christo substantiæ fecit solam carnem Christi passioni & morti naturaliter subiacere, permāente impassibilitate atque immortalitate diuinæ incommutabilisque substantiæ. Christus itaque, qui non est Trinitas, sed vna ex Trinitate persona, sic secundum veritatem carnis verè in cruce pependit, & in
 1. Co. 15. sepulcro mortuus iacuit: Apostolo dicente quia *Christus mortuus est pro peccatis nostris, secundum scripturas, & quia sepultus est, & quia resurrexit à mortuis tertia die secundum scripturas.* Quæ omnia secundum personæ vnitatem totus Christus pertulit: secundum naturalem proprietatem, ad solam carnem pertinet veritatem. Ita secundum solam animam ad infernum descendit. Vno quippe eodemque tempore, quod inuenitur inter mortem Christi, resurrectionemque distare, vnus idemque Christus, & secundum veritatem carnis verè in sepulcro iacuit, & secundum veritatem animæ rationalis, verè in infernū

descendit. Ac per hoc secundum veritatem humanæ naturæ, ex quo Christus in cruce suspensus inclinato capite emisit spiritum, quoadusque recepto spiritu resurrexit à mortuis, non ubi fuit secundum carnem, ibi fuit secundum animam. Secundum carnem quippe, in sepulcro mortuus iacuit: secundum animam verò rationalem ad infernum descendit: secundum diuinitatē verò, qua cum Patre & Spiritu sancto vnus est Deus, totam creaturam repleuit immensus. Secundum carnē ergo sic fuit in solo sepulcro, vt secūdū animā in solo fuisset inferno: secūdū diuinitatem verò, qua nullo loco concluditur, sed vbique totus ineffabiliter inuenitur, ita carnem suam non dereliquit in sepulcro, neque animam suam deseruit in inferno, sicut nec terræ potest aliquando deesse, nec cœlo. Idem quoque Dei filius qui secundum carnem in sepulcro iacuit, & secundum solam animam in infernum descendit, quoniam ipse dixerat de anima sua, *Potestatem habeo ponendi eam, & potestatem ha-* Ioan. 10
beo iterum sumendi eam: postea quam posuit animam, & resumpsit, secundum totam humanitatem suam in cœlum ascendit, & in dextra sedis Dei sedet, sicut Marcus E- Mar. 16
uangelista testatur dicens, *Dominus quidem*

Iesus, postquam locutus est eis, assumptus est in cælum, & sedet à dextris Dei. Hæc autem omnia, quæ partim secundum solam animam, partim secundum solam carnem, partim verò secundum animam simul & carnem, in vnigenito Deo temporaliter facta sunt: sicut dignè referuntur ad vnā, quæ in Dei filio est, diuinitatis humanitatisque personam, sic ad illius diuinam nullatenus possunt referri substantiam. Ac per hoc nihil horum potest personæ Patris vel sancti Spiritus deputari, quia non est vna persona Patris, & Filij, & Spiritus sancti. Nec quisquam potest passionem, assumptionemve carnis Patri, siue sancto Spiritui adscribere: quia nefas est diuinam naturam mutabilem in aliquo, aut passibilem prædicare, secundum quam Christus & sine initio semper natus de Patre permansit, quando de matre initium conceptionis & natiuitatis accepit, & incomprehensibilis, quando se comprehendi permisit, & impassibilis, quando passionis iniurias sensit, & immortalis, quando morti subiacuit, & indiuisus, quando secundum carnem in sepulcro iacuit, & secundum animam in inferiores partes terræ descendit, & immensus, quando ad altitudinem cæli de huius terræ humilitate conscendit. Istā

fidei si miser Fastidiosus non negaret, sine dubio non periret. Sed quoniam & factis eam negavit & dictis, mirum non est, quia opere pessimus factus est, & iam sermone peruersus, & ambulans in tenebris inimicus extitit lucis. Fornicatio quippe corporalis, quæ illius primò mentē, carnēque possedit, ipsa eum cōsequenter ad præcipitium spiritualis fornicationis adtraxit. Tulit enim membra Christi, & fecit membra meretricis. Et ideo non dubitauit castitatem fidei perdere, quia non se doluit castitatem corporis amisisse. Ecce quantum malum luxuria carnis, quæ illum miserum vsque ad negationem potuit perducere veritatis. Hæc fuit, hæc fuit tempestas, quæ paleam de area dominica rapuit, & vepribus hæreticæ impietatis infixit. Hæc illum fecit contra suam conscientiam loqui, & in contumeliam ipsius Trinitatis peruerso sermone versari. Neque enim verum credebat esse quod dixit, sed iam duplici corde, maluit aliud dicere quàm credebat. Qua desperatione possessus, vt ipse sibi auferret spem remissionis, voluit per licentiam implere delectamenta libidinis. Ex ore itaque suo quo iustificari debuit, augmentum cōdemnationis accepit, quando lingua eius,

quę debbat pœnitentię verba proferre, protulit uerba blasphemię. Illuc itaque miser Fastidiosus maluit transire, vbi & contra Deum sacrilega procacitate latraret, & in suis fornicationibus, quia timorem Dei nō habuit, etiam hominem non timeret. Væ illi misero, qui ad hoc Ecclesiastico voluit priuari consortio, vt nunquam possit carere supplicio: & ad hoc se voluit sine aliquo timore peccare, vt sine fine mereretur ardere. Vbi sunt nūc duo anni illi, quos Fastidiosus quasi felices habuit, quia eos, sicut voluit, libidinosus in fornicatione consumpsit? quā celeriter transierunt? Qui etiam non solū ducenti, sed etiam duo millia si essent, cum celeritate transiissent. Quid autem miser faciet, cum ad iudicium illius venerit, quem negauit? quid recipiet pro talibus factis & dictis? quid ille recipiet, ille corpore luxuriosus, corde cœcus, errore blasphemus? qui prius in se templum Dei fornicatione violauit, deinde corpore quoque ab Ecclesia separatus exiuit. Quid recipiet ab illa sancta Trinitate, qui maluit seruus esse luxurię atque perfidię? Quid vti- que nisi ignem æternum, quem talibus constat operibus præparatum? Et in hoc

quidem tempore citò finita est Fastidiosifornicatio, cuius tamen in illo igne non finietur æterna combustio. Fugiant ergo Christiani vtramque fornicationem, quam miser Fastidiosus incurrit: vt custodientes animas suas, castitatem seruent & cordis & corporis. teneant intra Ecclesiam catholicam Fidem: credant & confiteantur inseparabilem atque indiuiduam Trinitatem: quæ in sua diuina natura, nihil habet factum, nihil aliquatenus inchoatum: cuius vno atque inseparabili opere, facta sunt omnia in cœlis & in terra, visibilia & inuisibilia. Credant nihilominus, & confiteantur vnigenitum Deum, solum secundum veram diuinitatem natum de patre, solum secundum veram humanitatem creatum ex virgine: ac per hoc, opere Trinitatis carnem atque animam rationalem in vnitate personæ pro mundi salute susceptam. Hoc firmissimè retinentes proferant, & perseuerent in operibus bonis. In Christo enim Iesu sola valet fides, quæ per caritatem operatur. à qua si quis discesserit, ipse suæ animæ reus erit. omnis autem qui in ea perseuerauerit vsquè in finem, hic saluus erit.



EPISTOLA FERRANDI

Diaconi,

Ad B. Fulgentium Episcopum.



O M I N O beatissimo & cum
omni veneratione suscipiendo Pa-
tri Fulgentio Episcopo Ferrandus
Diaconus in Domino salutem. Qui
terrenis indigent facultatibus, nec
diuturni operis continuato labore, vel honestæ ar-
tis industria, siue forsitan honesta negotiatione
pascuntur, solent ante diuitum fores, postquam
verecundiam fames exclusit, suspirantes victû
precibus quærere, virorum quoque nobilium cle-
mentissimas aures, etiam importuna aliquando pe-
titione pulsare. Norunt enim mendicantibus non
prodesse silentia. Ego verò qui ingenij pauperis la-
boro penuria, neque multis oblatrantibus curis,
operari cibum sapientiæ quotidiana diuinæ lectio-
nis meditatione permittor, minus etiam praualeus
meis, id est disputationum siue cogitationum mea-
rum viribus inuestigare dubia, explanare obscura,
diuidere ac definire contraria, pulso crebris gemitibus

ribus ad cœlestis Patrisfamilie ianuam. Sed ubi
 rursus indignum, cui tam citò aperiatur quod volo,
 memetipsum conuincō; tunc eos quos de intimis
 regis cubiculi penetralibus accepisse dispensandam
 Domini mei pecuniam video, voce supplici de-
 precor, ut dignentur famem nostram modicis
 saltem sumptibus consolari. Quorum quia vnus
 ex numero talentorum tibi creditorum multiplica-
 re lucra desideras, & cœlestis scribe pretiosissi-
 mam margaritā, quam distraētis omnib. quæ ha-
 bebas negotiator fidelissimus cōparasti, generaliter
 acquirendam, possidendam, perfruendam, sine in-
 uidia tabescente communicas: profer obsecro de
 thesauro tuo, dispensator egregie, noua simul &
 vetera, quibus indigentem locupletes, esurientem
 pascas, imperitum doceas, dubitanti quid sequa-
 tur ostendas. Religiosi cuiusdam viri famulus
 etate adolescens, colore Aethiops, ex vltimis cre-
 do barbaræ prouinciæ partibus, ubi sicco solis
 ignei calore fuscantur, adductus, salutaris laua-
 cri necdum fuerat aspergine mundatus, aut mican-
 te Christi gratia dealbatus. Hic ergo dominorum
 fidelium diligentia, sacramentis Ecclesiasticis im-
 buendus, ad Ecclesiam traditur: fit ex more cate-
 chumenus: post aliquantum nihilominus temporis
 propinquante solennitate Paschali, inter compe-
 tentes offertur, scribitur, eruditur. Vniuersa
 quoque religionis Catholicæ veneranda mysteria

cognoscens atque percipiens, celebrato solenniter scrutinio, per exorcismum contra diabolum vindicatur: cui se renuntiare constanter, sicut hinc consuetudo poscebat, auditurus Symbolum proficitur. Ipsa insuper sancti Symboli verba memoriter in conspectu fidelis populi clara voce pronuncians, piam regulam dominicæ orationis accepit. Simulque iam & quid crederet, & quid oraret intelligens, futuro baptismati parabatur; cum subito violentis inuaditur febribus, & crescente lethali infirmitate turbatur. Persuasit dierum breuitas, ut ad fontem cum cæteris ablundus differretur, siue potius seruaretur. Et quid pluribus immorer? Hora exceptata cunctis aduenerat, in qua populus acquisitionis, Redemptori suo per baptismum consepultus, vitam veterem poneret, & nouam resurrectionis fidem, innouatus assumeret. Tunc ille in extremo halitu constitutus, sine voce, sine motu, sine sensu, nihil valens sacerdoti interroganti respondere, deferentium manibus apportatur; & pro eo nobis, quasi pro infante respondentibus, mente absentissimus accepit baptismum; quem se accepisse, post paululum mortuus, in hac præsentia arbitror vita nesciuit. Quæso nunc, utrum nihil ad æternam beatitudinem consequendam vox ablata nocuerit. Valde enim timeo, ne propterea Dominus, cui omnia possibilia sunt, facultatem loquendi denegauerit, quod cum

beneficio secundæ natiuitatis indicauit indignum. Quomodo namque potuerit ætas illa rationis capax aliena confessione purgari, non video. Nonne solos paruulos ritè credimus offerentium fide saluari, quos originali tantum nouimus iniquitate damnari? Id agente diuina iustitia miris modis, ut quodammodo ubi minimè propria, id est actualis malitia reperitur, ritè nec propria voluntas requiratur; sed per abundantiam gratiæ detur, alijs credentibus, salus, quibus alijs peccantibus reatus adscriptus est. At hic proprio vivebat arbitrio: super illud quod de radice traxerat, multa sine dubio vitia propria cupiditate contraxerat, plurimorum peccatorum vinculis obligatus, & non nisi voluntaria credulitate saluandus, quam in illo redemptionis loco confiteri nec voluit, nec valuit, qui nihil sentiens, velle omnino aliquid non valuit. An fortassis scientis præterita confessio remissionem peccatorum meruit etiam nescienti? Sed hoc dicere dubito; ne quis mihi veraciter dicat, Ergo saluus esset, si nec ad ipsam tinctionem corporis peruenisset; quoniam sicut asseris expiationis meritum per mysteria transacta meruerat. Postremò cur non etiam mortuos baptizemus, quos sacro baptismo repentina sæpe mors abstulit, sed eorum tamen voluntas fidelisque deuotio nota omnibus fuit? Cui talia respondentem si consensum præbere tentauero, magna ilicò sequitur absur-

ditas; *ut* putetur illis tantum mysteriis sufficientibus & salutem plenam conferentibus, aquam fontis æterni non renasciturum suscipere, sed renatum. Video in hoc articulo posse vſitatam Canonum proponi ſententiam, quæ infirmos iubet, ſi pro ſe reſpondere non valeant, ſed eorum voluntati teſtimonium ſui proprio periculo dixerint, baptizari. Sub qua definitione, magis arbitror, quid Eccleſia facere debeat imperatum, quàm quid ille percipiat indicatum. videlicet *ut* miniſter Verbi liber ſit à culpa negligentia, non *ut* ille oſtendatur conſors particepsque iuſtitia. Maxime, quia licet multos in hac re moueri videam, ſepe tamen plus ipſe commoueor; hæſitans qualis debeat haberi ſententia de his, qui etiamſi legitime ſana mente baptizantur, præueniente velocius morte, carnem Domini manducare, & ſanguinem eius bibere non ſinantur. Nota quippe ſunt fidelibus Saluatoris verba dicentis, Nifi manducaueritis carnem filij hominis, & biberitis eius ſanguinem, non habebitis vitam in vobis. Vnde petimus, *ut* velociori reſponſione nos inſtruas, *utrum* noceat, quantum noceat, an omnino nihil noceat, ſi quis baptizatus in nomine ſanctæ Trinitatis, ſacro cibo potuque fraudetur. Simul ad vtraque reſpondere dignatus, quæ præſumptione caritatis interroganda credimus, & quæ multis vtiliſſima fore ſuggerimus. Deus

Ioan. 6.

ad B. Fulgentium. 229

*noster paternitatem vestram ad ædificationem
nostram custodire dignetur, Domine mi semper
pater.*

B. FVLGENTII

EPISCOPI RVSPENSIS

Epistola ad Ferrandum
Diaconum.

De baptismo Aethiops moribundi.



DOMINO venerabili & in Christi caritate plurimum desiderabili sancto fratri & condiacono Ferrando, Fulgentius seruorum Christi famulus in Domino salutem. Gaudeo, sancte frater, quòd in corde tuo flamma caritatis, quæ per Spiritum sanctum diffunditur, gratia subinde crescente nutritur: quæ facit in his quæ videntur plerisque dubia, manifestum aliquid de literis agnoscere; ne dum ambiguitas habetur in ipso sacramento salutis, putetur in vacuum credentibus dari gratia Saluatoris. Dicis itaque, quòd religiosi cuiusdam

P. iiij

viri famulus , ætate adolefcens , colore Aethiops, dominorum fidelium diligentia sacramentis Ecclesiasticis imbuendus fuerit ad Ecclesiam traditus, & ex more catechumenus factus. Post aliquantum nihilominus tempus , propinquantē solennitate Paschali inter competentes oblatus, scriptus, eruditus, vniuersa quoque religionis Christianæ veneranda mysteria cognoscens atque percipiens , celebrato solenni scrutinio , per exorcismum contra diabolum fuerit vindicatus ; cui se renunciare constanter, sicut Ecclesiæ Garthaginensis, in qua iam Deo propitio diaconus militas, consuetudo poscebat, auditurus symbolū fuerit professus. Iam insuper sancti Symboli verba memoriter in conspectu fidelis populi, clara voce pronuncians, piam regulam dominicæ orationis accepit. Qui simul iam & quid crederet, & quid oraret intelligens, futuro baptismati parabatur. Quem dicis violentis febribus inuasum , & crescente lethali infirmitate turbatum. Ad iicis autem, quòd persuaserit dierum breuitas, vt ad fontem cum ceteris abluendus differretur , siue potius seruaretur. Dicis quoque aduenisse horam exoptatam cunctis, in qua populus acquisitionis Redem-

ptori suo per baptismum consepultus, vitā veterem deponeret, & nouam resurrectionis fidem innouatus assumeret. Tunc ille, vt ais, in extremo halitu constitutus, sine voce, sine motu, sine sensu, nihil valens sacerdoti interroganti respondere, deferentium manibus apportatur, & pro eo vobis, quasi pro infante, respondentibus, mente absentissimus accepit baptismum, quem se accepisse, post paululum mortuus, in hac præsenti, quantum arbitraris, vita nesciuit. Hac itaque narratione completa, deinde quæris, vtrum ei nihil ad æternam beatitudinem consequendam vox ablata nocuerit. Valdè enim te timere testaris, ne propterea Deus, cui omnia possibilia sunt, facultatem loquendi denegauerit, quòd eum beneficio secundæ natiuitatis iudicarit indignum. Dicis quoque te non videre, quomodo potuerit ætas illa rationis capax, aliena confessione purgari, eo quòd solos paruulos rectè credamus offerentium fide saluari, quos originali tantùm nouimus iniquitate damnari. id agente diuina iustitia miris modis, vt quodammodo, vbi minimè propria, id est actualis malitia reperitur, nec propria voluntas requiratur, sed per abundantiam gratiæ detur aliis credentibus.

salus, quibus aliis peccantibus reatus adscriptus est. Hic autem, vt asseris, proprio viuebat arbitrio: super illud quod de radice traxerat, multa sine dubio vitia propria cupiditate contraxerat, plurimorum peccatorum vinculis obligatus, & non nisi voluntaria credulitate saluandus, quam in illo redemptionis loco confiteri nec voluit, nec valuit, qui nihil sentiens velle omnino aliquid non valuit. His verbis tuis alia sub timore interrogationis opponis, dicens, an fortassis scientis præterita confessio remissionem peccatorum meruit etiã nescienti? Hoc, inquis, dicere dubito: ne quis mihi veraciter dicat, ergo saluus esset, si nec ad ipsam tinctionem corporis peruenisset, quoniam, sicut asseris, expiationis meritum per mysteria transacta meruerat. Postremò, cur non etiam mortuos baptizemus, quos sacro Baptismate repentina sæpe mors abstulit, sed eorum tamen voluntas fidelisque deuotio nota omnibus fuit? Ad iicis deinde, quòd si talia respondentì consensum præbere tentaueris, magna illicò sequeretur absurditas, vt putetur illis tantũ mysteriis sufficientibus, & salutem plenissimam conferentibus, aquam fontis æterni non renasciturum suscipere, sed renatum.

Postremò, ne quid vigilantissimæ intelligē-
tiæ tuæ , sollicitudinique piissimæ minus
quæsitum putaretur , adiungis in hoc arti-
culo posse vſitatam Canonum proponi sē-
tentiam , quæ infirmos iubet , si pro se res-
pondere non valuerint , sed eorum volun-
tati testimonium sui proprio periculo dixe-
rint, baptizari. Sub qua definitione magis
arbitrari dicis te, quid Ecclesia facere de-
bet imperatum , quàm quid ille percipiat
indicatum. Videlicet vt minister verbi liber
sit à culpa negligentia, non vt ille ostenda-
tur consors particepsque iustitiæ. Maximè
quia licet multos ex hac re, sicut ais, moue-
ri videas, sæpe tamen plus ipse commouea-
ris , hæsitans qualis debeat haberi senten-
tia de his , qui etiam si legitimè sana mente
baptizantur , præueniente velocius morte,
carnem Domini manducare , & sanguinē
eius bibere non sinuntur. Propter illa scili-
cet, quæ nota sunt fidelibus, Saluatoris ver-
ba dicentis , *Nisi manducaueritis carnem filij* ^{Ioan. 6}
hominis, & biberitis eius sanguinem, non habe-
bitis vitam in nobis. Deinde petis, vt veloci-
ori responsione vos instruam, vtrum noceat,
quantum noceat , an omnino nihil noceat,
si quis baptizatus in nomine sanctæ Trini-
tatis, sacro cibo potuque fraudetur. Quo-

niam igitur simul ad vtraque nos respōdere caritas imperat, dignum est vt imperanti caritati caritas libenter obediat. Speramus autem, quoniam ad persoluendum debitū caritatis, illius gratia adesse dignabitur, à quo ipsa caritas inspiratur. Primitus itaque meminisse nos oportet illius sententiæ, quā generaliter ad humani salutem generis promulgauit gratuita beneuolentia saluatoris. Illam porro nunc dico sententiam, quam ipse Dominus tanto tenaciū voluit nostris mentibus inhaerere, quantum eam cunētis præceptis suis posteriore dignatus est tempore promulgare. Post resurrectionem siquidem, corpore ascensurus in cœlum, sed cum suis in terra diuinitate mansurus, hæc inuenitur suis dixisse discipulis, *Euntes in*

Mat. 16 *mandum vniuersum prædicate Euangelium omni creaturæ: Qui crediderit & baptizatus fuerit, saluus erit: qui verò non crediderit, condemnabitur.* Benè hîc Dominus eum qui crediderit & baptizatus fuerit, saluari prædixit: non credentem autē damnandū sine dubitatione monstrauit. In nō credēte quippe nulla fuit futuri ratio faciēda Baptismatis. Qui enim non crediderit, siue baptizetur, siue nō baptizetur, sine dubitatione dānabitur. Hac autem sententia, qua Dominus statuit atq.

definiuit omnem non credētem sempiterna punitione damnandum, non solū eos, quos huius vitæ finis à sacramento Baptismatis inuenit alienos, verū etiam omnes hæreticos diuina non dubium est definitione damnandos. Si enim fides, quam vnā esse D. Paulus diuino spiritu repletus asse- *Ephes. 4.* uerat, illa est vtrique, quæ non ficta, sed vera, quia finis præcepti est caritas, de corde puro & conscientia bona, & fide non ficta, quomodo credere dicitur, à quo fidei veritas non tenetur? Quidquid enim credentis animum continet, quod à fidei veritate cognoscitur alienum, necesse est id esse mendacium. Odit autem Dominus omnes qui operantur iniquitatem, & perdet eos qui loquuntur mendacium. Propter quod & sapientia in Prouerbiis dicit: *Quoniam Veri-* *Prou. 8.* *tatem meditabuntur fauces meæ, abominata verò ante me labia mendacia.* Non ergo accipiunt in Baptismo salutem, qui non tenent in corde atque ore fidei veritatem. Ac per hoc, licet formam pietatis habeant, quæ constat in sacramento Baptismatis, abnegando tamen pietatis virtutem, nec vitam percipiūt, nec salutem. Quid autem talibus restat nisi damnatio sempiterna, quam eis pariet fides non vera, sed ficta? In talibus quippe nec

caritas est de corde puro. Quia secundum
 15. Beati Petri sententiam, *fide Dominus suorum*
corda purificat. Nec cordis puritas esse potest
 vbi fides non est: quia nec fides omnino di-
 cenda est, vbi vera non est. Quoniam igitur
 vbi est caritas de corde puro, ibi fides
 est non ficta, sed vera, cor autem non fi-
 ctione fidei, sed veritate purgatur: manife-
 stum est apud hæreticos, in quibus non est
 veritas, sed fictio fidei, caritatem de corde
 puro nullatenus inueniri. Conscientiam
 verò bonam quomodo possunt habere, in
 quibusper incredulitatem habitat princeps
 ille malitiæ? Isti ergo, nisi conuertantur, &
 fidei veritate saluentur, pro incredulitatis
 crimine damnabuntur: quia non illum di-
 lexerunt, in quem non secundum veritatē
 fidei crediderunt: nec in eis potuit esse con-
 scientia bona, quos constat contra fidem
 veram vsque in finem vitæ mortiferam te-
 nuisse perfidiam. Nec moueat aliquē, quòd
 licet fictam, tamen beatus Apostolus fidē
 nuncupauit: quia alio loco, sicut vnū Deū,
 sic vnā prædicauit & fidem. Illud enim
 beatus Apostolus non secundum rei veri-
 tatem, sed secundum opinionem fidelium
 posuit. Nam & illud, quod à Pseudoapo-
 stolis prædicabatur, idem Apostolus & E-

uangelium nuncupat, & Euangelium non
 esse confirmat. Quod in epistola eius, quæ
 scripta est ad Galatas, continetur his verbis:
Miror quòd sic tam citò transferimini ab eo qui Galat. 1.
vocauit vos in gratia Christi, in aliud Euangelium,
quod non est aliud. Quomodo ergo aliud E-
 uangelium, si non est aliud; nisi aliud secū-
 dum perfidorum errorem, nō autem aliud
 secundum fidei veritatem? Sic & fides à
 perfidis secundum propriam opinionem
 fingitur, à quibus vera fides, quam Spiri-
 tus sanctus tribuit, non habetur. Falsi quo-
 que nominis scientiam, idem beatus demō-
 strat Apostolus, dicens: *O Timothee, deposi-* 2.Tim. 6
tum custodi, deuitans prophanas vocum nouitates,
& oppositiones falsi nominis scientiæ. Sicut au-
 tem illa quæ falso nomine scientia nuncu-
 patur, scientia non est: ita & fides, quam
 non spiritus diuinus infundit, sed huma-
 nus sibi spiritus fingit, vtique fides non est.
 Ac per hoc, secundum illorum opinionem
 fides dicitur, quæ tamen fides esse nullate-
 nus inuenitur. Nam & Deos inuenimus in
 sanctis eloquiis appellari, quos tamen non
 esse Deos ipsa prorsus eloquia diuina testā-
 tur. Dicitur quippe in Psalmis: *Omnes Dī* psal. 95
gentium demonia. Hieremias quoque ait.
Dī qui non fecerunt cælum & terram, pereant Hier. 10

de sub cælo. Qui tamen alio loco ipsos, quos Deos nuncupat, ostendit non esse Deos.

Hier. 2.

Ait enim: *Circuite insulam Cethim, & videte; & in Cedar mittite, & intelligite vehementer, & videte si facta sunt talia. Si mutauit gens Deos suos, & isti non sunt Dij.* Inuenimus autem in Dei nomen in scripturis sanctis, quantum nobis nunc occurrit, modis quatuor.

Dicitur enim Deus secundum veritatem naturæ. quomodo sola sancta Trinitas est vnus, verus, & incommutabilis Deus, qui

Deut. 32. ait: *Videte quoniam ego sum Deus, & non est alius præter me.* & de quo Dauid dicit, *Quis*

Psal. 17. *Deus præter Dominum, aut quis Deus præter Deum nostrum?* Hic est vnus & solus Deus, qui solus naturaliter Deus est. Ab hoc vno vero Deo quidam vt essent Dij, non naturaliter habuerunt, sed dono gratiæ perceperunt. De talibus dijs fuit Moyse, cui ille

Exod. 7. vnus verus Deus ait, *Ecce dedi te Deum Pharaoni.* De talibus sunt etiam illi, de quibus

Psal. 81. dicitur, *Ego dixi, Dij estis, & filij excelsi omnes.* Isti ergo Dij eam gratiâ acceperunt vt Dij essent, quam acceperunt vt filij Dei fierent.

Ioan. 1. Dicit autem Euangelista, quia *quotquot acceperunt eum, dedit eis potestatem filios Dei fieri: his qui credunt in nomine eius. Qui non ex sanguinibus, neque ex voluntate carnis, sed ex Deo*

nati sunt. Iplis item dicitur, *Ego dixi, dij estis, & filij Excelsi omnes.* Duo ergo isti modi in nominando laudabiles. Vnus, quo naturaliter vocatur verus Deus: alter, quem per gratiam quibus voluit, largitus est Deus. Qui tamen ab inuicem magna differentia distinguuntur. Ille quippe modus, quo in Dei nomine veritas naturalis ostenditur, sic vnum Deum ipsa naturalis nominis veritate demonstrat, vt Deos in se nunquam vocari permittat. Hinc est, quòd sicut solus pater, aut solus filius, aut solus spiritus sanctus veraciter Deus dicitur: ita simul pater & filius & spiritus sanctus, non tres Dij, sed vnus Deus veraciter nominatur. Hoc habet illa Trinitas vnus Deus, vt tres quidem personæ sint, sed tres Dij non sint: quia illa Trinitas vnus verus est Deus. Ideo Dei filius non solum secundum veram diuinitatem, quam habet de natura patris, sed etiam secundum carnem, quam veram naturaliter habet de corpore genitricis, Deus verus & creditur & prædicatur à nobis. Quoniam æterna diuinitas filij cum plena humanitate sua, & eadem plena humanitas filij cum æterna diuinitate sua, vna est in Trinitate persona: & ipse totus in diuinitate atque humanitate sua vnigenitus

filius cum patre & spiritu sancto vnus est
 Deus. Alter verò modus quia non est na-
 turæ, sed gratiæ, ideo sine aliqua fidei pra-
 uitate nomen Deorum in se recipit: quia
 solam continet adoptiuorum multitudinē,
 quibus vt filij Dei fierent, summa Trinitas
 vnus verus Deus tribuit potestatem. In illo
 ergo modo claritas naturalis agnoscitur: in
 isto autem gratiæ largitas inuenitur. Duo
 vero residui modi, quibus Deus aut aliqua
 res aut persona nominatur, magis inueniū-
 tur digni vituperatione, quàm laude. Et
 idcò in vtroque manifesta inuenitur culpa,
 quia nulli eorum vel natura potest inesse,
 vel gratia. Vnus quippe est secundum affe-
 ctum prauę cupiditatis, alter secundum o-
 pinionem erroris. Nam carnali cupiditati
 deditus animus, hoc sibi Deum facit esse
 quod diligit præ omnibus. Hinc est quod
 beatus Apostolus, quorundam terrena
 sapientium ventrem Deum esse, sine du-
 bitatione pronunciat dicens: *Quorum finis in-*
teritus, quorum Deus Venter est, & gloria in con-
fusionem eorum qui terrena sapiunt. Hic existimo
 Apostolum, terrena sapere, pro terrena di-
 ligere posuisse. Talem sensum illo etiam lo-
 co arbitror contineri, vbi memoratus Apo-
 stolus dicit: *Igitur si surrexistis cum Christo,*
quæ

Philip. 3

quæ sursum sunt quarite, ubi Christus est in dex-
 teram Dei sedens. quæ sursum sunt sapite, non
 quæ sunt super terram. Ostendens namque
 quod ea quæ super terram sapere non de-
 berent, paulo post addidit: *Mortificate ergo* Ibid.
membra vestra, quæ sunt super terram, fornicationem, immunditiam, libidinem, concupiscen-
tiam malam, & avaritiam quæ est simulacrorum
servitus. Cum ergo mortificari præcipit mē-
bra nostra quæ sunt super terram, concu-
piscentiam utique in nobis mortificari re-
rum imperat terrenarum. Propter quod
alio loco dicitur: Qui autem sunt Christi, Galat. 5.
carnem suam crucifixerunt cum vitijs & concu-
piscentijs. Quibus etiam vult & nos mor-
tuos æstimemus dicens, Existimate vos mor- Rom. 6.
tuos quidem esse peccato, viventes autem Deo in
Christo Iesu. Illi quippe rei vivit quisque, quā
diligit; & illi se exhibent mortuum, cuius in
se mortificavit affectum. Terrena ergo sa-
piunt, qui terrena diligunt: & Deum sibi
ventrem faciunt, qui gulæ delectationibus
illecebrosam sui cordis mancipant servitu-
tem. Opinio verò humani erroris duplici-
ter sibi Dei nomen mendaciter in suum
figit exitium. Quæ gemina erroris opinio
non minus sibi hæreticos vendicat, quàm
paganos; dum & istos & illos eo sibi subii-

cit, quo simul omnes diuerlis vinculis multimodæ falsitatis adstringit. Pagani quippe, relicto vero Deo, falsorum Deorum superstitioni deseruiunt: hæretici autem de vero Deo falsa opinantes, veritati sanctæ religionis obstant. Manifestum est igitur, hæreticos vinculo mortiferi erroris obstringi, nec debere dici fideles, quos Ecclesiainimicos patitur pertinaces. quandoquidem infidelitatis reatus sit, vel falsa de vero Deo credere, nec cedere; vel falsum Deum, sub nomine veri Dei adorare.

Quoniam ergo de illa Domini sententiâ sumpsimus disputationis exordium, quæ statuit, quia omnis qui crediderit & baptizatus fuerit saluabitur; illum puerum saluatum esse credamus, in quo nihil defuisse eorum, quæ ad baptismatis officium atque effectum pertinent, inuenimus. Officium quippe secundæ natiuitatis in fide & confessione; effectus autem in regeneratione
Ioan. 1. consistit. Quorquot enim receperunt eum, dedit eis potestatem filios Dei fieri, his qui credunt in nomine eius. Credunt ergo ut filij Dei fiant; quoniam ad hoc accipiunt gratiam fidei, ut credentes accipiant gratiam sacramenti. Dignum namque est, ut dum corde creditur ad iustitiam, ore con-

fessio fiat ad salutem. Manifestum est autē,
 quòd sicut officium credulitatis & confes-
 sionis pertinet ad catechumenum: sic effe-
 ctus baptismatis pertinet ad ministrum.
 & dum ab illo per veram fidem confessio
 promitur; subsequenter est vt isto tingen-
 te salutaris mysterij gratia peragatur. Quā
 regulam in actibus Apostolorum sancti
 Philippi videmus opere custoditam: qui
 cū admoneretur à Spiritu sancto, vt præ-
 dicaret Eunuchò Dominum Iesum Chri-
 stam, simulque ad quandam aquam venis-
 set, Eunuchò postulante & dicente, *Ecce*
aqua, quis prohibet me baptizari? ille prius eli-
 cuit confessionis officium, cui rectè sancti
 baptismatis ministraret effectum. Ideo res-
 pondit Eunuchò, *Si credis ex toto corde, licet.*
 Et quia præcessit Eunuchi confessio, subse-
 quenter etiam in eo per Philippi ministeriū
 effectus sanctæ regenerationis impletur.
 Qua ergo iustitia ille qui credulitatis &
 confessionis persoluit officium, non con-
 sequeretur sanctæ regenerationis effectum?
 Nam si ordo attēdatur operis & mercedis,
 opus est in fide & confessione, merces in
 baptismo. Ideo enim quisque dignus ba-
 ptismate iudicatur, quando præcedit fidei
 confessionisque meritum; cui tanquam in

mercedem sancti baptismatis debeat tribui sacramentum. Dignus est autem operarius mercede sua. Non ergo baptismatis mercede fraudari debuit, qui opus credulitatis & confessionis, diuinitus data cordis & oris deuotione, persoluit. Non hoc utique fuit hora baptismatis interrogandus, quod est antea in Symboli pronuntiatione confessus. Nihil itaque illi ad æternam beatitudinem consequendam vox ablata nocuit, qui quamdiu potuit in ipsa fidei confessione permansit. Ablata non est, nec mutata: nec abolitum est quod dixit, quando dicere non potuit; quia quamdiu sentire potuit, sententiam non mutauit. Sed timeo, inquis, ne propterea Dominus, cui omnia possibilia sunt, facultatem loquendi denegauerit, quod cum beneficio secundæ natiuitatis iudicauit indignū. Immo magis ibi agnoscamus Dominum nostrum non fuisse oblitum misericordię suę, in quæ etsi vocem abstulit, vitam tamen non ademit, ut quod præbuit credere, confiterique, acciperet viuens. Sed dubitatur quomodo potuerit ætas illa rationis capax aliena confessione purgari. Immo sua inuenitur confessione purgata, cui tunc aliorum confessio subsequuta prodesse non posset, si propria minimè

præcessisset. Secundò itaque illi aliorum confessio sine dubio profuit, quando non nolentem præuenit, cùm deficienti subsecuta subuenit; & quod in illo voluntas illuminata credendo & confitendo cœpit, hoc pro illo caritas fraterna perfecit. Legimus itaque Dominum dixisse, *Qui me confessus* Luc. 12
fuerit coram hominibus, confitebor & ego eum coram patre meo qui est in cœlis. Isti autem, quamdiu loquendi facultas fuit, confessio illa non defuit. Quis ergo dicere audebit confessionem illam salutis indignam, quam videt non voluntatis peruersitate reiectam, sed infirmitatis necessitate comprehensam? Debilitata est enim lingua, non conscientia deprauata. Dicit autem Apostolus: *Ha-* 2. Cor. 4
bentes autem eundem spiritum fidei, sicut scriptum est, Credidi propter quod locutus sum, & nos credimus, propter quod & loquimur. Ille itaque qui spiritu fidei accepto credidit & locutus est, quoniã ipso spiritu, quẽ acceperat vt crederet, tunc carere poterat si negaret, quando non negauit, profectò nõ caruit. Ipso ergo spiritu quo locutus est credens, redemptus est tacens: quoniã ipso spiritu natiuitas secunda perficitur, quo secunda credulitas datur. Proinde quando non defuit sano credendi & confitendi voluntas, non ob-

fuit infirmo tacendi necessitas.

Est autem verum, quia solum paruulos ritè credimus offerētium fide saluari, quos originali tantum nouimus iniquitate damnari. id agente diuina iustitia miris modis, vt quodammodo vbi minimè propria, id est actualis malitia reperitur, nec voluntas propria requiratur: sed per abundantiam gratiæ detur aliis credentibus salus, quibus aliis peccantibus reatus adscriptus est. Ad-
dis autem, quia hic proprio viuebat arbitrio: super illud quod radice traxerat, multa sine dubio vitia propria cupiditate contraxerat, plurimorum peccatorum vinculis obligatus, & non nisi voluntaria credulitate saluandus, cum in illo redemptionis loco cōfiteri nec voluit, nec valuit, quia nihil sentiēs velle aliquid omnino nō valuit. Hęc nēpe, carissime frater, verba sunt tua, quę in illa, quam destinasti, continentur epistola. Proinde originalis peccati primitus est qualitas attendenda: quod vtique ab aliis admissum, in alios est generationis vitio propagatum. In cuius abolitione si quando illa ætas est, cui propria non possit inesse confessio, aliis credentibus & confitentibus datur paruulis salus, quibus aliis peccantibus est reatus adscriptus. Quocirca quoniam in

ætatibus iam ratione vrentibus propria confessio quaeritur : illa scilicet ratione, quoniam & viuunt & intelligunt , habentes ex vita peccatum originis , & ex intelligentia peccatum propriae actionis : ideo istum rectè dicimus sine dubitatione saluatum , quia & intelligens credidit , & quod credidit propria confessione firmavit : & deinde , quamuis iam non intelligens , tamen adhuc viuens , sacramentum sanctæ regenerationis accepit. Nam per sancti baptismatis sacramentum , illa vita est peccati originalis nexibus absoluta , quæ fuerat eiusdem peccati vinculis obligata. Et quia tanta est virtus sancti baptismatis , vt vbi vitam inuenerit , in qua illud originalis peccati vinculum soluat , & omnia quæ superadiecta repererit , secundæ natiuitatis beneficio diluat , iuxta illud quod Apostolus ait , *Nam iudicium ex vno in con-* Rom. 5.
demnationem , gratia autem ex multis delictis in iustificationem : dignè illum credimus esse saluatum , cui & ante baptisma credulitas , & intelligentiæ confessio non defuit , & in hora baptismi vita , quamuis in infirmo & febricitante , permansit. Vita igitur , quæ contraxit originale peccatum , quia quando petuit testimonium suæ conscientiae atque in-

telligentiæ dedit, etiam quando confiteri non potuit, illius confessionis merito remissionem peccati originalis accepit. Maxime cōsecratione vnitatis Ecclesiæ suffragante. qua factum est, vt confessionem tēpore pręterito redditam, quia non potuit in hora baptismi reddere propter infirmitatem corporis, adiutorio fraternæ redderet caritatis: vt eorum membrorum verbo fuisset adiutus, quorum fuit consortio deputandus. Illo autem originali peccato dimisso, cuncta peccata, quæ propria voluntate contraxerat, dimissa fuisse nemo fidelium dubitat. Pręterita igitur scientis confessio remissionem peccatorum meruit etiā nescienti quid diceret, nullatenus dubitemus.

Neque enim ab hac sententia nostrum animum reuocare debet vlla suspicio, ne quis dicat, quòd ille saluus esset, si nec ad ipsam tinctionē corporis peruenisset. cū vtique non dicamus illum sine baptismi sacramento sola cōfessione potuisse saluari. Qui enim crediderit & baptizatus fuerit, saluus erit. Illum vtique adolescentem, quia credidisse & cōfessum fuisse nouimus, ideo per sacramentum baptismatis saluum fuisse firmamus. Qui si non baptizaretur, non

solùm nesciens, sed etiam sciens nullatenus saluaretur. Via enim salutis fuit in confessione, salus in baptismo. Nam in illa ætate non solùm ei confessio sine baptismo nihil prodesset, sed nec ipsum baptisma nõ credenti neq. confitēti vllatenus proficeret ad salutem. Ideo ergo illi Deus confessionē prodesse voluit, quia eum vsq. ad sanctā regenerationem in hac vita seruauit. Donū itaque sanctæ regenerationis sicut ille, quia voluit, petiuit: sic Deus quia voluit, dedit.

Mortuos autem propterea non baptizamus, quia omne peccatum, siue originale, siue actuale, quia simul est animæ carniq. commune, nihil eorum dimittitur, si à sua carne anima separetur. Omnes enim nos manifestari portet ante tribunal Christi, vt recipiat vnusquisq. propria corporis prout gessit, siue bonum, siue malum. Anima itaque sine carne nulla ratione saluatur, quæ peccauit in corpore, nec credidit cùm esset in corpore. Ac per hoc, malū recipit quod gessit in corpore, non bonum, quod in corpore constituta non gessit. Caro quoque sine anima non potest baptizari, quia nec remissionem peccatorum accipere. Nam res quæ non viuit, sicut peccare, ita pœnitentiam peccati habere non potest. Quomodo

1. Cor. 5.

sacramentum remissionis dari potest, vbi vita non est, aut quemadmodum caro baptizetur in remissionem peccatorum, vbi anima non est, cum qua simul adhæret peccati consortium? Igitur etsi fuit cuiusquam viuentis voluntas fidelisque deuotio; qui tamen defunctus est sine baptismatis sacramento, ideo mortuus baptizari non potuit, quia ab illo corpore anima, cuius fuit voluntas fidelis deuotioque, discessit. Propterea iste igitur, de quo nunc agitur, dignè baptizatus est; quia anima eius, cuius voluntas fidelis, & deuotio nota omnibus fuit, vsque ad horam sancti baptismatis in sua carne permansit. Illa igitur mysteria, quæ ante baptismum in Ecclesia geruntur, concipi spirituales hominem faciunt, non renasci. Hinc est quòd perueniet ad salutem, si quem secunda natiuitas educet in lucem. Ad quam lucem, illis homo mysteriis præparatur; sed baptismatis sacramento perducitur. Hoc est quod superius dixi, in illis mysteriis esse salutis officium, in baptismo salutis effectum; quem vtiq. non infirmitatis incurio, sed sola sibi potest negare mutatio voluntatis.

Proinde firmissimè tenenda est illa Canonum sententia paternorum, quæ infirmos

iubet, si pro se respondere non valeant, sed eorum voluntati testimonium sui periculo proprio dixerint, baptizari. Viderunt enim sancti Patres, ream non esse voluntatem, quæ impedita cognoscitur, non mutata. Nec debere denegari sacramentum baptismatis, ubi firmitas cognoscitur voluntatis. Hoc autem statuentes sancti Patres, & quid Ecclesia facere debeat, & quid ille percipiat, indicarunt. Neque enim hoc Ecclesia faceret, si ille nullum in hoc facto beneficium percepisset. Nam cum *Ecclesiam Dei* 1. Tim. 3 *columnam & firmamentum veritatis esse* testatur Apostolus, si aliquam in mysteriis fidei habet partem, ubi non sit veritas firma, non est in omnibus mysteriis columna & firmamentum veritatis. Quæcumque enim firmitas sacramentis eius adimitur, ipsi Ecclesiæ necesse est auferatur. Non ergo columna & firmamentum veritatis veraciter vocatur Ecclesia, si in ipso principali humanæ salutis mysterio inuenitur infirma. Sed quia veraciter columna & firmamentum veritatis ab Apostolo nuncupatur, quidquid secundum ipsius Ecclesiæ constituta, in sanctis mysteriis redemptionis & reconciliationis humanæ, intra eam datur & accipitur, firma veritate datur; firma veritate

percipitur. Vt autem sanctæ matris Ecclesiæ generalia constituta, id est, ea quæ concordissima cunctorum firmat assensio Pontificum, nullatenus repellamus, in Prouerbis ita præcipitur: *Audi fili leges patris tui, & ne repellas instituta matris tue.* Quis ergo utilitatis æstimet vacuum, quod diuinitus audit nullatenus repellendum? Si ergo qui sic baptizatur non saluatur, nullus reatus est si hoc negligatur: nec minister verbi, si hoc non fecerit, tenebitur culpa negligentia, si ille in quo hoc fit, particeps non potest esse iustitiæ. Ibi ergo quisque arguitur negligentia reus, ubi operis non desperatur effectus. Et sicut ille dignè arguitur negligentia, qui quod utile est non operatur: ita illius qui superfluis laborem rebus impendit, rectè ipse labor irritus atque inutilis improbatur. Quod & si in hac parte irritus labor impenditur, irrita erit Pauli Apostoli sine dubitatione sententia, qua dixit, *Quia unusquisque propriam mercedem accipiet secundum suum laborem: cum proculdubio de ministris Christi & dispensatoribus mysteriorum Dei, sicut eiusdem epistolæ locus indicat, loqueretur.*

Ibid. Præmiserat enim, *Ego plantavi, Apollo rigauit, sed Dominus incrementum dedit.* Quid autem fuit plantare Pauli, & Apollo rigare, nisi

quòd Paulus plantabat euangelizando verbum salutis, Apollo autem rigabat ministrando sacramentum baptismatis? Cùm ergo dixisset Apostolus, *Itaque neque qui plantat est aliquid, neque qui rigat, sed qui incrementum dat Deus: vt ostenderet illius plantationis & rigationis firmam manere mercedē, continuo subdidit: Vnusquisque propriam mercedem accipiet secundum suum laborem.* Ostendens autem laborem diuini operis inanem esse non posse, alio loco eiusdem epistolæ sic loquitur: *Itaque fratres dilecti, stabiles estote & immobiles, abundantes in opere Domini semper, scientes quòd labor vester non est inanis in Domino.* Illud est autem opus Dei, quod sic impenditur vnicuique viuenti, vt eius qui accipit aut animæ prodesse possit, aut corpori. Et illa quidem quæ prosunt animæ, necesse est vt etiam corpori profint: non autem omnia quæ corpori prosunt, ad vtilitatem pertinent animarum. sicut est cibus, potus, vestimentum, & hospitium, quæ inueniuntur non accipienti animæ prodesse, sed danti. Sacramentum vero baptismatis ad hoc homini datur, vt anima cum carne saluetur. Quod profectò inaniter minister dat, si non ad hoc dat, vt ille qui baptizatur, donum æternæ salutis acci-

1. Cor. 15

piat. Inaniter enim sacramentum redemptionis datur, si non redimitur cui datur. Sed si attendamus verbum vnum epistolæ tuæ, nulla huius dubitatio remanebit. Dixisti enim, propterea hoc paternis Canonibus definitum, ut minister verbi liber sit à culpa negligentia. Quomodo autem in hac negligentia culpam minister incurrit, si in diligentia non aliquid proficit? Non enim inaniter negligentia contrahit culpam, nisi quia hoc non fecit quod facere debuit: illud autem facere propterea deberet, quod prodesse poterat si fecisset. Ideo autem negligentia culpam contraxit, quia obfuit non faciendo, quod prodesset proculdubio, si fecisset. Proinde ideo debet secundum paternos Canones infirmus ille, cuius voluntati non deest attestatio proximorum, sine dubio baptizari, ut & minister verbi liber sit à culpa negligentia, & ille fiat confors particepsque iustitiæ.

Nullus autem debet moueri fidelium in illis qui etsi legitimè sana mente baptizantur, præueniente velocius morte, carnem Domini manducare & sanguinem bibere non sinuntur: propter illam videlicet sententiam saluatoris qua dixit: *Nisi manducaueritis carnem filij hominis, & biberitis eius sanguinem,*

non habebitis vitam in vobis. Quod quisquis, non solum secundum veritatis mysteria, sed secundum mysterij veritatem considerare poterit, in ipso lauacro sanctę regenerationis hoc fieri prouidebit. Quid enim agitur sacramento sancti baptismatis, nisi ut credentes membra Domini nostri Iesu Christi fiant, & ad compagem corporis eius Ecclesiastica vnitate pertineant? Ipsis enim dicit B. Apostolus, *Vos estis corpus Christi, membra de* 1. Cor. 12. *membro.* Quos ostendit non solum ipsius sacrificij participes, sed ipsum sanctum sacrificium esse, dum eos iubet viuam hostiam seipso Deo humiliter exhibere, dicens, *Obsecro itaque vos, fratres, per misericordiam* Rom. 12. *Dei, ut exhibeatis corpora vestra hostiam viuentem, sanctam, Deo placentem.* Quod etiam sanctus Petrus similiter docens ait, *Et vos* 1. Pet. 5. *tanquam lapides viui adificati in domos spirituales, in sacerdotium sanctum, offerentes spirituales hostias acceptabiles Deo per Iesum Christum.* Vnde beatus Paulus cum quodam loco dixisset, *Calix benedictionis, cui benedi-* 1. Co. 10. *cimus, nonne communicatio sanguinis Christi est? & panes quos frangimus, nonne participatio corporis Domini est?* ut nos esse ipsum verum panem, verumque corpus ostenderet, continuò subiunxit, *quoniam vnus panis,* Ibid.

Vnum corpus multi sumus, omnes qui de vno pa-
Ephes. 4 ne participamus. Vnde alio loco dicit, Vnum
corpus & vnus spiritus, sicut vocati estis in vna
ibid. spe vocationis vestrae. Et iterum, Veritatem au-
tem facientes in caritate, crescamus in illo per
omnia, qui est caput Christus. Ex quo totum cor-
pus compactum & concretum per omnem iun-
cturam subministrationis, secundum operatio-
nem in mensuram vniuscuiusque membri, aug-
mentum corporis facit in edificationem sui in ca-
ritate. Nam & carnem Domini nos esse cō-
Ephes. 5. firmans, ait: Nemo enim vnquam carnem suam
odio habuit, sed nutrit & fouet eam, sicut &
Christus Ecclesiam, quoniam membra sumus
corporis eius, & de ossibus eius. Quocirca
quoniam vnus panis & vnum corpus multi
sumus, tunc incipit vnusquisque particeps
esse illius vnus panis, quando cœperit
membrum esse illius vnus corporis, quod
in singulis membris, quando in baptismo
capiti Christo subiungitur, tunc iam Deo
viua hostia veraciter immolatur. Illo enim
natiuitatis munere sic fit sacrificium, sicut
fit & templum. Quod beatus Apostolus
1. Cor. 3. docens ait: Nescitis quia templum Dei estis,
& spiritus Dei habitat in vobis? Qui ergo
membrum corporis Christi fit, quomodo
non accipit quod ipse fit, quando vti que
illius

illius fit verum corporis membrum, cuius corporis est in sacrificio sacramentum? Hoc ergo fit ille regeneratione sancti baptismatis, quod est de sacrificio sumpturus altaris. Quod etiam sanctos Patres indubitanter credidisse ac docuisse cognoscimus. Beatus quoque Augustinus de hac re sermonem fecit admodum luculentum, & aptum ædificationi atque instructioni fidelium. Quem sermonem totum epistolæ malui subiungere, quia nec est prolixus, & in ipsa breuitate magnæ instructionis ac suauitatis est plenus.

Sermo B. Augustini Episcopi ante
altare ad infantes de Sa-
cramento.

HO C quod videtis in altare Dei, etiam trans-
acta nocte vidistis. sed quid esset, quid sibi
vellet, quàm magnæ rei sacramentum contineret,
nondum audistis. Quod ergo videtis, panis est &
calix: quod vobis etiam oculi vestri renuntiant.
Quod autem fides vestra postulat instruenda;
panis est corpus Christi, calix sanguis Christi.
Breuiter quidem hoc dictum est, quod fidei fortè
sufficiat: sed fides instructionem desiderat. Dicite

Esai. 7. enim Propheta, Nisi credideritis, non intelligetis. Potestis ergo modò dicere mihi: Præcepisti ut credamus; expone ut intelligamus. Potest enim in animo cuiuspiam cogitatio talis oboriri. Dominus noster Iesus Christus nouimus vnde acceperit carnem de Virgine Maria. Infans lactatus est, nutritus est, creuit, ad iuuenilem ætatem perductus est, à Iudæis persecutionem passus est, ligno suspensus est, in ligno interfectus est, de ligno depositus est, sepultus est, tertia die resurrexit, quo die voluit in cælum ascendit. Illuc leuauit corpus suum, vnde est venturus ut iudicet viuos & mortuos. Ibi est modò sedens ad dexteram Patris. Quomodo est panis corpus eius; & calix, vel quod habet calix, quomodo est sanguis eius? Ista, fratres, ideo dicuntur sacramenta, quia in eis aliud videtur, aliud intelligitur. Quod videtur speciem habet corporalem; quod intelligitur, fructum habet spiritalem. Corpus ergo Christi si vis intelligere, *1. Cor. 12* Apostolum audi dicentem fidelibus, Vos estis corpus Christi, & membra. Si ergo vos estis corpus Christi & membra; mysterium vestrum in mensa Domini positum est, mysterium Domini accipitis. Ad id quod estis, Amen respondetis, & respondendo subscribitis. Audis ergo corpus Christi, & respondes Amen. Esto membrum corporis Christi, ut verum sit Amen. Quare ergo in pane? nihil hinc de nostro asseramus. ipsum

De baptismo Æthiopis. 259

Apostolum item audiamus. Cum ergo de isto sacramento loqueretur, ait: Vnus panis, vnum corpus multi sumus. Intelligite, & gaudete. Vnitas, pietas, veritas, caritas, vnus panis, vnum corpus multi sumus. Recolite enim quia panis non fit de vno grano, sed de multis. Quando exorcizabamini, quasi molebamini: quando baptizati estis, quasi conspersi estis: quando Spiritus sancti ignem accepistis, quasi cocti estis. Estote quod videtis, & accipite quod estis. Hoc Apostolus de pane dixit. Iam de calice quid intelligeremus etiam non dictum satis ostendit. Sicut enim ut sit species visibilis panis, multa grana in vnum consperguntur; tanquam illud fiat quod de fidelibus ait scriptura sancta, Erat illis anima & cor vnum in Deum: sic & de vino fratres, recolite vnde sit vnum. Grana multa pendent ad botrum; sed liquor granorum in unitate confunditur. Ita Dominus Iesus Christus nos significauit, nos ad se pertinere voluit: mysterium pacis & unitatis nostrae in sua mensa consecrauit. Qui accipit mysterium unitatis, & non seruat vinculum pacis, non mysterium accipit pro se, sed testimonium contra se.

Arbitror, sancte frater, disputationem nostram, præclari doctoris Augustini sermone firmatam, nec cuiquam esse aliquatenus ambigendum, tunc vnumquemque fide-

lium corporis sanguinisque Dominici participem fieri, quando in baptismo membrum corporis Christi efficitur. nec alienari ab illo panis calicisque consortio: etiamsi antequam panem illum comedat, & calicē bibat, de hoc sæculo in unitate corporis Christi constitutus abscedat. Sacramenti quippe illius participatione ac beneficio non priuatur, quando ipse hoc quod illud sacramentum significat, inuenitur. Ora pro nobis semper vegetatus fortis in Christo, sancte & venerabilis frater.



EPISTOLA B. FVLGENTII
AD REGINVM.

*Vtrum caro Christi corruptibilis, an
incorruptibilis fuerit.*



ACCIPIENTS litteras tuas, fili carissime Regine, & sollicitudinem cordis tui agnoscens, Dominum collaudavi, qui potest vtrumque bonum & conferre seruandum, & seruare collatum. Vtrumque enim pertinet ad medelam animarum no-

strarum, quo gaudeamus in beneficiis, quæ nobis infirmis medici nostri non desinit ineffabilis operari benignitas, ut spiritali profectu & augeatur in nobis sanitas, & minuatur infirmitas. Modus verò infirmitatis nostræ duplici qualitate consistit: si vel per ignorantiam minus aliquid in fide nouerimus, vel aliquid habeamus in operibus nostris, quod non conueniat regulæ veritatis. Quoniã igitur corpus quod corrumpitur aggrauat animam, ideo nos vtraque conturbat infirmitas. Sed ille qui nos fecit, & gaudere præcepit quia vicit mundum, speramus quia nos in fide, quæ per caritatē operatur, perficiet. Dicis ergo, quod nuper in Orientis partibus noua est orta inquisitio, aliis asserentibus incorruptibile fuisse corpus Christi ab ipso conceptionis exordio: aliis autem contrarium fatentibus, corruptibile ante passionem, incorruptibile verò post resurrectionem. Tu tamen in vtraque parte valdè hæsitans, nec respondere sciens, instas ut quid tenere debeamus commoneam. Hæc sunt quæ interrogas. Superiùs autem, tuæ gratulationis indicio insinuas te meis litteris recreatum. Quoniã igitur interrogatio tua recti cordis tramitē tenuit, quo primitus quod ad fidem, dein-

de quod ad opera pertinet apprehēdit, quia fidē, quę per caritatē operatur, commendat Apostolus. illo scilicet nostrę salutis obtentu, quod fides sine operibus mortua est in semetipsa. Volo itaque carissime, vt scias non vno modo dicere corruptionem, sed duobus modis, sicut dicimus infirmitatem & similiter mortem. Dominus enim mortē inquit esse perpetrationē criminis, & mortem in qua retributio nihilominus intelligitur vltionis. Dicitur etiam infirmitas hominis, eius scilicet qui exhibet peccato seruitiū, & eius qui portat peccati supplicium. Vtrūq. ad infirmitatē pertinet peccatoris, & delectatio in peccatis, & afflictio pro peccatis. Sic etiam corruptionem dupliciter dicimus, cuius vna pars in sola hominis culpa, altera inuenitur in pœna. Ad culpam quidem pertinet illa corruptionis pars, quā Apostolus ostendit, vbi dicit: *Homines corrupti mente, reprobi circa fidem.* Ad hanc partē corruptionis pertinet, quod alio loco dicit, *Corrumpunt mores bonos colloquia praua.* Ista corruptionis pars, primo animam capit, & per animam carnem in peccatum trahit. Hęc pars corruptionis mentem superbiētis Angeli primò inuasit, ac deinde primū hominem, postmodum totum genus hu-

manum. Primam ergo corruptionis partē, quæ consistit in concupiscentia vel perperatione peccati, secuta est illa pars quæ cōstat in retributione supplicij, quæ duobus tenet animam & corpus hominis peccatoris. In ipsa quoque retributione quædam sunt, in quibus pœna peccati simul sit & ipsum peccatum: alia verò sunt, in quibus solum sit peccati supplicium. In illis ergo in quibus reperitur pœna simul & culpa, opere quo reatus in peccatore punitur, Deo derelinquente, augetur homine delinquēte. Hæc est illa pars corruptionis, per quam sic peccata puniuntur in homine, vt non defināt, sed vt crescant: sicut est libido cordis & corporis: quæ cū ex pœna peccati eueniat, peccatum multiplicat, & animam punitioni subditam noxia delectatione captiuat. Tertiam quoque punitionem huic secundæ retributam Apostolus dicit: *Pro-* Rom. 2.
pter quod tradidit illos Deus in reprobum sensum, vt faciant quæ non conueniunt. Non ergo vt patiantur tantū, sed vt faciant vnde peccata multiplicentur, diuina in reprobum sensum damnatione traduntur. Veruntamē hæc traditio, non in operatione Dei, sed in desertione consistit. Quosdam enim tradit Deus, nec dimittit: quosdā vero in eo quod

tradit dimittit. Bonos sic tradit paterna benignitate, vt non deferat paterno iuuamine. Ac per hoc tradit eos ad patiēda mala quibus ipsi perficiantur, non ad facienda quibus deteriores existant. Malos autem ad hoc tradit Dominus & dimittit, vt ipso deferente, dum non Dei voluntatem, sed suā sequuntur, sua turpitudine delectentur, nec pœnam suam portent inuiti, sed sequantur illecti. Hæc est iniquorum corruptio, quæ sic est pœna peccati, vt sit & ipsa peccatum. Alia corruptionis pars est, quæ nec animam nec corpus fidelis hominis polluit, sed affligit: quia nec ad inquinandum hominem, sed ad humiliandum militat peccatorem. Hac itaque discretione retenta, dum corruptionem voluntariam à corruptione pœnali discernimus, ipsiusque pœnalis corruptionis vnā partem cum peccato, alterā sine peccato inesse hominibus inuenitur, talis autem corruptio cordis nihil aliud est, nisi priuatio sanitatis, quia nulla ex hac corruptione contrahitur iniquitas, licet insit infirmitas: facillimè inuenimus quam partem corruptionis suscepit Christus in corpore. Nam quamuis carnem pro nobis suscepit, tamen accepit immunem ab omni peccato originali & actuali. Ipsam tamen

carnem, non solum infirmam, sed etiam veraciter cognoscitur accepisse mortalem. Proculdubio in quantum corpori eius inerat suscepta mortalitas, in tantum ei potuit inesse corruptionis infirmitas. Illius scilicet corruptionis, quæ abest ab omni peccato. Ad talem corruptionem pertinet fames & sitis. Facile siquidem esuriendo & sitiendo corpus mortale corrumpitur; quando per hæc etiam ad ipsius mortis exitum peruenitur. Per quam mortem venit ad corruptionem, dum deferente anima, in tantum corpus corrumpitur, ut in putredinem ac pulverem redigatur. Hanc corruptionem caro Christi non vidit, quæ die tertia resurrexit. Famem tamen, sitim, fatigationem corporis, ac dolorem veraciter sensit. Quæ omnia pertinent ad illam partem pœnalis corruptionis, quam sic ex peccati pœna supplicio trahimus, ut ex ea nullum peccati supplicium contrahamus. Esurisse Christum, sitisse, fatigationemque sensisse Euangelium docet, quem manifestum est esurisse, quando ad ficulneam venit, nec in ea fructum inuenit; fatigatus etiam ex itinere sedit super puteum. In cruce etiam dixit, sitio. Dolorem etiam sustinuit sicut dicit Esaias: *Vulneratus est pro-* Esai. 53.

pter iniquitates nostras ; infirmatus est propter scelera nostra. Hanc infirmitatē in Domino non putatiuam , sed verā , docet Apostolus.

1. Cor. 15 Nam & si crucifixus est, inquit, ex infirmitate, sed vixit ex virtute Dei. Infirmitatem non aliud dicit, quam corruptibilitatem. Restat itaque, vt & Christum fuisse in aliqua corruptione ad quam non rediit, & non fuisse in ea quam non vidit, per sacram scripturā discamus. Ad corruptionem pertinet corporis animalis & mors quæ præcedit putredinem, & putredo quæ sequitur mortem. Proinde Christi corpus, quod est verè mortuum, & die tertio sine aliqua putredine suscitatum, vnā partem corruptionis vidisse, aliam non vidisse dicendum est. Fuit quippe in corruptione mortis, sed non in corruptione putredinis : quādo caro Christi sic est mortua, vt nulla fuisset membrorum putredo vel dissolutio subsequuta. Christus ergo non reuertetur in corruptionem, quia surgens à mortuis, iam non moritur, & mors illi vltra non dominabitur. Christus ergo non vidit corruptionem, quia nullam sensit caro eius putredinem. Hoc autem non eiusdem carnis incorruptibilitas, sed resurrectionis celeritas fecit. His omnibus in quibus nostræ seminationis ac

resurrectionis certissimam qualitatem verbis Apostolicis S. Augustinus ostendit dicens: *Constat itaque, neque vlllo modo dubitandum est, corpus Christi quod licet corruptionem putredinis in sepulcro non senserit, quia scriptum est.* Epist. 146. ad Consensum.
Nō dabis sanctum tuum videre corruptionem, clavis tamen & lancea corrumpi potuit: nūc omnino in incorruptione persistere: & quod in contumelia passionis mortisque seminatum est, nūc esse in gloria vitæ æternæ: & quod ex infirmitate potuit crucifigi, nunc in virtute regnare: & quod erat corpus animale, quoniam ex Adam sumptum est, nunc spiritale esse, quoniam spiritui nunc inseparabiliter copulatum est. His verbis Augustinus ostendit quale corpus Christi post resurrectionem sit, & quale ante passionem fuerit. Evidenter confirmat corpus Christi omnino nunc in incorruptione persistere, nunc etiam in gloria vitæ æternæ, nunc in virtute regnare, nunc spiritale esse. Sed corpus non est omnino incorruptibile, quod dolorem potest per vulnera sentire. Quocirca apparet Christum ante passionē, immo vsq. passionem & mortem, mortale atque animale corpus habuisse; & pro nobis in eodem corpore veram famem, verā sitim, fatigationemque sensisse, vera clauorum ac lanceæ percepisse vulnera. & ex

Psalm. 19.

hoc verum dolorem non necessitate, sed voluntate sensisse, veræque mortis acceptione pro nobis animam suam propria potestate posuisse. Consequens est, ut idem Christus ex infirmitate mortuus, ex virtute autem Dei suscitatus, nostris inueniatur exemplum præbuisse corporibus. Humiliauit enim se Christus vsque ad susceptionem totius infirmitatis nostræ: ut sicut ait *Apo-*
Philip. 3 *stolus*, reformetur corpus humilitatis nostræ configuratum corpori claritatis suæ. Hinc ergo manifestissimè apparet, quid de animalis ac mortalis corporis qualitate debeat omnis Christianus firma credulitate sentire. Impossibile ut corruptibilitas esse negetur, ubi animalis corporis mortalitas inuenitur. Christus ergo in sola carne portauit nostram corruptionem, in qua veraciter nostram portauit & mortem. In animaverò sic perfectā incorruptibilitatem seruauit, sicut peccatū nec propagine traxit, nec cōtagione cōtraxit. Vnde & infirmitates animarū nostrarū, quas in sua rationali anima portauit Christus, sine ulla corruptione portauit. Nullus quippe potuit defectus inesse virtutis, ubi infirmitatis susceptione indefessa permansit perfectio caritatis, quæ vnigenitum Deū fecit vsq. ad mortē

pro nobis accedere, & confusione contēpta crucis opprobrium sustinere. Propter quod tristitiam, mœrorem, vel si quas nostrarum animarum infirmitates habuit Christus, veras quidem, sed voluntarias habuit. Veras scilicet, vt manifestum in se animæ rationalis monstraret affectum: voluntarias, vt nostris infirmitatibus ad futurum ostenderet suæ virtutis auxilium. vt agnoscere-
mus nos ipso adiuuante in infirmitatibus, quas necessitate patimur, fulciendos. Qui propterea voluntate nostras infirmitates acciperet, vt & in hac vita infirmitatum necessitate turbatis auxilium contulisset; & post hanc vitam omnem à nobis infirmitatis necessitatem misericorditer abstulisset. Ac sic omnis fidelis agnoscens Christum participem humanæ infirmitatis, certissimè speraret participem se fore diuinæ virtutis, nec se ambigeret illius virtute firmandū, quem pro se cognouisset non necessitate, sed voluntate turbatum. In ipso habiturum æternam lætitiā, cui suam voluntate videret inesse tristitiā. qui sicut mansit in tribulatione tranquillus, in morte securus, sic in infirmitate fortissimus, & in humilitate altissimus.

*Hanc Epistolam B. Fulgentius morte
præreptus non absolvit.*



SERMO B. FVLGENTII
EPISCOPI DE EO QVOD
ait Micheas Propheta,

Indicabo tibi homo, quid sit bonum.



E præfenti Prophetica lectione, in qua nostrarum magna continetur vtilitas animarum, vestra caritati loqui disposuimus, ab illo poscentes sermonis congruam facultatem, à quo bonam gratis accepimus voluntatem. Quis autem hanc donat, nisi Deus, qui operatur in suis & velle & perficere pro bona voluntate? Proinde verba sancti Micheæ, quæ pariter audiuius, pariter reuoluamus. Et vtinam fratres, sicut ea sermone reuoluimus, sic operibus impleamus. Audiuius enim verba hominis sancti, hominis iusti, hominis pij, hominis de sua salute solliciti, hominis qui se sciebat creatum à Deo, qui se cogitabat esse sub Deo. Qui cum magno timore & tremore diuinum exspectabat iu-

dicium, in quo se nouerat, non solum de factis & dictis, verum & de ipsis cogitationibus suis rationem ante tribunal iusti iudicis redditurum. Cogitans itaque futurum iudicium Dei, de quo debemus etiam nos cuncti metuere, & in omnibus operibus nostris cum magna cordis formidine cogitare: hoc cogitans homo iste sanctus & iustus, quærebat quid faceret, vel quibus muneribus Deum iudicem deprecaretur. Sciebat autem omnipotentem Deum, qui omnia condidit, qui cuncta ex nihilo fecit, qui nihil ex indigentia paupertatis, sed vniuersa ex abundantia bonitatis instituit, non sola quærere munera nostra, sed etiam opera nostra. Immo sciebat in hoc maximè Deum delectari munerib. nostris; vt ei placeamus moribus sanctis & operib. bonis. Quærens igitur homo iste quid ab homine offerendum sit Deo, dicebat, Quid dignum offeram Domino? Hoc autem verbo, quo non ait, quid offeram Domino, sed quid dignum offeram Domino? docuit nos vt si quando munus offerre Deo volumus, aliquid dignum quæramus, & hoc offeramus. Quid autem potest esse in oblatione Deo dignum, nisi quod est in creatura præcipuum? In omnibus verò creaturis, quas

fecit Dominus super terram, nulla melior inueniri poterit, quàm illa creatura, quam Deus ad suam imaginem fecit. Hæc autem creatura in terris homo est. Quisquis igitur offerre vult aliquid dignum Deo, non prius aliud quid offerat quàm seipsū. Deus enim qui hominem ad imaginem suā fecit, imaginem suam sibi delectatur offerri: ipsam sibi puram & mundam præcipit exhiberi. Inde est quod Saluator noster quibusdam

Mat. 22

tendantibus eum, ita respondit. *Reddite Cæsari quæ Cæsaris sunt, & quæ sunt Dei Deo.* Hoc est dicere, O homo, sicut imaginem suam Cæsari reddis in nummo, sic redde Deo suam imaginem in teipso. Redde homo creatori tuo imaginem suam; redde iustam, non iniquam: redde humilem, non superbam. Non auaritia turpem, non rapacitate deformem, non vitio iracundiæ leuem, non terrena dilectione contritam, non liuore sordidam, non fornicatione pollutam: sed prudentiæ pondere integrā, fidei veritate mundam, & bonis moribus atque operibus splendidam. Quomodo autem Deo imaginem suam reddamus in nobis, Propheta sanctissimus admonet dicens: *Indicabo tibi, homo, quid sit bonum, & quid Dominus quærat à te. Vtique facere iudicium*

Mich. 6.



& iustitiam, & diligere misericordiam, & sollicitum ambulare cum Deo tuo. Primum itaque quid sit facere iudicium, quod B. Prophe-
ta primum posuit, inquiramus. Iudicium dicitur conuentus, vbi accusatio & defen-
sio cuiuslibet hominis agitur: vnde ne-
cesse est vt adiudicatus exeat qui fuerit
reus; & victor abscedat, qui probatur in-
noxius. Revertere igitur ad te, homo. In
te quare accusationem: in te quare defen-
sionem: in te quare iudicium. Immo tu
esto & accusator, & defensor, & iudex.
Intra in secretarium cordis tui, vbi soli te
vident oculi domini Dei tui. Ibi te accusa,
vt valeas accusatione defendi. Ibi te con-
vince, vt victoriam possis adipisci. Ibi te
condemna, vt mercaris absolui. Ibi te pu-
ni, si vis ab æternæ punitionis supplicio
liberari. Fac in te, Christiane, verum re-
ctumque iudicium; sollicitè secreta tui
cordis attende. Facta tua mala tibi ante
oculos tuos pone: quæcunque deleueras
in intimo libro tuæ recordationis recense
frequenter ac relege, sine conuiuentia te-
ipsum discute tu ipse, & cogitationum tor-
mentis adflige. Tu in te iustam sententiam
prome. Quidquid mali feceras peccando,
puni veraciter pœnitendo. Et iudex effe-

Etus peccatorum tuorum, quod facere solent iudices capitalibus reis, hoc ipse fac iniquitatibus tuis. Noli accipere personam tuam, cum iudicas causam tuam. Sed cum seueritate mala tua discute, cum vigore in peccata tua condemnationis sententiam prome; & peccata quæ in te condemnas, occide. Hoc est autem peccata occidere, peccatis deinceps nullatenus obedire. Noli ergo esse peccatorum factor, & eris occisor. Si vero fueris in peccata tua iudex iustus, de iusto Dei iudicio exies absolutus. Ut autem in teipsum iustum possis celebrare iudicium, audi Apostolum Paulum, qui docet quæ in te debeas opera mortificare, ut ad vitam valeas peruenire. Dicit enim,

Coloss. 3 Mortificate membra vestra quæ sunt super terrâ, fornicationem, immunditiam, libidinem, concupiscentiam malam, & auaritiam, quæ est idolorum seruitus. propter quæ venit ira Dei in filios incredulitatis. Ecce habes, homo, quæ in te iudices, habes quæ condemnes, quæ in te mortifices. Ista iudica, & non iudicaberis. Ista condemna, & non condemnaberis. Ista mortifica, & non morieris. Hic esto seuerissimus iudex, hic esto vehementissimus carnifex. Ista rectè considerando iudica, abiiciendo mortifica. Si enim peccata tua

rectè confideraueris, iudicasti: si abieceris, occidisti. Vt ergo defendas te, accusa te; vt absoluas te, iudica te; & vt ad victoriam perducas causam tuam, considera consciẽtiam tuam. Agnosce iniquitatem tuam, mortifica concupiscentiam tuam, corrige vitam tuam, & rectè iudicando liberabis animam tuam. Ecce fratres, quantum Dominus dedit, quid sit facere iudicium diximus: quid deinde sit iustitiam facere nũc dicamus. Iustitiam facere est, vt quod tibi fieri non vis, alteri ne feceris: sed & hoc alteri facias, quod tibi ab altero fieri delectaris. Vis autem tibi bonum ab omni homine fieri: hoc enim iustum est, vt omnis homo bonum faciat homini: quia contra iustitiam facit, qui hominĩ malum facit. Malum autem dico illud opus, quo per prauam cupiditatem peccatur: non quo per caritatem pœna peccantibus irrogatur. Malum nunc ego dico, non quo proximus à culpa reuocatur, sed quo Deus iustus ad iracundiam prouocatur. Illud malum dico, non quod bene solet inferre seueritas, sed quod malè perpetrare consuevit iniquitas. Illud malum nunc dico, quod nunquam potest esse iustum, sed semper inuenitur iniustum. Illud malum

dico, quo delinquitur Deo, non quo consultitur proximo. Illud ergo malum nunc dico, quod sic est omnibus facientibus malum, ut nulli patienti sit bonum. Iustitiam igitur homo faciet, si malum nulli faciat, & bonum omnibus faciat: illud autem nulli faciat malum, à quo nos B. Apostolus prohibet dicens, *Nulli malum pro malo reddentes.* Quibus utique verbis plenam nobis benevolentiam commendavit. Non enim dixit, nulli malum facientes, sed, nulli malum pro malo reddentes. Ostendens parum esse Christiano malum non inferre, nisi discat etiam non referre. Vnde cognoscitur, quam pessimum sit, si nos alicui, qui malum facientibus aliis malum pro malo reddere non debemus. Serua igitur, Christiane, secundum regulam iustitiam. Bonum omni homini facito: malum verò nec facias alicui, nec reddas. Si enim malum pro malo reddideris, etiam tu sine dubio malus eris. Tunc ille qui prior tibi malum fecit, non solus malus erit, quia socium malitiæ te habebit. Cum autem cœperis malum pro malo reddere, in hoc magis culpabilis eris, quia malum quod in aliis execraris, hoc imitaris. Malus autem factus, non vincis malum, sed vinceris à malo, & quod peius est, non vin-

ceris alieno malo, sed tuo. Non est enim quemadmodum malus fias, nisi à bonitate deficias. Ita fiet vt in teipso remaneas damnabiliter victus, si fueris tuæ voluntatis vitio deprauatus. Tunc itaque hominẽ malum certissimè superabis, si bonus ipse permanseris, si non pro malis mala, sed pro malis bona reddideris. Propter quod Apostolus, qui ait, *Nulli malum pro malo reddentes*, paulo pòst dicit, *Noli vinci à malo, sed vince in bono malum.* Rom. 12 Ecce vt nulli malum pro malo reddamus ab Apostolo simul audiui-
mus: vt etiam omnibus bona faciamus, ab ipso rursus Apostolo pariter audiamus, qui ait: *Ergo dum tempus habemus, operemur bonum ad omnes.* Galat. 6 Tunc itaque facimus iustitiam, cum illa hominibus facimus, quæ nobis volumus ab hominibus fieri. Hanc iustitiam Saluator ipse commendans ait. *Omnia quæ vultis vt vobis faciant homines, eadem & vos facite illis.* Matt. 7. Quæ autem vultis vt vobis homines faciant, nisi bona? Si autem mala vobis faciant, non quæ vultis faciunt. Ergo & vos, si malum pro malo reddatis, quia non ea facitis hominibus, quæ vultis vt faciant vobis, non utique facitis quod Christus præcepit, sed quod diabolus persuasit. Quapropter vt iustitiam faciatis quam præ-

cepit Christus, hoc impendite vnicuique homini, quod vobis ab omnibus hominibus desideratis impendi. Sic facietis iudicium & iustitiam de quibus nos Propheta beatus admonuit. Facietis enim iudicium, si peccata vestra pœnitendo damnetis, & damnando peccata, benè viuatis. Facietis autem iustitiam, si nulli malum pro malo reddatis, sed omnibus hominibus bona faciatis. Hoc utiq. cōmendat Apostolus di-
 1. Thef. 5 cens: *Videte ne quis malū pro malo alicui reddat: sed semper quod bonum est sectamini inuicē & in omnes.* Quia vero bona opera tunc benè & vtiliter fiunt, cū de bona volūtate procedūt: propterea cū Propheta dixisset, debere nos facere iudicium & iustitiam, addidit, & *diligere misericordiam.* Quia misericordiam maximè debent sublimes humilibus impēdere, & diuites pauperibus prærogare. Hęc autem misericordia duobus impenditur modis: cū peccanti & correctionem pollicenti venia datur, & cū indigenti quod est necessarium non negatur. Ad huius misericordiæ pertinet partes, vt superior inferiorem non opprimat, sed cum iustitia defendat, & diues pauperi nihil auferat, sed pauperem pascat & vestiāt: vt pauperi non insidietur, sed eum potius suis beneficiis

consoletur. Quid ergo est quòd se inflat homo fragilis & mortalis? quid superbit terra & cinis? quid se super pauperem diues superbus extollit? quare pauperẽ despicit? quare pauperem premit? quare pauperi panem aut tenacitate non tribuit, aut rapacitate subducit, & illi, cui debet de suo multũ misericorditer aliquid dare, modicũ quod habet crudeliter conatur auferre? Existimat, quia cùm pauperem grauat seipsum releuet: arbitratur, quia cùm pauperem tribulat, sibi boni aliquid præstet. Et nescit, quia cùm pauperem premit, sibi grauissimum pondus imponit: nec attendit, quia si quid de paupere cogitat, de seipso cogitat. Sibi enim bonum impendit, quando pauperi bonum facit. Si autem malum cogitat facere pauperi, plus nocebit sibi, quàm pauperi. Bonum igitur faciat diues pauperi, & proderit sibi. Diligat misericordiam, & eã pauperi semper impēdat, vt ipse misericordiam in die tribulationis inueniat. Sic se cogitet super hominem pauperem positũ, vt meminerit se sub Deo diuite constitutũ. Non ergo dubitet homini pauperi misericordiam facere, quam à Deo diuite delectatur accipere. Recordetur esse Deum iudicem, qui habet æternam in omnibus

potestatem. Ille enim videt omnium facta, ipse reddet vnicuique secundum opera sua.

Iacob 2. Vnde veraciter dicitur, quia, *Iudicium sine*

Matth. 5 *miserecordia illi, qui non fecit misericordiam. &*

Beati misericordes, quoniam ipsi misericordiam

consequentur. Faciamus ergo iudicium & iu-

stitiam, diligamus misericordiam. Cum au-

tem iudicium & iustitiam facimus, miseri-

cordiam diligimus, cum Deo nostro sol-

licitè ambulamus. Ambulat autem cum

Deo, qui bonis moribus & operibus profi-

cit, qui cœlestia terrenis, & æterna tempo-

ralibus anteponit. Sed oportet vt vnus-

quisque sollicitus ambulet: id est, vt non al-

tum sapiat, sed timeat: vt superbiam fugiat,

& boni nihil suis meritis tribuat, sed in om-

nibus, quæ benè egerit, Dei gratiam reco-

gnoscat. Ista sollicitudo facit hominem cū

Christo per viam humilitatis incedere, &

ad regni cœlestis altitudinem peruenire.

Conuersi ergo ad Dominum pariter eius

miserecordiam deprecemur, vt nobis suam

gratiam largiatur, qua possimus in nobis

ipsis iudicium rectum tenere, iustitiam cæ-

teris exhibere, & diligentes misericordiam,

non opprimere pauperes, sed fouere: vt in

conspectu Dei, cui misericordiam iudiciūq.

cantamus, superexaltantem iudicio miseri-

cordiam inuenire possimus.



FERRANDI DIACONI
ECCLESIAE CARTHAGI-
niensis Epistola ad
Egippium.

DE ESSENTIA TRINITATIS AC
natura Christi.

DOMINO beatissimo fratri Egip-
pio Presbytero Ferrandus exiguus,
in Domina salutem. Carissime, consi-
dera quales habeat vires ab Arriano
Comite nuper proposita quaestio. sed
prius quibus inter se sententijs vel dogmatibus
Arriani & Catholici differant, deliberemus.
Arriani volunt indiuiduam Trinitatem predica-
re, sicut scripturae praedicant vnum Deum. Catho-
lici vero praecepta legis salubriter audientes, Audi Deut. 4.
Israël, Deus tuus, Deus vnus est, ne videan-
tur sub vnus Dei religione fidem Trinitatis ex-
cludere, tres personas vnus substantiae predican-
tes, ipsam Trinitatem vnum Deum simpliciter
confitentur, & de omni sancta Trinitate sapienter
dictum intelligunt, Audi Israël, Deus tuus,

Deus vnus est. *Arriani Patris & Filij & Spiritus sancti tres substantias prædicant, & ideo eorum potestatem diuidunt, vnitatem vitant, immensitatem minuunt, & per errores maiori Patri minorem Filium subiiciunt, minorem autem Filio Spiritum sanctum dicunt. Catholici è contrario Deum Patrem, Deum Filium, Deum Spiritum sanctum, ne tres Deos gentibus inducere videantur, vnius esse honoris, gloriæ, magnitudinis, æternitatis, diuinitatis, æqualitatis, essentiæ consistunt: & nemini alterum præponere cupientes, de Patre tamen filium natum, de Patre & Filio Spiritum sanctum procedere sentiunt. Arrianos si interrogare volueris, vnde sit filius; timent dicere de patris essentiæ, ne gignentis & geniti probetur vna diuinitas, & confirmetur æqualitas. Timent rursum ex nihilo natum filium profiteri, ne creator accipiens originem similem creaturis, vniogeniti priuilegio spoliatus perdat gloriam creatoris. Aliunde verò Filium natum, id est ex aliqua subiacente materia, multo amplius timent adstruere, ne videatur quælibet res ante eum fuisse, per quem facta sunt omnia. Talibus erroribus respondent Catholici, credite quia natus est de patris essentiæ: si negatis, dicite vnde sit? Dicunt etiam minorem Filium, quia negant esse æqualem. Catholici verò dicunt eum secundum diuinitatem æqualem, secundum humanitatem autem minorem. Æqualitas*

eius secundum diuinitatem non habet initium: veruntamen nec equalitas competens diuinitati, nec minoratio congrua carni habet finem. Siue ergo secundum carnem minor, secundum diuinitatem dicatur equalis, idem atque vnus est Christus, verè filius Dei, & verè filius hominis. Aequalis enim perseuerans, factus est minor: minor factus, permansit equalis. Et ideo totus minor, totus equalis: quia seruetur in eo vtraque natura, & quam habuit ex Patre, & quā assumpsit ex Matre. Alioqui si vna in Christo & persona existeret & natura, non posset vnus Christus vni Patri & minor & equalis dici. Dicimus etiam de Christo, quod verè vnus est Christus. Sapientibus tamē mentibus, quoties audiunt, vnus est Christus, cogitare conuenit, quomodo sit vnus: vtrum vnam habendo personam, an vnam naturam. Si non potest dici vnam habere naturam, quem suscepisse alteram dicimus: potest tamen dici vnam habere personam. quoniam persona illa semper manens naturæ semper manentis, ita mirabilem postea naturam sine persona voluntariè suscepit, vt humanam substantiam, non habentem subsistentem manentemque personam, in vnitatem suam suscipiens, ad se faceret pertinere, fieretq. deinceps humanitas illa diuina, quæ Dei cœpisset, ex quo esse cœpisset, habere personam: diuinitas illa humana, quoniam sibi in vnitatem personæ veraciter voluit adunare naturam.

284 *Ferrandi Diaconi. Epist. ad Egip.*

Dicimus ergo, vnus est Christus, vnus est Deus hominisque filius, id est vna est Christi Dei hominisque persona: non tamen dicimus, vnā esse Christi Dei hominisque naturam. Concordantes cum Apostolo volente probare vnitatem

1.Co.10. personæ: Nam in quo, inquit Corinthijs, quod donauit, si quid donauit propter vos in persona Christi. Nunquid non melius personas diceret, si vellet in Christo duas significare substantias? Euidētem similiter adhibens differentiam substantiarum dicit alio lo-

2.Co.13. co, Et si crucifixus est, ex infirmitate crucifixus est, sed viuit ex virtute Dei. Nunquid non ipse crucifixus est qui viuit? Et tamen qui ex infirmitate crucifixus est, ex virtute Dei viuit. Vnde ad amorem commendationemque personæ vnius, sic vnus Christus prædicatur, vt aliquando vna eius vel humana vel natura diuina commemoretur, & vtraque tamen intelligatur. Quoniam inest vnitās, vt qui vnam nominet, ambas significet. Propter quod Apostolus solam humanitatem tangit ad

1.Ti. 2. Timotheum, dicens, Vnus est Deus, vnus mediator Dei & hominum Christus Iesus.

1.Cor. 8. De diuinitate dicit ad Corinthios, Nam etsi sunt qui dicantur Dij, siquidem sunt multi, nobis tamen vnus Deus, ex quo omnia, & vnus Dominus Iesus Christus, per quem omnia.



FRAGMENTA LIBRO-
RVM ALIQVOT B. VLG-
gentij, qui non extant.

*Ex Theodulphi Episcopi Aurelianensis
collectaneis de processione Spiritus
sancti, ad Ludouicum
Pium Imp.*



VLgentius quòd solus pater genuerit filium, solus filius à patre genitus sit, solus spiritus sanctus à patre filioque procedat, in libro tertio quem scripsit contra Fabianum, sic dicit.

Veraciter quippe profiteamur, solum patrem genuisse, solum filium de patre natum esse: veraciter etiam dicimus, solum spiritum sanctum de patre filioque procedere.

*Item in libro quinto contra eundem
Fabianum.*

Ecce ego in quantum potui, licet bre-

uiter, reddidi rationem qua vnum Deum dicamus, patrem & filium & spiritum sanctum: & in ipsa Dei imagine ostendi quoddam diuinæ agnitionis indicium. In qua quidem imagine memoria, intelligentia, & voluntas non habent singulas propriasque personas. Imago quippe est ista non nata, sed facta; non genita, sed creata. Ad hoc utique, ut sicut in ista vna imagine inuenitur quædam discretio vocabulorum, sic in illa vna diuinitate discretio personarum cognoscatur: & naturalis vnitas ostendat vnum esse patrem & filium & spiritum sanctum: personarum verò proprietas demonstret alium esse patrem, alium filium, alium spiritum sanctum. Alium autem patrem, non eo quod Deus est, sed eo quod pater est: & alium filium, non eo quod est Deus, sed eo quod filius est: alium quoque spiritum sanctum, non eo quod Deus est, sed eo quod & patris & filij spiritus est. Aliū ergo patrem, quia genuit, alium filium, quia de patre natus est, & alium spiritum sanctum, quia de patre filioque procedit. Non tamen alium Deum patrem, & alium Deum filium, & alium Deum spiritum sanctum: sed vnum Deum patrem, & filium, & spiritum sanctum. Non enim confundit

vnitas Trinitatem , nec Trinitas separat
vnitatem : quia quod in personarum pro-
prietate discernitur, hoc vnum naturaliter
essentiæ vnus communione monstratur.

Item idem in libro septimo
eiusdem operis.

Non enim loquetur à semetipso : sed quæcumque Ioan. 16
audiet loquetur, & quæ ventura sunt an-
nuntiabit vobis. Ille me clarificabit , quia de
meo accipiet, & annuntiabit vobis. Ecce pri-
mum ostendit non esse alia spiritus sancti,
quàm quæ sunt filij. Deinde vt ostenderet
omnia sua esse quæ patris sunt , adiecit:
Omnia quæcumque habet pater, mea sunt: pro- *ibid.*
pterea dixi, de meo accipiet & annuntiabit vo-
bis. Illud igitur primitus attendamus quod
ait, Non enim loquetur à semetipso : sed quæ-
cumque audiet loquetur. Quis autem com-
prehendat, qualis sit illius simplicis natu-
ræ locutio, vel qualis auditio, vbi non est
aliud audire quàm esse? Audit itaque spi-
ritus sanctus quæcumque pater & filius
dicunt, & hic eadem similiter dicit : sicut
videt filius quæ pater facit, & hæc eadem
similiter facit. In illa enim natura, vbi est
summa & vera simplicitas, in eo filius videt

quod pater facit , spiritus sanctus audit
 quod cum patre filius dicit , qui à commu-
 nione naturalis essentiae , & filius de patre
 natus extitit , & spiritus sanctus de patre
 filioque procedit . Hoc igitur est spiritui
 sancto audire , quod est de natura patris
 filijque procedere : & hoc est loqui , quod
 est per gratiam nostris cordibus ineffabi-
 liter intimare .

Item idem in eodem libro .

Ioan. 10

*Et non rapit eas quisquam de manu mea. Pater
 meus quod dedit mihi maius est omnibus : & ne-
 mo potest rapere de manu patris mei. Ego & pa-
 ter vnum sumus. Hæc est ergo vox , quam
 oves eius audiunt : quæ scilicet in eo quod
 nemo rapit de manu filij , neque de manu
 patris , vnam virtutem filij & patris intelli-
 gunt : & audientes ab eo , quia ipse & pater
 vnum sunt , vnitatem veram in patre & fi-
 lio essentiae naturalis agnoscunt : hæc est
 vox filij , hæc est locutio spiritus sancti : quia
 de natura patris natus est filius , & exinde
 procedit spiritus sanctus . hoc etiam à patre
 & filio spiritus sanctus audit , quia de patre
 & filio communis diuinitatis æqualitate
 procedit . Non ergo spiritus sanctus loqui-
 tur à seipso , qui non à seipso , sed de patre &
 filio*

filio habet naturalem locutionem, unde naturaliter procedens habet originis veritatem. Ad hoc utique pertinet quod ait: *Ille me clarificabit, quia de meo accipiet, & annuntiabit vobis omnia quæ habet pater mea sunt: propterea dixi, quia de meo accipiet.* Quæ bene veritatem doctrinæ suæ veritas ipsa seruauit! Si enim Hoc dixisset, quasi suum esse tantum spiritum ostendisset. sed dicēs OMNIA quæ habet pater mea sunt, propterea dixi quia de meo accipiet; ipsum spiritum sanctum vnum esse ostendit & patris & suum. Cuius intelligentiæ dicens: *Paraclitus autem* Ioan. 14. *spiritus sanctus, quem mittet pater in nomine meo, ille vos docebit omnia, quæcunque dixerō vobis.* Pater mittit, sed in nomine filij mittit: Spiritus sanctus missus à patre docet, sed filius dicit. Hoc etiam illo demonstratur loco, ubi Dominus dicit: *Cum autem* Ioan. 15. *venerit paraclitus, quem ego mittam in vos: à patre spiritum veritatis qui à patre procedit.* Ecce hic paraclitum, quem mittit pater in nomine filij, ipsum mittit filius à patre: mittit autem à patre spiritum veritatis. Mittit ergo à patre spiritum suum, quia ipse est veritas. Mittit eum pater in nomine filij, quia vnus spiritus est patris & filij. mittit eum filius à patre, quia sic pro-

cedit à filio, sicut procedit à patre. Idem quoque spiritus patris, qui spiritus est veritatis. De filio ergo accepit, & omnia quæ habet pater filij sunt, quæ Spiritus sanctus accepit: quia non de solo filio, sed simul de utroque procedit. Hoc autem vocabulum processionis de patre nulli creaturæ inuenitur indultum, ut proprietates ista processionis solius esse demonstraretur essentia naturalis. Legimus enim filium de patre genitum. & quamvis in eo quod vnigenitus dicitur, in solo naturalis generatio demonstraretur: tamen propter gratiam adoptionis, nos quoque Deus pater voluntariè genuit verbo veritatis. Vnigenitus igitur vnus & solus est de patris essentia filius natus. sed & nos per adoptionem & filij Dei dicimur, & de Deo nati, beato Euangeli-

Ioan. 1. Ita dicente: *Quotquot autem receperunt eum, dedit eis potestatem filios Dei fieri: his qui credunt in nomine eius, qui non ex sanguinibus, neque ex voluntate viri, sed ex Deo nati sunt.* Cum ergo nos & Dei filios, & de Deo genitos, & de Deo natos diuinis ostendatur eloquiis, processionis tamen de Deo vocabulum nemo potest creaturæ cuiquā docere concessum. Quid ita, nisi quia vnigenitum filium posset naturalis natiuitas

verum Deum ostendere, cumque non adoptivum, nec diversæ naturæ, sed consubstantiali patri sine dubitatione monstrare. Procedere autem de Deo ideo nulla creatura dicitur, ut ille qui procedit de patre & filio, sic esse credatur Deus, sicut est pater & filius. Solius est enim spiritus sancti de patre & filio proprietas ista processionis, cuius est cum patre & filio natura communis. De patre quippe ac filio procedit, sed non recedit: nec est in aliquo minor aut subditus, qui de immenso patre ac de immenso filio inseparabiliter & unus procedit, & totus. Sic igitur ei non potest imperari quod loquitur, sicut ei non potest imperari quod mirabiliter operatur.

*Item idem in libro octavo eiusdem
operis.*

Filius est igitur à patre missus, non pater à filio, quia filius est à patre natus, non pater à filio. Similiter etiam spiritus sanctus à patre & filio legitur missus, qui à patre filioque procedit. Sed quia non vno modo in scripturis sanctis dicitur missio, propterea in sacramento incarnationis non solum à patre, verum etiā ab spiritu sancto missus


EX LIBRO III. HINC MARI
 Archiepiscopi Remensis aduer-
 fus obiecta Græcorum, ad O-
 donem Bellouacensem.

FULGENTIVS Episcopus, littera-
 rum studijs admodum eruditus, &
 vitæ sanctitate perspicuus, ab Ar-
 rianis pro catholica fide multa per-
 pessus, in libro questionũ de spiritus
 sancti processione sic ait.

Sic totum quod est ipsa natura commu-
 ne tribus inuenitur esse personis, vt aliquid
 tamen inueniatur, quo propriè vnaquæque
 persona noscatur: quod tamen nec inue-
 niatur separabile, nec possit esse commune.
 Nam proprium patris dicimus esse, quòd
 genuit: proprium dicimus filij esse, quòd
 solus de solo patre natus est: proprium Spi-
 rissancti, quòd de patre, filioque procedit.
 In his verò propriis nulla est naturæ separa-
 tio, sed quædam personalis agnitio.

Item in consequentibus.

Non ergo potuit Spiritum sanctum di-
 uinitas filij accipere, cùm ipse Spiritus san-
 ctus sic procedat à filio, sicut procedit à pa-









4-3-5

